

YEYOX YŌG MŌ'POK XOP TE HĀPXOPMĀHĀ'

1 ¹ Teop:

Hōmā 'āte xa kax'āmi hāmāxap tappet tu', nūy Yeyox yōg hāpxopmā'ax xohix 'āktux xa', xi' yōg hāmyūmmūg'ax xohix 'āktux, ² ha Yeyox te yāy yōg tik xop yīmōgatux, tu mō'pok, pu hām'āpak max 'āktux, ha Topa Koxuk te Yeyox ka'ogāhā', ha Topa te Yeyox mōgāhā pepi pexkox tu', ³ nōm xok, tu putpu' hi', ha tikmū'ūn punethok te' pēnāhā', tu 'āmnīy te 40 hā' pēnāhā', yīy ta' xohix te hāmyūmmūg, yā' hi putpu' Yeyox. Tute Topa te tikmū'ūn xat xe'ēgnāg 'āktux, tu Topa te yāy yōg tikmū'ūn xat 'āktux, ⁴ tu yāy yōg mō'pok xop mūtik tihi', tu:

—Nāy, Yenoyanēn kopa nox pi'. Hōmā 'Ātak Topa te hām'āktux xex, hu: “‘Āte yāy Koxuk Xe'ēgnāg nū'kutnāp-tup tikmū'ūn xohix hah,” kaxīy. 'Āte xa hām'āktux, ha' xupak, hu' hip kōmēn Yenoyanēn kopah. ⁵ Yoām te kōnāg hāp-tox pix, pa hāpxip kutōgnāg 'ihā 'āte Topa Koxuk xa nū'kutnāp-tup, 'āp-tox pix'ax putuk nū'kutnāp-tup, puyīy 'āka'ogā'. Kaxīy.

Yeyox te pexkox ha' mōg

⁶ Ha mō'pok xop te nū mūtik pip, tu:

—Hām 'ūm hā xate' puknōg xop mōy putup, nōm puknōg xop te yūmū yōg hām tu' pip? 'Ok hōnhā nō' nōy yānān putup, nūy yūmū yōg tikmū'ūn 'Iyaet xexkānā'? Kaxīy.

⁷ Ha Yeyox te:

—'Āmnīy 'ūm hā' xexkānāp-tup, 'Ātak puxet te' yūmmūg. 'Ap nōy 'ūm te' yūmmūg'ah. 'A 'Ātak Topa te 'āyūmmūgāp-tup'ah. ⁸ Pa Topa Koxuk yīxop-tup, yā kaxīy Topa te 'āka'ogāp-tup, xak mūn 'āktux tikmū'ūn pu', kōmēn Yenoyanēn kopah hām'āktux putup, xix hāpxexka Yonex tu', xix hāpxexka Xāmānit tu', xix hāpxexka xohix tu hām'āktux putup. Kaxīy.

⁹ Tu hām'āktux kux, ha Topa te' mōgāhā pepi', pexkox ha' mōg, ha yāy yōg mō'pok xop te' pēnāhā', ha hāmgōy xexka te' xaxogāhā', pāyā' kopa' mōg, tu mōktu' xupep. ¹⁰ Ha Yeyox yōg mō'pok xop te' pēnā ka'ok, Yeyox pēnāp-tup tu', tu pepi pēnā', 'ihā pexkox yōg mō'pok xop 2 mōxa mō'ka'ok, tu topixax ponnōhnāg mō'tat, ¹¹ tu:

—Ganinet yōg tihik, tep mūn xak xate pexkox kopah? Topa te Yeyox mōgāhā pexkox hah, ha xate! pēnāhā!, ha hāmgyōy xexka kopa! putpu! nūn putup. Kaxīy.

Tik xop te Mātīt yāyikutnāhā!

¹²Ha yīktix 'Onimet tu! pip tik xop, tu ta' mōg, tu mōktu Yenoyanēn tu! mōxaha!. Putahat 'ap tox'ah, yā! hūmnāg, kinōm puxet. ¹³Tu mōktu! mōxaha mīptut tox tu!, tu mīpku'īn tu mō'kānīn, tu mīptut kox tu! mōgāhā!, tu! mōxakux. Tik xohix te: Pet, xix Yoām, xix Tiak, xix 'Anene!, xix Pinip, xix Tōmē!, xix Matēmēo, xix Māteo, xix 'Appeo kutok Tiak, xix Xīmām, nōm te Yoneo xop xexkanāp-tup, xix Tiak nōy kutok Yot. ¹⁴Tu! kuxap-xet, xip-tox puxet, ha 'ūn xop nū mūtik yāy tu nū'nāhā!, xix Mānix, Yeyox mūg tut, xix Yeyox taknōy xop. 'Ūxohix te Topa xak, tu nōm pu hām'āktux pax.

¹⁵Hāpxip 'īhā yāy tu nū'nāhā!, 'ūkuxa mām ka'ok xop xohix te 120, ha Pet tek-nīhā! xip, tu hām'āktux, hu:

¹⁶⁻²⁰—'Ūnōy mūnōp xop, hōmā, hāmyāxatamuk xohix punethok 'īhā, Topa Koxuk te hām'āktux, tu mōnāyxop Namix hā hām'āktux, ha kax'āmi! 'ūkte'ex yōg tappet tu!, hu:

“Pūyā yāy hām'ax tu! xut, puyīy kāmānat nōy hām,” kaxīy. Tu kax'āmi!, ha hāmyāxatamuk xohix nōg, ha Topa yōg hām'āktux hittap hā! mīy nōmhā. Yeyox te Yot xānāhā!, pu yūmūg mūtik 'āti!, tu hāpxopmāhā!, yā yūmūg hā! xape!

—Pāyā Yot te! gāyxop mōgāhā Yeyox hah, nūy tayūmak pop, tu hām hā! nōy yānān, tu yōkānām tu! nāhā!, ha! yōn yāy koxyōy. Ha Yenoyanēn yōg tikmū'ūn xohix te! xupak, tu nōm hām 'āxet'ax mīy 'Axenām, yāy yīy'ax hā: “'Ūhep 'āta'ax tu hahām,” kaxīy.

²¹—'Āpu, tik nōy yāyikutnā!, pu Yot pupi hāpxopmā!, tik te yūmūg mūtik hāpkumep hāmyāxatamuk 3 hā, 'īhā Yeyox te yūmūg mūtik hāpkumep. ²²Tik te Yoām putox pix'ax pēnāhā!, tu Yeyox te pexkox tu! mōg pepi! pēnāhā!, yā! xohix pēnāhā!, pu Yeyox yā putpu! hi 'āktux, yūmūg mūtik tu hām'āktux. Tu ta tu! kux. Kaxīy.

²³Ha tik xop te tik 2 yīmōgatux, 'ūxuxet'ax Yoye Maxamax, yā 'āxet'ax nōy Hāmyok, xix Mātīt, ²⁴tu Topa pu hām'āktux, hu:

—Topa 'āxexkah, yūmū'āte xa tu! xak, xate tikmū'ūn kuxa xohix yūmmūg hah, hukmū'ā yūmmūgā!: Pi'ā! mūn putup xate!? 'Ok pe Maxamax, 'ok pe Mātīt? ²⁵Yot te Hāmgyāyāgnāg pet ha! mōg, 'āpu yūmū'ā! nōy yāyikutnā!, pu Yot pupi hāpxopmā!, nūy Yeyox yōg mō'pok xop kopa! xihip, nūy Yot hā! yānān hāpxopmā!, Kaxīy.

²⁶Tu mō'xap yōn, puyī! xap hāmyūmmūgā!, ha! xut Mātīt, ha Mātīt te nōm tik te 11 mūtik hāpxopmāhā!.

Topa Koxuk te tikmū'ūn ha yīxohoh

2 ¹Hāpxip 'īhā Yoneo xop te 'āmuk xexka mīy, 'ūxuxet'ax Pēteket, ha! kuxa mām ka'ok xop xohix te yāy kotīnnāhā mīptut puxet kopah, ²tu! mām, tu mō'ka'ok tīnnā ka'ok 'āpak, yā 'āmuuh gāy putuk, tu! xupep mīptut kopah,

tu mĩptut kopa nũ'xip, ³ha' yõyxõg punethok pẽnãhã!, yã kuxap putuk, tu hãpxummãhã!, tu mõktu 'ũp-tox xohix xuka' mãm, ⁴ha Topa Koxuk te pexkox tu' yĩxohoh, tu' xohix ka'ogãhã!, pu tu hãm'ãktux. Yã Topa Koxuk te' yĩgãhã!.

⁵Ha hãpxexka xohix yõg Yoneo xop te Yenoyanẽn kopa' tihi!, nõm te Topa xak, ⁶tu' xupak, tu yãy tu nũ'nãhã!, tu' nũn, tu nũktu mõxaha!, tu yãy yĩy'ax xohix 'ãpak, tu' yẽy, ⁷tu kuxãnõg, tu:

—Pẽnã!, 'õhõm Ganinet yõg tihik, tu' yĩy, pãyã' yĩy'ax puknõg xohix hã hãm'ãktux. ⁸Pute 'ũm? Yũmũg nũn, tu hãm'ãpak, tu yãy yĩy'ax hã hãm'ãpak. ⁹Yã' yĩy'ax xohix te: Pat yõg, xix Met yõg, xix 'Enamĩt yõg, xix Mẽyopatãm yõg, xix Yonex yõg, xix Kapanox yõg, xix Po'õn yõg, xix 'Ax yõg yĩy'ax, ¹⁰xix Pinik yõg, xix Pãnpit yõg, xix 'Eyit yõg, xix Nip yõg, xix Xinẽn yõg, xix nõm te Hõm tu' pip xop yãy yĩy'ax nõm xop nũn, tu nũktu Yenoyanẽn tu' mõxaha!, tu' pip. ¹¹Yã' yãg Yoneo, xi' yãg yã' puknõg xop, nõm te Topa xak, xix Yoneo mõnãyxop yõg hãpxopmã'ax tat. Yã Kenet yõg, xix 'Anap yõg, yũmũ'ãte Topa yõg hãpxopmã max xe'ẽgnãg 'ãpak, tu yãy yĩy'ax hã' xupak. Kaxiy.

¹²Hu kuxãnõg, tu yãy pu yĩkopit, hu:

—'ĩntu', pute 'ũm nũhũ'? Kaxiy.

¹³Ha tik yãg kute'ex kummuk, tu:

—Yã mĩnta hep xupyãg xo'op, hu nõ paptux! Kaxiy.

Pãyã 'ap paptux'ah.

Pet te hãm'ãktux

¹⁴Ha Pet yok, tuk-nĩhã' xip tik te 11 kopah, tu' yĩy ka'ok tu:

—Yonex yõg tihik, xix kõmẽn Yenoyanẽn kopa ti xop kamah: 'Õg'ãpax, 'ãte 'ũm mũgã 'ãpax. ¹⁵'A tik xop paptux'ah. 'Ãmhok. Yã hõnhã mãyõn te pexkox puka' yũm. ¹⁶Pa hõmã tik hittap Yoeo te Topa pupi hãm'ãktux, hu:

¹⁷“Hõmã, hãmãyaxatamuk xohix nõg putup,

'ihã Topa te yãy Koxuk yĩxõnnãp-tup 'ũhep xop xohix hah,
ha 'ãk-tok pit xix 'ãk-tok hex te Topa pupi hãm'ãktux putup,
ha' xiptap xop te yãy koxuk hã' pẽnãp-tup, ha kutut xop te nõ yõnkup putup.

¹⁸Ha 'ãmnĩy 'ũm 'ihã Topa te yãy Koxuk yĩxõnnãp-tup yãy yõg

kãmãnat xohix hah, tik xop xix 'ũn xop,

ha Topa pupi hãm'ãktux putup.

¹⁹Ha Topa te hãpxopmã xe'ẽgnãg xa' mũg putup pexkox tu' xix hãm tu',

ha' hep 'ãta pẽnãp-tup, xix kuxap, xix kugõy.

²⁰Mãyõn yãnãm xok putup hãpkoxtap hah,

ha mãyõn hex yãyhã' hep 'ãtap-tup,

ha 'ãmnĩy 'ũm puxet 'ihã Topa nũn putup,

tu hãm tu' nũn putup, pu hãpxopmã'ax xohix kopit.

²¹Tikmũ'ũn 'ũm te Topa 'ãxet'ax hã' xãnã!, pu' xut, puxix Topa nõm

xut putup, pe tihik, pe 'ũhũn.” Kaxiy.

²²Pet te xe:

—Iyaet yōg tikmū'ūn, 'āyīpkox pi', tu hām'āpax. Topa mūn te Nāyane yōg Yeyox yāyikutnāhā, tu 'āxop ha nū'kutnāhā, nūy xa' mūg. Tu Yeyox hā hāpxopmā max xe'ēgnāg 'āxop keppah, ha hāmyūmmūg xate'. ²³Topa te hāmyūmmūg, tu Yeyox hōm 'āxop xohix pu', ha 'āxop tep-tup nōg, tu tik kummuk xop pu' hōm Yeyox, pu mīpkupnix tup-tex. ²⁴Pa Topa te putpu' hīnnāhā. 'Ūxok xe'e, pāyā Topa mūn ka'ok, tu putpu' hīnnāhā. Yā Yeyox te Topa hāk-tok xe'e'. ²⁵Hōmā mōnāyxop Namix te Topa pupi hām'āktux, tu Yeyox 'āktux kamah, 'a yāy 'āktux'ah, hu:

“Āmnīy xohix hā 'ātek xuxyā pēnāhā,

'ūgyīp xe'e hā' xip, nūy mōknīynām, huk kuxānōg 'ohnāg.

²⁶Huk kuxa hittup, xik yīy'ax hittup.

Hōmāk xok putup, pāyāk kuxa yūm ka'ok, tu hāmmax hip, tuk hittup.

²⁷Xatek koxuk nīm putup'ah. 'Ap xukpot tuk nīm putup'ah.

Xatek hep kutox 'āta tux hok, puk-tox 'ohnāg,

yāk mūn tik max xe'ēgnāg.

²⁸Ōgnū putat xe'ēgnāg hāk mōg. Xate 'a' mūg putahat. 'Ūgyīkāgnāg hā 'āxip, yīk kuxa hittup,” kaxīy.

²⁹Tu xe:

—Ūnōy mūnōm xop, 'āte xa hāpxe'e 'āktux: Mōnāyxop hittap Namix xok, ha nō hāpkot, ha' yōg hāpkox xip 'ūxukpot tu', tu yā' xip hōnhā. ³⁰Namix te Topa pupi hām'āktux, tu Topa te hām'āktux xex yūmmūg, tu Topa yā' koit 'ohnāg yūmmūg, yā yāy 'āxet hā Topa te hām'āktux xex, hu: “Āte 'āmōkputox xekanāp-tup, pu tikmū'ūn xohix tu xat,” kaxīy. ³¹Hōmā kumak Namix te hōnhā yōg hāpxopmā'ax pēnāhā, tu' koxuk hā' pēnāhā, tu Topa yōg hāmyāyikutnā'ax pēnāhā, tu' yōg putpu hi'ax pēnāhā, ha Topa te Yeyox nīm 'ohnāg xukpot kopah, ha Namix te' pēnāhā, tu Yeyox yāy hep 'āta kutox 'ohnāg pēnāhā'. ³²Hamūn, Topa te Yeyox hīnnāhā putpu', hak mūg xohix te' pēnāhā'. ³³Yīy Topa te' xexkānāhā 'ūyīpxe'e hah, tu hām'āktux xex, tu hām'āktux, hu: “Āte Topa Koxuk yīxōnnāp-tup tikmū'ūn hah,” kaxīy. Ha hōnhā 'āxohix te' pēnāhā', tu' xupak. ³⁴Namix mūn te pexkox ha 'a' mōg'ah. 'Ap pepi' mōg'ah, pāyā hām'āktux, hu: “Topa te hām'āktux 'ūkxuxyā pu', hu: —'Ūgyīpxe'e hā yūhūm. ³⁵Āte xa tu' gāy xop hupmāp-tup, xayī' xat, ha 'āmūn pu' yīpkox pi!,” kaxīy. ³⁶Iyaet yōg tikmū'ūn, 'āxop te Yeyox putex mīpkupnix tu'. 'Āte xa hām'āktux xe'e', 'ap koit'ah: Topa te Yeyox yāyikutnāhā, puyīy 'āxop hā 'āxuxyā xe'ēgnāg. Tu yā Topa yōg hāmyāyikutnā'ax xe'e'. Tu ta tu' kux. Kaxīy.

³⁷Ha' xohix te' xupak, tu yāyhāhup, tu' kuxa te' xak, tu hām'āktux Pet pu', xix mō'pok xop xohix pu', hu:

—'Ūnōy mōnōm xop, putep mūn mīy'ax? Kaxīy.

³⁸Ha Pet te:

—Āpu yāyhāhup, nūy hāpkummuk mīy kux, hap-tox pix, xa Yeyox yā 'āxuxyā 'āktux, ha Topa te 'āxop yōg hāpkummuk mīy'ax xaxogāp-tup, pu tu' kux, ha xa nū'kutnāp-tup yāy Koxuk Xe'ēgnāg. ³⁹Topa te xa hām'āktux xex, hu: “Āte yāy Koxuk mō'kutnāp-tup xa', xix 'āk-tok hah, yā' xohix hah, nōm te hāptox tu' pip, Topa te nōm xop xānāhā!” Kaxīy.

40 Ha Pet te hām'āktux punethok, nūy tu ka'ōgā', tu' xānāhā', hu:
—'Ānūn, tu tikmū'ūn kummuk nīm, Topa te tikmū'ūn kummuk xūyġāp-
tup hah. Kaxīy.

41 Ha tikmū'ūn xohix xexkah te hām'āpak, tu' yīpkox pip, hap-tox
pix, yā yāy koxuk xop xohix te 3.000. 42 Ha Yeyox yōg mō'pok xop te
hāmyūmmūgāhā mōkuma' mōg. Tu 'āmnīy xohix hā Topa pu hām'āktux,
tu nū mūtik hām'āktux xi' xit, nūy Yeyox nōm te' pupi' xok pe'paxeh.

Tikmū'ūn kuxa mām ka'ok Yeyox Kunnix kopah

43 Ha tikmū'ūn kuxānōg, 'ihā Yeyox yōg mō'pok xop te hāpxopmā ka'ok
xe'ēgnāg punethok, 44 ha' kuxa mām ka'ok Yeyox kopa', tu yāy mūtik pip, tu
hāpxop xohix koxip yāy pu', 45 ha tik xop te yāy yōg hāpxop xohix hāmenex,
nūy 'ūhok xop xohix pu' nīm, tu' xupkumīy 'ohnāg. 46 'Āmnīy xohix hā yāy tu
nū'nāhā' Topa pet xexka kopa', tu yāy mūtik xit yāy pet kopa', nūy Yeyox xok'ax
pe'paxeh, tu' kuxa hittup, yā kuxap-xet, 47 tu Topa 'āktux max, ha tikmū'ūn
xohix tep-tup, ha 'āmnīy xohix hā Topa te tikmū'ūn kuxa kummuk xit, nūy
yānān tu' kuxa max tat, tu' xohix nāg nōy nā' mōgāhā', tu mōktu xohix.

Topa te tik te hāpkumep hok hittupmāhā'

3 1 Māyōn he 'ihā Pet mōg xix Yoām, tu Topa pet xexka ha' mōg, nūy Topa
pu hām'āktux Yoneo xop mūtik. 2 Tik 'ūm te hāpkumep hok, tu' xip. 'Ūtut
te' put tu hāpkumep hok, yāy hi'ax tox hā. 'Āmnīy xohix hā tikmū'ūn te Topa pet
xexka mō'yīnnīn'ax tu' tat, nō'ōm mō'yīnnīn'ax 'āxet'ax “'Ūmax”, ha tikmū'ūn
nūn, ha tik te tu' kax, pu tu hāpxop 'ūm hok popmā', 3 ha Pet mōg nōmhā, xix
Yoām, tu Topa pet xexka hā' mōxaha', ha tik te hāpkumep hok te' pēnāhā', tu:
—'Ām hok hōm hāpxop 'ūm! Kaxīy.

4 Ha tik 2 te' pēnāhā', tu' pēnā ka'ok, tu:

—Hēnā! Kaxīy.

5 Ha tik te hāpkumep hok te' pēnā ka'ok, nūy hāpxop 'ūm pa'. 6 Ha Pet
te hām'āktux, hu:

—'Ap pip'ah tayūmak, 'ūyā xa hāpxop 'ūm nōy hōm. Yā Nāyane yōg
Yeyox Kunnix tekū'ā yāy 'āxet'ax hōm, 'ū 'āxat, hu: 'Āpu, 'āk-nīhā xihip,
nūy hāpkumep! Kaxīy.

Tu' yīy'ax hā' hittupmāhā'.

7 Tu' yīpxe'e mūg, tuk-nīhā' xip, ha' nōy yok mō'ka'ok, tu' kup ka'ok xi'
pata ka'ok, 8 tu' hittup xexka', hu: Pūn, pūn, pūn, kaxīy, tu Topa 'āktux
max. 9 Ha tikmū'ūn te' pēnāhā', tu hāpkumep pēnāhā', tu Topa 'āktux
max 'āpak, 10 tu tik tupmāhā yūmmūg, hu hām'āktux, hu:

—'Āmnīy xohix hā' yūm, tu ta tu' xak Topa pet xexka mō'yīnnīn'ax
'Ūmax tu! Kaxīy.

Tu' yēy.

Pet te hām'āktux Topa pet xexka kopa'

¹¹Ha tik te Pet yāy kep hā' mūg, xix Yoām, ha tikmū'ūn kuxānōg, tu' nūn, tu yāy tu nū'nāhā', Xanomām yōg hāptopa hāmyīkox tu yāy tu nū'nāhā', ¹²ha Pet te tikmū'ūn pēnāhā', tu hām'āktux, hu:

—Iyaet yōg tihik: Teptu 'ākuxānōg, tuk pēnā ka'ok? Putep pe'āpaxex? 'Ak mūg ka'ok'ah, 'ak mūg max xe'e'ah, nūy tik hittupmā'. ¹³Mōnāyxop hittap 'Amanām yōg Topah, xix Mōnāyxop 'Iyak yōg, xix Mōnāyxop Yako yōg Topah, xix mōnāyxop xohix yōg Topah, yā Topa te' yōg Kāmānat Xe'ēgnāg Yeyox xexkanā xe'ēgnāg, pa 'āxop tep-tup nōg, tu' puknōg xop ha' mōgāhā'. Pinat pa te hāmyūmmūg, tu' xut putup, pu mōg, pāyā xatep-tup'ah. ¹⁴Ūmax xe'ēgnāg Yeyox, pāyā xatep-tup nōg, hu Pinat tu' xak, pu tik kummuk xut 'ūyānān tu', pu mōg, nōm te' nōy putex. ¹⁵Yeyox te' xohix hīnnāhā', ha xatep-tex Yeyox, pa Topa te' putpu' hīnnāhā', hak mū'āte' pēnāhā'. ¹⁶Yā Yeyox mūn ka'ok, tu tik hittupmāhā'. Tik kuxa yūm ka'ok Yeyox kopa', ha tik pata kup ka'ogā xe'e'. 'Āxop te' pēnāhā', tu' yūmmūg.

¹⁷—Ūnōy mūnōm xop, hōmā 'āxop te hāmyūmmūg 'ohnāg, xix 'āxexka xop te hāmyūmmūg 'ohnāg. ¹⁸Hōmā tik xop hittap te Topa pupi hām'āktux, tu tikmū'ūn hittap pu hām'āktux, hu: “Topa te Kunnix yāykutnāhā', pu nū'kutnā 'āxop hah,” kaxiy. Yā Topa yōg hām'āktux hittap hā Yeyox xok mīpkupnix tu' nōmhā. ¹⁹Āpu yāyhāhup, nūy 'ōg hāpkummuk mīy kux, tu Topa ha mōg, puyiy Topa 'ōg mīy'ax kummuk xaxogā', pu tu' kux, ²⁰puyiy Topa 'ākuxa ka'ogā', tu Yeyox yāykutnā tap, nūy xa nū'kutnā', tu nū'kutnāp-tup putpu', ²¹pa hōnhā pexkox tu' xip, tu Topa yōg hāptup xe'e hip. Yā Topa pupi hām'āktux xop te' xuktux tap. ²²Mōnāyxop hittap Mōyyex te Yeyox 'āktux kamah, tu: “Hōmā Topa te tik te yāy pupi hām'āktux yāykutnāp-tup, 'āxop kopa' yāykutnāp-tup, tu tik puxet xānāp-tup, puyi' pupi hām'āktux, 'ūkputuk. 'Ūxupax, nūy xat'ax xohix mīy. ²³Tikmū'ūn te Topa pupi hām'āktux 'ax 'āpax, tu 'āyīpkox hok, puxix nōm xop yīpkox pip hok xop kix putup,” kaxiy. ²⁴Ha tik xop xohix te hām'āktux, yā' xohix te' xuktux, yā' Xāmō'eo, yā' xohix te' xuktux. ²⁵'Āxop xik mū'ūg yā nōm tik xop hāk mōkputox, ha hōmā Topa te pa'ax mīy yūmūg mōnāyxop mūtik, tu mōnāyxop 'Amanām pu hām'āktux, hu: “Āmōkputox te' hep xop xohix hā hāmmaxnāp-tup,” kaxiy.

²⁶—Tu nū Kāmānat Xe'ēgnāg Yeyox kutnāhā 'āxop ha hāmāxap, pūyiy 'āhittupmā' xa hāpxopmā kummuk kux. Kaxiy.

Pet xix Yoām te Yoneo xexka xop keppa' tihī'

4 ¹Hāpxip 'ohnāg 'ihā Yoneo yōg 'āmānex xop nūn, xix Topa pet xexka yōg xonat xop kapitām, xix Xanoxeo xop nūn, ²ha Pet xix Yoām te hām'āktux tikmū'ūn pu', tu hāmyūmmūgāhā, tu Yeyox yōg putpu' hi'ax 'āktux, ha' xexka xop gāy, ³tu Pet mūg xix Yoām, tu 'āmniy hā kanet ha' mō'tat, ha' tihī', ha 'āmniy, yā hāptup hip. ⁴Pa nōm te hām'āpak kuxa mām ka'ok Pet yōg hām'āktux kopa', ha' kuxa mām tik xop xohix nōy nā' mōg, tu mōktu 5.000, yā' xohix xexka punethok.

⁵Hāptup 'īhā Yoneo xexka xop xix tik xop te hāmyūmmūg xop te yāy tu nū'nāhā Yenoyanēn kopa', ⁶tu Yoneo 'āmānex xexka xop mūtik pip, 'ūxohix te: 'Anān, yā 'āmānex xop xohix xat'ax, xix Kaxpax mūtik pip, xix Yoām, xix 'Anexān, xi' xape xop, ⁷tu Pet xix Yoām xānāhā, tu' yīkopit, hu: —Putep te 'āxop xat, xa tik pakut hittupmāhā'? Putep hā 'āxop te nōm tik hittupmāhā'? Kaxīy.

⁸Ha Topa Koxuk te Pet ka'ogāhā, ha hām'āktux ka'ok, hu: —Tikmū'ūn xexka xop, xix tik xop te hāmyūmmūg xop: 'Ūg'āpax! ⁹Āxop tek mūn yīkopit, hu: “Putep te 'āxop xat, xa nōm tik hittupmāhā'? Putep hā 'āxop te' hittupmāhā'?” Kaxīy. ¹⁰Ūg'āpax, 'āte xa hāmyūmmūgā'ax, xa hāmyūmmūg, puyīy 'Iyaet yōg tikmū'ūn hāmyūmmūg. 'Āxop te Nāyane yōg Yeyox Kunnix putex mīpkupnix tu', ha Topa te' hīnnāhā putpu', hamūn te nōm tik hittupmāhā', Yeyox 'āxet'ax 'āktux hā' hittupmāhā'. Pēnā'. Nōmhā' xip, tu hāpkumep. ¹¹Yeyox yā mīptut hā' māykup putuk, xix koxuk. 'A 'āxop te Yeyox putup nōg, pa Topa te' xexkanāhā xe'ēgnāg. ¹²'Ok xip tik nōy te tikmū'ūn kuxa kummuk xit, nūy yānān tu' kuxa max tat? 'Ok xip hāpxexka xohix tu'? 'Ap xip'ah. Yeyox yāp-xet xip. Topa te Yeyox 'āxet'ax hōm tikmū'ūn pu', pu Yeyox yūmūg kuxa kummuk tu xit, nūy nō max tat 'ūyānān tu'. Kaxīy.

¹³Ha' xexka xop te Pet pēnāhā xix Yoām, ha' yīpkutuk 'ohnāg, yīy hāmpē'paxex, hu:

—Tappet xax yūmmūg kutōgnāg, pāyā tute Yeyox mūtik hāpkumep, yā' yōg tik xop, kaxīy.

¹⁴Ha tik tupmāhā' xip, ha' xexka xop te' pēnāhā', hu yāyhāhup, tu' yīy 'ohnāg, ¹⁵tu:

—'Āpēp, nūy hāptopa mōg. Kaxīy.

Ha' mōg, ha' xexka xop te yāy mūtik hām'āktux hā' nōy yānān, ¹⁶hu:

—Putep mūn mīy'ax? Pet xix Yoām te hāpxopmā ka'ok xe'ēgnāg. Tep tu yā' koit? Yā Yenoyanēn yōg tikmū'ūn xohix te' pēnāhā', tu' yūmmūg. ¹⁷'Āpu, nōm tik 2 xat hok, pu Yeyox 'āxet'ax 'āktux hok tikmū'ūn pu', pu tikmū'ūn Yeyox xaxok. Kaxīy.

¹⁸Tu Pet xānāhā xix Yoām, tu' xat hok, hu:

—Yeyox 'āxet'ax 'āktux hok, xix tikmū'ūn pu Yeyox yūmmūgā hok. Kaxīy.

¹⁹Pa Pet xix Yoām te:

—Āxop pa te hāmyūmmūg: Pi'yā' max, 'ok pe 'āxop puk yīpkox pip, 'ok pe Topa puk yīpkox pip? 'Āxop te hāmyūmmūg. ²⁰Ūgmū'āte Yeyox 'āxet'ax 'āktux putup mō'kuma' mōg, Topa te' xat, hak mūg yīpkox pip Topa pu hāmāxap, hu hāpxopmā'ax pēnāhā 'āktux putup, xix hāpxopmā'ax 'āpak 'āktux putup kamah. Kaxīy.

²¹⁻²²Ha tik hittup yōg hāmyāxatamuk te 40, yīy tikmū'ūn xohix te Topa 'āktux max, hāpxopmā ka'ok xe'ēgnāg hah, ha' xexka xop te Pet xūyḡāp-tup, xix Yoām, pāyā tikmū'ūn yīpkutuk, hu' mīy 'ok pa' gāy, tu Pet xupepmāhā xix Yoām.

Yeyox yôg tik xop te Topa pu hãm'äktux

²³Ha' mōg, tu mōktu mōxaha' xape pet tu', tu' xexka xop yôg hãm'äktux'ax 'äktux 'üxape xop pu', tu 'ãmānex xexka xop yôg hãm'äktux'ax 'äktux, xix tik xop te hãm'yümmüg yôg hãm'äktux'ax 'äktux.

²⁴Ha' xupak, tu Topa pu hãm'äktux, tu yāy yīy puxet hã hãm'äktux, hu:

—Topah, 'äxexka xe'ëgnäg, xate pekkox mīy, xix hahãm, xix kōnäg xexka', xix hãpxop xohix te kopa' pip mīy. ²⁵Hōmã 'Äkoxuk Xe'ëgnäg te hãm'äktux, tu' xat, pu 'ög kãmānat Namix hãm'äktux, hu: “Tep tu' puknög xop gāy? Ha' hep xop xohix te hãmpe'panōm, hu: “Ükxexka”, kaxīy, pak-tōgnäg, tu xe: “Ügka'ok”, kaxīy, pāyã' pu'ügñäg. ²⁶Hãpxexka xohix yôg xexka xop te yāy tu nü'nähã', nüy Topa hã kumīy, nüy Topa yôg hãm'yäyikutnã'ax mütik yāy tuk-mīy,” kaxīy.

²⁷—'Ap koit'ah. Yã Yenoyanēn yôg xexka xop, yã Yoneo yôg tikmü'ün xi' puknög xop, xix Pinat, xix 'Enot, tu yāy tu nü'nähã', nüy 'ög Kãmānat Xe'ëgnäg hã kumīy, pāyã xate Yeyox yäyikutnähã', tu nôm xexkanã xe'ëgnäg.

²⁸Hōmã xate hãmpe'äpaxex, tu hãm'äktux tap, yīy 'ögnü hãm'äktux hittap hã Yoneo yôg tikmü'ün kummuk te Yeyox kummugähã nōmhã, xi' puknög kummuk xop te' kummugähã nōmhã. ²⁹Tu' gāy, tu' yīy gāynām, yīg mü'äte xa tu' xak, xak müg ka'ogã', 'üyīy hãpxopmã max, nüy nôm xexka xop yīpkutuk hok, nüy 'ögnü hãm'äktux 'äktux pax. ³⁰Yã 'äka'ok, hu tikmü'ün hittupmähã', tu hãpxopmähã', xix hãpxopmã ka'ok xe'ëgnäg, pu tikmü'ün pēnã', tu 'ög Kãmānat Xe'ëgnäg Yeyox hã hãpxopmähã'. Kaxīy.

³¹Tu Topa pu hãm'äktux kux, ha mīptut yāy nuhuk, ha Topa Koxuk te' xohix ka'ogähã', hu Topa yôg hãm'äktux 'äktux, tu' yīpkutuk 'ohnäg.

'Ükuxa mãm ka'ok xop te hãpxop xohix koxip

³²Yã' kuxa mãm ka'ok, tu' kuxap-xet, xip-tox puxet. 'Ap hãm'äktux'ah, hu: “Yögnü”, kaxīy. 'Ämhok. Pāyã hãpxop xohix yã yāy yôg, tu' xupkumīy 'ohnäg.

³³Ha Yeyox yôg mō'pok xop te hãm'äktux ka'ok, tu yümüg xuxyã Yeyox putpu hi'ax 'äktux, ha Topa te' kuxa mãm ka'ok xop ka'ogähã', ha tikmü'ün tep-tup pax.

³⁴'Ap hok xop pip'ah, pap-te xop te mīptut hãmenex xix hahãm, tu tayūmak pop, tu' xape xop pu' popmähã', ³⁵Ha' mō'pok xop te' pop, tu' hok xop pu' popmähã'.

³⁶Ha Xip yôg tik yã Nemi hã' mōkputox, tu' xuxet'ax Yoye Maname', ha' xuxet'ax te tikmü'ün yīy'ax hã: “Nôm te' nōy ka'ogähã”, ³⁷tu yāy yôg hãm hãmenex, tu tayūmak paha', tu mō'pok xop pu' hōm.

'Änãnĩn xix Xapit

5 ¹Tik 'äxet'ax 'Änãnĩn, xi' xetut 'äxet'ax Xapit, tu yāy yôg hãm hãmenex, ²ha' nōmenex, tu tayūmak paha', tu mō'pot, tu' yāg xaptop, tu' yāg nōy paxnün mō'pok xop hah, Yã mō'ãmã', hu:

—Yã tayūmak xohix, yã' kux, 'ap nōy xip'ah. Kaxīy.

Ha' xetut te yã' koit yümmüg, tu mō'ãmã kamah. ³Pa Pet te:

—'Ānānīn, tep tu xate Hāmġāyāgnāg yōg hām'āktux 'āpak, tu 'āyīpkox xip nōm hām'āktux kummuk pu'? Yā Topa Koxuk pu yā' koit, tu tayūmak yāgnāg xaptop, tu' yīy 'ohnāg! ⁴Hahām 'ōgnū, xix tayūmak xohix 'ōgnū'. Putep mūn pe'āpaxex 'ākuxa kopah? Xate tikmū'ūn pu' koit'ah, pa Topa mūn pu' koit. Kaxīy.

⁵Ha' xupak, tu hām tu' nāhā', tu' xok xe'e!, ha nōm te' xupak kuxānōg xexka'. ⁶Tik xiptap te 'Ānānīn kīy topixxax hā, tu mō'tat, tu nō hāpkot.

⁷Ha 'ot 3 nōg, 'īhā' xetut mō'nāhā', 'ap te yīpxox xok'ax yūmmūg'ah, ⁸ha Pet te: —Pu, 'āyīy. 'Ōgnū hahām yōg tayūmak xohix te xīy? Kaxīy.

Ha:

—Hamūn. Yā tayūmak xohix, 'ap nōy xip'ah. Kaxīy.

⁹Pa Pet te:

—Tep tu 'āyīpxox te koit, xix 'āmūn? 'Ok Topa Koxuk pu' koit, nūy nō ġāyā'? 'Ūxupax: Tik te 'āyīpxox nō hāpkot, tu ta' nūn, tu nū', tu mō'ātat putup kama hāptopa'. Kaxīy.

¹⁰Pet te hām'āktux kux, 'īhā' xetut te hām tu' nāhā', Pet pata yīka' nāhā', tu' xok, ha tik xiptap nūn, tu' pēnāhā', tu hāptopa mō'tat, tu' yīpxox yōkāmā' xe nō hāpkot. ¹¹Ha' kuxa mām ka'ok xop kuxānōg xexka', ha tikmū'ūn xohix te' xupak, tu kuxānōg kamah.

Ha hāpxopmā ka'ok xe'ēgnāg

¹²Ūkuxa mām ka'ok xop te yāy tu nū'nāhā' Topa pet kux kaxax kaka hah, ha' kux kaxax 'āxet'ax Xanomām yōg, ha Yeyox yōg mō'pok xop te hāpxopmā ka'ok xe'ēgnāg tikmū'ūn kopah, puyī' pēnā', ¹³yīy tikmū'ūn kuxa mām 'ohnāg xop kuxānōg, tu' kuxa mām xop yīpkutuk, 'ap te yāy tu nū'nā'ah nōm xop mūtik, pāyā' xohix te nōm hāp-tup pax. ¹⁴Ha tikmū'ūn punethok kuxa mām ka'ok yūmūg xuxyā kopah, tu' nūn, tu' nōy tu' mōxaha', tu yāy tu nū' kuxa mām ka'ok xop xok, tik xop xix 'ūn xop, ¹⁵ha tikmū'ūn te' pakut xop tat putat kopah, tu mīm xix 'extet tu' xex, pu Pet koxuk kopa nāy, nūy hīttupmā'. ¹⁶Ha kōmēn punethok te Yenoyanēn yīka' pip, ha kōmēn nōy yōg tikmū'ūn nūn Yenoyanēn tu', tu' pakut xop tat, xix yāmīy kummuk kopa' pip xop tat, ha' hīttupmāhā'.

'Ūxexka xop te tik xop kummuġāhā'

¹⁷Pa tik te 'āmānex xop xat'ax te' yīpkumīy, xix Xanoxeo xop te' yīpkumīy, ¹⁸tu' xat, pu Yeyox yōg mō'pok xop mūy, tu kōmēn yōg kanet ha mō'tat, tu' xex. ¹⁹Pa 'āmniy koxtap 'īhā pexkox yōg nū'kutnā'ax nūn, tu hāmyīnnīn'ax xōn, tu tik xop mōy kanet kopah, tu hāptopa' mōġāhā', tu' xat, hu:

²⁰—Mōg, mōg, Topa pet xexka ha mōg, nūy Yeyox 'āktux, nōm te tikmū'ūn xop xohix hīnnā'ax. Kaxīy.

²¹Ha hām'āpak, tu' mōg, tu māyōn xupep 'īhā tikmū'ūn yūmmūgāhā Topa pet xexka kopah.

Ha ta tik te 'āmānex xop xat'ax nūn, xi' yōg xop xohix, tu Yoneo xexka xop xohix xānāhā', pu yāy tu nūnnāy, ha' xat, hu:

—'Āpu, kanet tu nūnnāy Yeyox yōg mō'pok xop. Kaxīy.

²²Ha xonat xop mōg kanet hah, tu' xak, pāyā 'ap ti'ah, yīy putpu' nūn, tu' xexka xop pu' xuktux, ²³hu:

—Pipkup ka'ok hā mō'yīnnīn, ha' xōn ha' xīy 'ohnāg, ha xonat xop te hāmyīnnīn'ax yīka' pip, nūy pēnā', hak mū'āte kanet yōg hāmyīnnīn'ax xōn, pāyā 'ap tik 'ūm xip'ah kanet kopah. Kaxīy.

²⁴Ha Topa pet xonat xop yōg kapitām te' xupak, xix 'āmānex xexka xop te' xupak kamah, tu:

—'Īhok, pute 'ūm? Kaxīy.

²⁵Ha tik 'ūm nūn, tu:

—Hōmā 'āxop te tik tigāhā kanet kopah, yā hōnhā Topa pet xexka tu' pip, tu tikmū'ūn yūmmūgāhā'. Kaxīy.

²⁶Ha xonat xop te tikmū'ūn yīpkutuk, tu hāmp'e'paxex, hu “Pe yā 'ā mīkaxxap tux!” kaxīy. Hu mō'pok xop xūygā 'ohnāg, pāyā' mūg, tu' nūnnāhā', ²⁷tu' xexka xop keppa' xex, ha tik te 'āmānex xop xat'ax te' yīkopit, hu:

²⁸—'Ok 'āyīpkox hok? Hōmāg mū'āte xa' xat, hu: “'Āyīy hok, Yeyox 'āxet'ax hā yūmmūgā hok!” kaxīy. Pa 'āxop te tikmū'ūn xohix yūmmūgāhā Yenoyanēn kopah, nūy 'ūgmūg kupex Yeyox xok'ax hah, pu tikmū'ūn 'ūgmūg 'āktux kummuk. Kaxīy.

²⁹Pa Pet xix mō'pok xop te hām'āktux hā' nōy yānān, tu:

—'Ūgmū'āte Topa yīy'ax 'āpak, tu Topa puk yīpkox pip hāmāxap, tuk-nāy tu tikmū'ūn puk mūg yīpkox pip. ³⁰'Āxop te Yeyox putex mīpkupnix tu', pipkup hā' xup mīpkupnix tu', nūy tup-tex, ha mōnāyxop yōg Topa te' putpu' hīnnāhā', ³¹tu' xexkanāhā yāy yīpxe'e hā', nūy hāpkummuk mīy'ax xaxogā', pu tu' kux. ³²'Ūgmū'āte' pēnāhā', xix Topa Koxuk te' pēnāhā', tu hām'āpak, tu xe hām'āktux, ha Topa te yāy Koxuk Xe'ēgnāg nū'kutnāhā tikmū'ūn hah, nōm xop kuxa mām ka'ok xop ha nū'kutnāhā'. Kaxīy.

³³Ha' xupak, tu' gāynām, tu' kix putup, ³⁴pa Paniye xop yōg tik xip, 'ūxuxet'ax Gāmāniet. 'Ōhōm tik te hāmyūmmūg xexka', tu Topa yōg xat'ax yūmmūgāhā', ha tikmū'ūn xohix tep-tup pax. Hak-nīhā' xip, tu' xat, hu:

—'Āpu, tik xop hāptopa mōgā'. Kaxīy.

Ha' mōgāhā Yeyox yōg mō'pok xop. ³⁵Ha Gāmāniet te' xexka xop pu hām'āktux, hu:

—'Iyaet yōg tik xop, 'ōg pa mōxip, xayīy 'āmp'e'āpaxeh, nūy hāpkummuk 'ūm mīy hok. ³⁶Hōmā Teot te tikmū'ūn xat putup, tu tik xop te 400 mōgāhā', hap-tex, ha nōm xop te' pe' mōg te' xaxok, ha' kux. ³⁷Ha hāpxip 'īhā gohet te tikmū'ūn mō'kupix, tu tikmū'ūn xohix te xīy yūmmūg putup, hu mō'kupix, 'īhā Ganinet yōg Yot xip, ha tikmū'ūn punethok te Yot pe' mōg, ha' xok, ha tikmū'ūn te yīkām xupmāhā'. ³⁸⁻³⁹Yīy hōnhā 'āte xa hām'āktux, hu: Tik xop nīm, tu' kummugā hok. Pi'yā'? 'Ok pe Topa te nōm nū'pok, 'ok pe tik 'ūm te nū'pok? 'Āte' yūmmūg'ah. Yī' hip, ka Topa mūtik yūmūg yāy tuk-mīy. Kaxīy.

Ha' xexka xop te Gāmāniet yōg hām'āktux 'āpak, tu' yīpkox pip, ⁴⁰tu Yeyox yōg mō'pok xop xānāhā', tu' kix xokxax hā', tu' xat, hu:

—Yeyox 'āxet'ax 'āktux hok! Kaxīy.

Tu' tux hok, pu mōg.

⁴¹Ha' mōg, tu' kuxa hittup. Yā' xexka xop te' xūyghāhā, Yeyox xūy putuk tu' xūyghāhā, yī' hittup. ⁴²Tu 'āmnīy xohix hā hāmyūmmūgāhā Topa pet xexka kopah, xix mīptut xohix kopah, tu Yeyox yā Kunnix 'āktux. Topa te nōm yāyikutnāhā xe'ēgnāg.

Tik te 7 te mō'pok xop hā' tehe'

6 ¹Hāpxip 'īhā' kuxa mām ka'ok xop xohix nōy nā' mōg. Ha Genex yīy'ax yōg tikmū'ūn te:

—'Āmnīy xohix hā 'āxop tek xit'ax popmāhā yūmū yōg hok mām xop pu', pāyā 'ūgmūg yīy'ax xop xate' xaxok, tuk xit'ax 'ohnāg hōm, 'īhā Yoneo yīy'ax hok mām xop pu' popmāhā'. Kaxīy.

²Ha mō'pok xop te 12 te' kuxa mām ka'ok xop xohix xānāhā', tu:

—Topa tek-mūg xat, 'ūyōg hām'āktux yūmmūgā', hak mū'āte Yeyox tu hāpxopmāhā'. 'Ap hāmyūmmūgā kux putup'ah, nūy kuxa mām ka'ok xop tu' xit'ax popmā'. ³Āpu, tik max te 7 yīmōgatux 'āxop kopah, pu hāpxop popmā', puyīy 'ūn xop xaxogā hok, ⁴pak mū'āte Topa pu hām'āktux pax putup, tu Topa yōg hām'āktux yūmmūgāp-tup. Kaxīy.

⁵Ha' xohix te nōm hām'āktux putup, hu' kuxa hittup, tu tik xop yīmōgatux, tu 'Extep yāyikutnāhā hāmāxap. Yā' kuxa yūm ka'ok, ha Topa Koxuk te' ka'ogāhā'. Ha tik nōy yīmōgatux 'Extep mūtik, tik xohix te: Pinip, xix Ponok, xix Nīkānōg, xix Tīmām, xix Pām, xix kōmēn 'Ātikit yōg Nīkonao, yā Nīkonao te Yoneo xop hā' puknōg tap, pāyā hōmā nōm xop kopa mō'nāhā', tu mōnāyxop yōg hāpxopmā'ax tat. ⁶Ha tik te 7 mōgāhā mō'pok xop hah, tu' keppa tigāhā', ha Topa pu hām'āktux, tup-tox yīmū' yīm nōm, pu Topa Koxuk ka'ogā'. ⁷Ha tikmū'ūn punethok te Topa yōg hām'āktux 'āpak, ha Yenoyanēn yōg tikmū'ūn punethok kuxa mām ka'ok, ha' kuxa mām ka'ok xop xohix nōy nā' mōg. 'Āmānex xop kama te Topa yōg hām'āktux pu' yīpkox pīp.

'Ūgāy xop te 'Extep mūg ka'ok

⁸Ha 'Extep te hāpxopmā xe'ēgnāg, pu tikmū'ūn pēnā', ha Topa te' ka'ogāhā', tup-tup pax, ⁹ha Topa pet 'āxet'ax Nimet yōg, ha' yōg xop nūn, tu hām'āktux hā' nōy yānān 'Extep mūtik, ha tik xohix te: Xinēn yōg, xix 'Anexanit yōg, xix Xinix yōg, xix 'Ax yōg. 'Ūxohix te hām'āktux hā' nōy yānān nām 'Extep mūtik. ¹⁰Pa 'Extep te hāmyūmmūg xexka', yā Topa Koxuk te nōm pu hāmyūmmūgāhā', ha' nōy xop te' yēy, tu' gāy. ¹¹Tu' nōy xop pu tayūmak xaptop hā' hōm, tu' xat, hu:

—'Āmōg, nūy yā' koit. Kaxīy.

Ha' mōg, tu' koit, hu:

—'Extep te hām'āktux kummuk, tu Topa 'āktux kummuk xix Mōnāyxop Mōyyex 'āktux kummuk. Kaxīy.

¹²Tu' yīy hã tikmũ'ũn gãyãhã', xi' xexka xop, xix hãmyũmmũg xop, tu' koit hã' xohix gãyãhã', tu' 'Extep mō'tat, tu' xexka xop keppa' xix, ¹³ha tik xop te koit hã hãm'ãktux, hu:

—'Extep te hãm'ãktux kummuk, tu' xuktux pax, ha' kux 'ohnãg, tu Topa pet xexka 'ãktux kummuk, xix Mõyyex yõg xat'ax 'ãktux kummuk. ¹⁴Kãy te hãm'ãktux, hak mũ'ãte hãm'ãpak, ha: Nãyane yõg Yeyox te Topa pet xexka koxyõy putup, tu Mõyyex yõg hãpxopmã'ax hittap nõãp-tup, nũy yã' xat'ax puknõg hã' nõy yãnãn. Kaxīy.

Pãyã' koit.

¹⁵Ha tikmũ'ũn xexka xop te 'Extep pẽnã ka'ok, ha' pa hittup xe'ẽgnãg, tu pexkox yõg mō'kutnã'ax putuk.

'Extep te yãy pupi hãm'ãktux

7 ¹Ha tik te 'ãmãnex xop xat'ax te 'Extep yīkopit, hu:

—'Ok tik te hãpxe'e 'ãktux? Kaxīy.

²Ha 'Extep te:

—'Ūkxape xop xi' tak mũnõm xop, 'ũg'ãpax: Topa xexka xe'ẽgnãg te pexkox kopa' xip, tu hãm'ãktux mõnãyxop 'Amanãm pu', ha hãpxexka Mẽyopotãm tu' xip hãmãxap. ³Ha hãm'ãktux, hu: "Õg hãm nĩm, xix 'ãxape xop nĩm, nũy mõg hãm 'ũm tu 'ãte xa' mũg putup," kaxīy. ⁴Ha' xip hãpxexka Kãnet tu', tu' mõg, tu mõktu xupep kãmẽn 'Anãg tu', tu' tihĩ', ha yãy tak xok, ha Topa te mō'kutnãhã 'õg hãm hah, nũnte! ⁵Pa Topa te 'Amanãm pu hãm 'ohnãg hõm, hãm 'ũm kutõgnãg tu' hõm 'ohnãg, ha 'Amanãm te' puknõg yõg hãm tu' xip, pa Topa te hãm'ãktux xex, hu: "Hõmã 'ãte xa nũ hãm hõm putup, tu 'ãxok tehomip, 'ãmõkputox pu' hõm putup," kaxīy. Pãyã 'Amanãm kutok hok. ⁶Ha Topa te xe hãm'ãktux 'Amanãm pu', hu: "'Ak-tok xupep-tup xop te' puknõg yõg hãm tu' pip putup, ha hãmyãxatamuk xohix te 400 hã' puknõg xop te' xũygãp-tup, ha' hok hã' hãm putup. ⁷'Ūkpa te hãmyũmmũg, ha hãmyãxatamuk te 400 nõg, 'ihã 'ãte' gãy xop 'ũyãnãn tu' xũygãp-tup, ha 'ãmõkputox xupepmãp-tup, puk xax nũnte, nũy tu nũk tetex," kaxīy. ⁸Ha Topa te pa'ax mĩy 'Amanãm mũtik, pu tuk-tok xupep-tup xop xohix hãmyũmmũg, yã Topa yõg tikmũ'ũn xe'e', ha Topa te' xat, hu: "'Axop yãy nãg xax xak kutõgnãg 'ũyĩmap. Puyã 'ãk-tok pit xupep-tup xop xohix yãy xax mep, ha 'a' kux'ah," kaxīy. Ha 'Amanãm tek-tok 'Iyak put, ha 'ãmnyĩy te 8 nõg, 'ihãk-tok pit yãy xax yĩmap tu' xak, ha 'Iyak tek-tok pit Yako put, ha Yako tek-tok put te 12, tuk-tok pit xohix yãy xax 'ũyĩmap tu' mep kutõgnãg.

⁹—Ha mõnãyxop Yako kutok pit xop te' taknõy yĩpkumĩy, tu' taknõy Yoye putup nõg, hu' nõmenex hãpxexka 'Eyit yõg puknõg xop pu', tu tayũmak pop, ha' mõgãhã', tu ta tu' mõg, tu mõktu xupep 'Eyit tu', ha Yoye kuxa teknõg, pãyã Topa te Yoye mũtik tihĩ', ¹⁰tu hãpkummuk tu' xut, tu mō'nĩynãm, puyĩy hãmyũmmũg xexka', ha 'Eyit yõg tik te tikmũ'ũn xat'ax te Yoye putup pax, tu' xexkanãhã yãy pet kopah, xix hãpxexka 'Eyit kopah. ¹¹Ha hãmyãxatamuk 'ũm hã hãmhõgnãg, 'ap xit'ax pip'ah, ha putup te' kix 'Eyit yõg tikmũ'ũn, xix

Kānā'āg yōg tikmū'ūn, ha mōnāyxop te yāy xit'ax xak, pāyā xipi'ah. ¹²Pa tik 'ūm te hām'āktux Yako pu', hu: "Yā' pip xit'ax 'Eyit kopah." Kaxīy. Ha Yako tek-tok pit te 10 mō'pok 'Eyit tu', ha' taknōy te 10 mōg hāmāxap, tu ta tu' xit'ax xak. ¹³Tuk-nāy tu' mōg 'ūxehēh, ha Yoye te hām'āktux yāy taknōy xop pu', hu: "Ūgmūn yā 'ātaknōy Yoye!" kaxīy. Ha tik te' xat'ax 'āxet'ax Pana'o', tu Yoye xape xop yūmmūg. ¹⁴Ha Yoye te yāy tak xānāhā', xi' xape xop xohix, pu nūl, 'ūxohix te 75. ¹⁵Hu' nūn, tu ta tu' nūn tu nūktu mōxaha 'Eyit tu', ha hāpxip 'ihā Yako xok xix Yoye', xi' taknōy xop. ¹⁶Ha' yīnxax tat Xikēg tu putpu', tu nō hāpkot. Hōmā 'Amanām te nōm xukpot pop, tu tayūmak hā' yānān 'Emōg kutok mūtik.

¹⁷—Ha 'Iyaet yōg tikmū'ūn xop xohix nōy nā' mōg, tu mōktu xohix xexka', ha hāmyāxatamuk xohix nōg, 'ihā Topa te yāy yōg hām'āktux xutigāhā', tu hām xexka hōm 'Amanām mōkputox pu'. ¹⁸Ha tik puknōg nōy xip 'Eyit tu', nōm te Yoye yūmmūg 'ohnāg, ¹⁹tu kokexmax putuk, tu' gāynām, tu yūmmūg mōnāyxop xūyghāhā', tu' xat 'ūgāy tu', hu: "Ūtut tek-tok pit put, puyā' nīm hāptopa', puyī' xok!" kaxīy. ²⁰Ha Mōyyex mūg tut te' put, ha' māynāg, Topa te nōm putup pax, ha māyōn hex 'anuk te 3 hā yāy tak pet kopa' xip, ²¹ha hāptopa' xupep, tu' xex, ha nōm xat'ax kutok hex te' xipihi', tup-tup, 'ūmax hah, tu' nōy yāy. ²²Ha' puknōg xop te Mōyyex pu hāmyūmmūg'ax hāmyūmmūgāhā', puyiy hāmyūmmūg xexka', ha hām'āktux ka'ok, xix hāpxopmā ka'ok kamah. Kaxīy.

²³'Extep te xe:

—Hāmyāxatamuk te 40 nōg, 'ihā Mōyyex mōg, nūy xape xop pēnā', ²⁴tu' pēnāhā', ha tik puknōg te 'Iyaet yōg tik kummugāhā', ha Mōyyex te' xape mō'nīynām, tu 'Eyit yōg puknōg 'ūyānān tu' kix, ha' xok. ²⁵Ha Mōyyex te hāmpē'paxex, hu: "Topa tek putup, 'ūxape xop mō'nīynām," kaxīy. Pāyā tik 'ūm te Mōyyex yōg hāmpē'paxex yūmmūg 'ohnāg. ²⁶Ha hāptup nōy 'ihā tikmū'ūn yāykix, ha Mōyyex te' pēnāhā', tu' nōy nīmāp-tup, hu: "Āxop yā xape'. Putep tu yāykix?" kaxīy.

²⁷—Pa' nōy tep-tup nōg, tu: "Ū 'ūm 'āmūn? Ū 'ūm te 'āxexkanāhā', xayiy hāpxopmā'ax tu kopit? Āpa te hāmyūmmūg 'ohnāg. ²⁸Hōmā xate 'Eyit yōg tik putex. 'Ok hōnhā xatek mūn putex'ax?" kaxīy. ²⁹Ha Mōyyex kuxānōg, tu' xupaha hāptox hah, tu' nōy yōg hāpxexka Mīni'ān tu' xip, tu hāpkumep, tuk-tok pit 2 pop.

³⁰—Ha hāmyāxatamuk te 40 nōg, ha pexkox yōg nū'kutnā'ax nūn, ha Mōyyex te' pēnāhā', tu hām panip xexka yōg yīktix Xīnāy yīmū' pēnāhā', ha mīxux te kuxap xakot, ha pexkox yōg nū'kutnā'ax te' kopa' xip, ³¹ha' pēnāhā', tu kuxānōg, tu hūmnāg tu' mōg, tu Topa yiy'ax 'āpak, ha: ³²"Ūgmūn yā Mōnāyxop hā Topah, xix Mōnāyxop 'Amanām hā Topah, xix Mōnāyxop 'Iyak hā, xix Mōnāyxop Yako hā Topa kamah," kaxīy. Ha Mōyyex kuxānōg xexka', tu yāy puxu'ux nām, 'ap pēnāp-tup'ah, ³³ha Topa te: "Hām te 'āk-nīhā 'āxip hām tu', mō'ānā hok, Topa xip tu'. ³⁴'Āte yāy yōg tikmū'ūn xūy pēnāhā 'Eyit kopah, hu' kokōn 'āpak, tuk nūn, 'āhak nūn, nūy mō'ākutnā 'Eyit tu'." kaxīy.

³⁵'Extep te xe:

—Hōmā tikmū'ūn te Mōyyex putup nōg, tu: “Ũ'ūm te 'āxexkanāhā, xayīy kopit?” kaxīy. Pa hōnhā Topa te Mōyyex nū'kutnāhā tikmū'ūn hah, nūy Mōyyex xexkānā, nūy tikmū'ūn mōy hām puknōg kopah, ha Topa te pexkox yōg nū'kutnā'ax nū'kutnāhā, nōm te mīxux kopa' xip, pu Mōyyex mūtik tu ti', tu mō'nīynām. ³⁶Ha Mōyyex te 'Iyaet yōg tikmū'ūn hittap mōy hāpexka 'Eyit kopah, tu hāmyāxatamuk te 40 hā' mōgahā, tu hāpxopmā ka'ok xe'ēgnāg hāpexka 'Eyit tu', xix kōnāg xexka 'Āta tu', xix hām panip xexka tu', puyīy nōm tikmū'ūn pēnā'. ³⁷Hamūn, Mōyyex te tikmū'ūn hittap pu hām'āktux, hu: “Topa te tik yāy'kutnāp-tup puyīy tu pupi hām'āktux, 'āxape xop kopa yāy'kutnāp-tup, 'ānōy, 'ūkputuk,” kaxīy. ³⁸Mōyyex xix tikmū'ūn te hām panip xexka tu' pip, ha pexkox yōg nū'kutnā'ax te hām'āktux yīktix Xīnāy yīmū', tu Mōyyex pu hām'āktux, xix yūmūg mōnāy'xop pu', ha Mōyyex te Topa yōg xat'ax pop, nūy yūmūg xohix pu' popmā'.

³⁹—Mōnāy'xop te Mōyyex yōg hām'āktux 'āpak, pāyā' yīpkox 'ohnāg, tu' nīm, tu hāpexka 'Eyit xak, tu 'Eyit tu' mōg putup putpu', ⁴⁰tu hām'āktux 'Anām pu', ha 'Anām te 'Iyaet yōg tikmū'ūn hā 'āmānex xat'ax hāmāxap, ha hām'āktux, hu: “Āpu, Topa komut 'ūm pipkup hā mīy, 'ūyīy heyah, puyīy yūmūg xohix tu mōgā'. Pī'yā' mōg Mōyyex, nōm tek mūg mōgāhā? 'Ap yūmmūg'ah,” kaxīy. ⁴¹Ha mūnūytut kutok komut mīy, pipkup yānāmnāg 'āta hā' mīy, hu nō heyah, ha xokxop mō'hap nōm mūnūytut kutok komut keppah, tu' haxyāhā, tu' kuxa hittup. ⁴²Pa Topa te nōm topa komut xop putup nōg, hu tikmū'ūn nīm, 'ūgāy tu', ha' kuxa mām ka'ok māyōn kopah, xix māyōn hex kopah, xix māyōnnāg kopah, ha Topa pupi hām'āktux xop hittap te tappet tu kax'āmi', Topa pupi kax'āmi', hu: “Hāmyāxatamuk te 40 hā 'āxop te 'a' mō'hap 'ohnāg xokxop, 'ūhax, hām panip xexka kopah 'a mō'hap'ah. 'Āmhok.

⁴³Āxop tep-tup puknōg xop yōg topahnāg komut xop, 'ūxuxet'ax Mōnok, yā topahnāg komut Hēnpāg yōg māyōnnāg 'āxop tep-tup pax, tu hāpxop 'ūm 'āyīm hā' mīy putup, hu nō heyah.

'Āte mō'ākutnāp-tup Maminōn kūnāpa', hāptox tu'.” Kaxīy.

⁴⁴—Mōnāy'xop te Topa pet mīy hām panip xexka kopah, ha Topa te Mōyyex yūmmūgāhā, ha' mīy, topixxax ka'ok xexka hā' mīy. ⁴⁵Ha mōnāy'xop te Topa pet tat, ha Yoyoe te mōnāy'xop mōgāhā, ha yāy yōg hām tu nū'tat, 'īhā Topa te' puknōg xop xohix hām kopa' mōy, nūy mōnāy'xop pu' hōm. Ha mōnāy'xop pip, ha hāmyāxatamuk xohix mōg, ha Namix te 'Iyaet yōg tikmū'ūn xat. ⁴⁶Ha Topa te Namix putup pax, ha Topa pet max xexka mīy putup, mōnāy'xop Yako yōg Topa pu' mīy putup, ⁴⁷pāyāk-tok Xanomām te' mīy.

⁴⁸—Pa Topa xexka xe'ēgnāg te mīptut 'ūm kopa' ti'ah, nōm mīptut yīm hā' mīy, ha tik te Topa pupi hām'āktux, tu:

⁴⁹“Pexkox xexka yāk xip'ax xe'ēgnāg,
ha hahām yāk mūn hā hāptonnok'ax.

Xate 'a mīptut 'ūm mīy putup, puk pip'ax? 'Ak pip putup'ah.

⁵⁰Ūgyīm te hāpxop xohix mīy.” Kaxīy.

⁵¹Yā 'Extēp te hām'āktux kux, tu:

—'Āyīpkox 'ohnāg! 'Ākuxa mām 'ohnāg Topa kopah! Yā 'āmnīy xohix hā Topa Koxuk pu 'āyīpkox 'ohnāg, mōnāyxop yīpkox hok, xix 'āxop. ⁵²Mōnāyxop te Topa pupi hām'āktux xop kix, nōm te Yeyox nūn'ax 'āktux, ha 'āxop te Topak-tok hōm hām puknōg yōg xop pu', puyīp-tex. ⁵³Pexkox yōg nū'pok xop te xa Topa yōg xat'ax hōm, pa 'āxop tep-tup nōg. 'Ūkux. Kaxīy.

⁵⁴Ha' xexka xop te hām'āpak, tu' gāynām, tu' xox kāyānām, 'ūgāy tu'. ⁵⁵Pa Topa Koxuk te 'Extep ka'ogāhā', tu mō pexkox kāgmāg, tu Topa yōg yānām xe'ēgnāg pēnāhā', tu Yeyox pēnāhā kamah, ha Topa yīpxe'e hāk-nīhā' xip, ⁵⁶tu:

—'Āte pexkox kopa' pēnāhā', tu Yeyox pēnāhā', yā Tikmū'ūn Kutok, tu Topa yīpxe'e hāk-nīhā' xip. Kaxīy.

⁵⁷Pa Yoneo xexka xop gāynām, tu' yīy ka'ok, tu mō yīpkox yīnnīn, nūy hām'āpak hok, tu mō' nū'paha', ⁵⁸tu kōmēn Yenoyanēn kopa' xut, hak-nāpa' mōg, ha mīkax xexka tux, nūy putex, ha tik xop te' pēnāhā', tu' xax mōy, tu tik xiptap 'āxet'ax Xaot pata yīka mō'yōn. ⁵⁹Ha mīkaxxap xexka tux nām, 'ihā 'Extep te Yeyox xānāhā', hu:

—Yāyā Yeyox, 'āte xa 'ūgkoxuk hōm, pa! Kaxīy.

⁶⁰Tu' kopaxux hā' xip, tu' yīy ka'ok, hu:

—Yāyā', 'āpu 'ūyōg hāpkummuk mīy'ax xaxogā', pu tu kux! Kaxīy.

Tu hām'āktux kux, tu' xok.

Ha Xaot te' pēnāhā', tu 'Extep xok'ax putup, yī' kuxa hittup.

Ha Xaot te' kuxa mām ka'ok xop kummugāhā'

8 ¹Ha Yoneo xop te' kuxa mām ka'ok xop kummugāhā' kōmēn Yenoyanēn kopah, ha nū'paha', tu mō tika' mōg hāpxupmāhā tu', hāpxexka Yonex tu' mōg, xix hāpxexka Xāmānit tu' mōg, ha mō'pok xop te 12 nox pip Yenoyanēn kopah. ²Tik xop max te Topap-tup pax, tu 'Extep nō hāpkot, tu mō'nīy, tu ta pota ka'ok.

³Pa Xaot te hāpkummugāhā', tu' kuxa mām ka'ok xop xūygāhā', tu' pet kopa' mōy, tu' yīm kīy ka'ok, tu kanet kopa' xex, tik xop xix 'ūn xop.

Tik xop te hām'āpak max 'āktux kōmēn Xāmānit kopah

⁴Ha nōm nū'paha te Topa yōg hām'āktux 'āktux putat tox hā, xix kōmēn xohix kopah. ⁵Ha ta' mōg Pinip, tu mōktu Xāmānit tu' xupep, tu Yeyox yā Kunnix 'āktux. Yā 'ōhōm Yoneo yōg tikmū'ūn xat'ax xe'ēgnāg. ⁶Ha Xāmānit yōg tikmū'ūn kuxap-xet, xip-tox puxet, tu Pinip yōg hām'āktux 'āpak, tu hāpxopmā xe'ēgnāg pēnāhā'. ⁷Ha Pinip te yāmīy kummuk mōy Xāmānit yōg tikmū'ūn kopah, ha yāmīy kummuk yīy ka'ok, tu' mōg, ha hāpkumep hok xop hittup, tu hāpkumep, yāy hi ha' mōg. ⁸Yīy Xāmānit yōg tikmū'ūn kuxa hittup xexkah.

⁹⁻¹¹Pa tik 'āxet'ax Xīmām te' xut mīhīm, tu hāmīyaxatamuk xohix hā kugōy hāp-tex, tu yāy 'āktux xexka', ha Xāmānit yōg tikmū'ūn kuxānōg Xīmām hā, 'ūxut mīhīm hah, tu' yīpkox pip Xīmām pu', tu: "Yā Topa mūn te Xīmām ka'ogāhā xexka!" kaxīy.

¹²Pa Pinip nūn, tu Yeyox yōg hām'āpak max 'āktux, tu Topa te yāy yōg tikmū'ūn xat 'āktux, tu Yeyox yā Kunnix 'āktux, ha tikmū'ūn kuxa mām ka'ok Yeyox kopah, hap-tox pix, tik xop xix 'ūn xop. ¹³Ha Xīmām kuxa yūm ka'ok kamah, hap-tox pix, ha Pinip pe' mōg, tu hāpxopmā xe'ēgnāg pēnāhā', tu tikmū'ūn hittupmā'ax pēnāhā', tu kuxānōg.

¹⁴Ha Yeyox yōg mō'pok xop pip Yenoyanēn kopah, tu Xāmānit yōg tikmū'ūn yāyhā Yeyox yōg xop yūmmūg, tu Pet xix Yoām mō'pok. ¹⁵Ha' mōg, tu mōktu mōxaha Xāmānit tu', tu Topa tu' xak, puyīy yāy Koxuk nū'kutnā nōm tikmū'ūn hah. ¹⁶Hōmā xix hōnhā Topa te yāy Koxuk Xe'ēgnāg nū'kutnā hok Xāmānit yōg tikmū'ūn hah, pa kōnāg hāp-tox pix puxehnāg, 'ihā Yeyox yā yāy xuxyā 'āktux. ¹⁷Ha Pet xix Yoām tep-tox yīmū' yīm xex, ha Topa te tikmū'ūn ha nū'kutnāhā yāy Koxuk Xe'ēgnāg.

¹⁸⁻¹⁹Ha Xīmām te' pēnāhā', tu mō'pok xop tep-tox yīmū' yīm xex pēnāhā', yā Topa te yāy Koxuk nū'kutnāhā tikmū'ūn hah, ha Xīmām te' pēnāhā', hu hām'āktux, hu:

—'A' nōmenex nōm hāpka'ok'ax, yīy xa tayūmak hā' nōy yānān 'ūyīy tikmū'ūn putox yīmūg yīm xeh, puyīy Topa Koxuk 'ūka'ogā'. Kaxīy.

²⁰⁻²¹Pa Pet te' mānōg, tu:

—Topa te 'ōg tayūmak nōāp-tup, xix 'āmūn nōāp-tup kamah! Xate hāmpē'āpaxex tayūmak hā' nōy yānān, nūy Topa Koxuk pa'. Topa te' hok tu nū'kutnāhā', pāyā xa nū'kutnā hok, 'ākuxa kummuk hah. Topa te 'āka'ogāp-tup 'ohnāg. ²²'Āpu, yāyhāhup, tu hāpkummuk mīy kux, tu Topa tu' xax, pu 'ōgnū hāpkummuk mīy'ax xaxogā', pu tu' kux. ²³'Āte 'āyūmmūg. 'Ōgnū hāpkummuk mīy'ax te 'āhīy yāy pu'. 'Āmūn yīpkumīy xexka nām. Kaxīy.

²⁴Ha Xīmām te tu' xak, hu:

—'Āpu, Topa tu' xax, 'ūgmūn pupi tu' xax, pu tu nū hok hāpxopmā'ax kummuk, nōm hāpxopmā'ax kummuk xate hām'āktux. Kaxīy.

²⁵Ha Pet xix Yoām te Topa yōg hām'āktux 'āktux, tu ta' mōg putpu Yenoyanēn tu', hu putat tox hā Yeyox yōg hām'āpak max'ax 'āktux, nūy xip tu xexka xohix kopa' xuktux.

Pinip te hāpkumep

²⁶Ha pexkox yōg nū'kutnā'ax te Pinip pu hām'āktux, hu:

—'Āyok, nūy mōg Yenoyanēn yōg putat hā, nūy mōy kōmēn Gayat tu 'āpep. Kaxīy.

Ha putat te hām panip xexka kopa' xip.

²⁷Ha ta' yok, tu' mōg, tu hāpxexka yōg 'Etxop yōg tapāyōg pēnāhā', ha tapāyōg yā 'Ennōk, tu 'Etxop yōg xat'ax hex Kānax hā kāmānat, tu hāpxexka yōg tayūmak xex, tu' pēnā max, tu' mōg Yenoyanēn tu', nūy Topa xax, nūy Topa pu nū' xup. ²⁸Tu putpu' nūn, tu te hāpxop yīkūy'ax yīmū' yūm, tu' nūn, tu mō'kupix, tu Topa pupi hām'āktux'ax 'Iyait yōg tappet mō'kupix, ²⁹ha Topa Koxuk te Pinip pu hām'āktux, hu:

—Mõg, nūy nū mūtik mõg hāpxop yīkūy'ax yīmū'. Kaxīy.

³⁰Ha' mõg mō'ka'ok, tu tapāyōg mō'kupix 'āpak, tu:

—'Ok yūmmūg xate hāpxop mō'kupix'ax? Kaxīy.

³¹Ha' nōy yānān, tu:

—'Ap yūmmūg'ah. 'A tik 'ūm tek yūmmūgā'ah. Kaxīy.

Tu' xānāhā', pu mõg, pu yāy mūtik mõg. Ha hāpxop tat'ax yīmū' mām, tu' nōy mūtik mõg. ³²Ha mō'kupix hā kaxīy:

“Tikmū'ūn te kahnēn mōgāhā', nūy putex, hā kaxīy tikmū'ūn te nōm tik mōgāhā', nūy putex.

Tikmū'ūn te kahnēn kutok xax xaxit, ha' yīy hok, yā kaxīy nōm tik yīy 'ohnāg.

³³Tu' hok tu yāyhāhup, hāpkummuk mīy 'ohnāg tu', yīy tik xop te hāpkohe' mīy, 'Ihā tik max pu hāpkummugāhā'.

'Ū 'ūm te tik mōkputox 'ūm pēnāhā'? 'Ap xip'ah, tik xok hah.” Kaxīy.

³⁴Ha tapāyōg te:

—'Āyīy, tik 'ūm 'ōhōm? 'Ok pe 'Iyait te yāy kax'āmi', 'ok pe' nōy pupi kax'āmi'? Kaxīy.

³⁵Ha Pinip te hām'āktux, tu hāmyūmmūgāhā', tu nōm tappet hittap hā Yeyox 'āktux, tu Yeyox yōg hām'āpak max'ax 'āktux, tu Topa yōg hām'āktux hittap hā hāmyūmmūgāhā'.

³⁶Ha' mõg putat hā, tu kōnāgkox pēnāhā', ha tapāyōg te:

—Pēnā'! Kōnāgkox! 'Āpu, kōnāg hāk putox pix! Kaxīy.

³⁷Ha Pinip te:

—'Āte 'āp-tox pix'ax. 'Ok 'ākuxa yūm ka'ok xe'e'? Kaxīy.

Ha' nōy te:

—Hamūn! 'Ūgkuxa yūm ka'ok Yeyox Kunnix kopah. 'Ōhōm yā Topak-tok xe'ēgnāg. Kaxīy.

³⁸Ha hāpxop yīkūy'ax tu' xakux, ha Pinip te tapāyōg putox pix kōnāg hā.

³⁹Ha kōnāgkox tu' xupep, tu putpu' nūn, ha Topa Koxuk te Pinip putmōg, yīy tapāyōg te' pēnā hok, tu' kuxa hittup hā' mõg yāy pet hah. ⁴⁰Ha tik 'ūm te Pinip pēnāhā kōmēn 'Ayot tu', ha kōmēn xohix tu hām'āktux hā' mõg, tu Yeyox yōg hām'āpak max'ax 'āktux, tu' mõg, tu mōktu xupep Xeyanet tu'.

Xaot te hāpkummuk mīy'ax hā yāyhāhup

9 ¹Pa Xaot gāy, tu' yīy gāynām, tu:

—'Āte Yeyox mūtik mõg xop xohix kix putup! Kaxīy.

Tu' mõg tik te 'āmānex xop xat'ax hah, ²tu tappet pop, pu kōmēn Namān yōg xexka xop tu' mūg, nūy Yeyox yōg putat hā' mõg xop mūy, nūy tik xop xix 'ūn xop mūy, nūy kīy, tu nūktu Yenoyanēn ha' mōgā'.

³Tu ta' mõg Namān yōg putat hā' mõg, ha kōmēn hāmhūmnāg tu' xip, ha hāpxip 'ohnāg 'ihā kuyānām xexka xakot Xaot yīmap. ⁴Ha Xaot te hām tu' nāhā', tu yānmūn xupep'ax 'āpak, ha:

—Xaot, Xaot, tep tu xatek xūyghāhā'? Kaxīy.

⁵Ha Xaot kuxānōg, tu:

—'Ũ 'ūm 'āmūn? Kaxīy.

Ha' nōy te:

—'Ūgmūn yā Yeyox. Xatek mūn xūygāhā', ⁶pa 'āyok, nūy 'āk-nīhā xhip, tu mōg tu mōktu kōmēn Namān tu xupep. 'Ōnte tik 'ūm te xa hāmyūmmūgāp-tup. Kaxīy.

⁷Ha tikmū'ūn te Xaot mūtik hāpkumep, tu' hip, tu' yēy. Tu' yīy'ax 'āpak, pāyā 'a tik 'ūm pēnā'ah. ⁸Ha Xaot yok, tuk-nīhā' xip, pāyā hāmpēnā hok, ha tik te Xaot yīm mūg, tu' mōgāhā', tu mōktu mōxaha Namān tu'. ⁹Ha 'āmñy 3 hā Xaot te hāmpēnā hok, tu' xit hok, xi' xo'op hok kamah.

¹⁰Ha kōmēn Namān kopa' xip tik kuxa yūm ka'ok Yeyox kopah, 'ūxuxet'ax 'Ānānīn, ha yāy koxuk hā hām'āpak, ha yūmūg xuxyā te' xānāhā', hu:

—'Ānānīn! Kaxīy.

Ha:

—Te 'ūm? Kaxīy.

¹¹Ha yūmūg xuxyā te' xat, hu:

—'Āyok, nūy mōg putat yok hā Yot pet hah, nūy Tax yog tik 'āxet'ax Xaot xax. 'Ūpēnā'! Tute Topa mūtik hām'āktux! ¹²Tu' yōtkup hā tik 'āxet'ax 'Ānānīn pēnāhā', ha' nūn, tu' xupep, tup-tox yīmū' yīm xex, pu xe hāmpēnā'. Kaxīy.

¹³Pa 'Ānānīn te' yānān, hu:

—Yāyā', tikmū'ūn te Xaot 'āktux kummuk. Tute 'ōg tikmū'ūn xūygāhā Yenoyanēn kopah, ¹⁴tu Yenoyanēn tu' xip, tu tappet pop Yoneo yōg 'āmānex xexka xop tu', tu' nūn, nūy mūy, nūy kīy, nōm xop te 'āxānāhā'. Kaxīy.

¹⁵Pa yūmūg xuxyā te:

—'Āmōg. 'Āte Xaot yāyikutnāhā, puk mūn 'āktux hāmpuknōg xop pu', xi' xexka xop pu', xix Yoneo yōg tikmū'ūn pu', ¹⁶tu' xūy putup 'ūgmūn hā, ha 'āte tu nōm 'āktux putup. Kaxīy.

¹⁷Ha 'Ānānīn mōg, tu mīptut tu' xupep, tu mō'nāhā', tu Xaot putox yīmū' yīm xex, tu:

—'Ūgnōy Xaot, xate yūmūg xuxyā Yeyox pēnāhā putat kopah, hak xat xa', pu xe pēnā', pu Topa Koxuk 'ākuxa ka'ogā'. Kaxīy.

¹⁸Hāpxip 'ohnāg 'īhā 'ūxax 'ūm te Xaot pa tu' nāhā', ha' xax yā māpxax putuk, ha Xaot te hāmpēnā max, tu' yok, tuk-nīhā' xip, hāp-tox pix, ¹⁹ha' xit, xi' xo'op, tu mōktu ka'ok.

Xaot te kōmēn Namān tu' xip

'Āmñy kutōgnāg 'īhā Xaot te nōm xop kuxa mām ka'ok xop mūtik tihi Namān kopah. ²⁰Tu' mōg Topa pet hah, nūy Yeyox 'āktux, tu hāmyūmmūgāhā', hu:

—Yeyox yā Topak-tok xe'ēgnāg! Kaxīy.

²¹Ha' xohix kuxānōg, hu yāy pu hām'āktux, hu:

—'Ok yā Xaot xe'e'? Hōmā Xaot kuxa yūm 'ohnāg Yeyox kopah, tu' gāynām nōm xop tu', nōm xop te Yeyox 'āxet'ax hā Topa xānāhā', ha'

nūn, nūy mūy, nūy kīy, nūy Yenoyanēn yōg 'āmānex xop ha' mōgā'. Pāyā hōnhā Xaot kuxa yūm ka'ok Yeyox kopah, tu Yeyox 'āktux! Kaxīy.

Tu' kuxa te' yēy.

²²Ha Xaot ka'ok, tu hām'āktux max, tu Yeyox yā Kunnix 'āktux, tu yā Topa yōg hāmyāyikutnā'ax 'āktux, ha tikmū'ūn te Namān kopa' pip te' yēy.

²³Hāpxip kutōgnāg 'ihā Yoneo gāy xop te yāy tu nū'nāhā', nūy Xaot putex. ²⁴Tu' xaptop hā' pip Namān yōg mō'yīnnīn'ax tu', tu' Xaot hip, tu 'āmnīy xohix hā' hip, xix hāptup xohix hā mō'yīnnīn'ax hā pēnānā' pip, nūy Xaot mūy, nūy putex, pa tik 'ūm te Xaot pu' xuktux. ²⁵Ha 'āmnīy koxtap 'ihā tik xop te Xaot mūtik hāpkumep te Xaot xix manax kopah, pu' gāy xop 'ūp-tex hok, 'ūxaptop tu' xix, tu hāpxux 'ihā' yūm, pu tu xupmān, ha' xut, ha' xupaha'.

Xaot te kōmēn Yenoyanēn tu' xip

²⁶Tu ta' mōg, tu mōktu xupep Yenoyanēn tu', tu nōm xape xop pēnāp-tup, pāyā nōm xop kuxānōg, tu hāmpē'paxex, hu: “Xaot te yā mō'āmā'. Tute! koit. 'A Yeyox yōg'ah.” Kaxīy. Tu' yīpkutuk. ²⁷Pa Maname nūn, nūy Xaot mō'nīynām, tu' mōgāhā mō'pok xop hah, ha mō'pok xop te' pēnāhā, ha Maname te nōm xop pu hāmyūmmūgāhā'. Yā hōnhā Xaot te Yeyox 'āktux, tu yūmūg xuxyā yōg hām'āktux'ax 'āktux Namān kopah, tu' yīpkutuk 'ohnāg.

²⁸Ha Xaot te nōm xop mūtik nox tihī', tu yūmūg xuxyā 'āktux Yenoyanēn xohix kopah, ²⁹tu' yīpkutuk 'ohnāg, tu hām'āktux hā' nōy yānān Genex yīy'ax xop mūtik, ha nōm gāy xop te Xaot putex putup. ³⁰Pāyā' xape xop te' yūmmūg, tu Xaot mōgāhā Xeyanet tu', tu yāy yōg hām ha' kutnāhā kōmēn Tax tu'.

³¹Ha hāpxexka Yonex yōg kuxa mām ka'ok xop hittup, tu' kuxa mām, xix hāpxexka Ganinet yōg xop kuxa mām, xix hāpxexka Xāmānit yōg xop, tu' hittup, 'ūgāy nōg hah, tu Topa xak, tu' kuxa te' yēy Topa keppah, tu yūmūg xuxyā Yeyox yōg putat hā' mōg, ha Topa Koxuk te' ka'ogāhā', ha tikmū'ūn nūn, tu nōm xop xohix nōy nā' mōg.

Pet te kōmēn Nit tu' mōg, xix kōmēn Yop tu'

³²Ha Pet te hāpkumep punethok, tu kōmēn xohix tu' mōg, tu 'āmnīy ha ta' mōg, tu mōktu xupep kōmēn Nit tu', tu' kuxa mām xop xape xop mūtik pip. ³³Ha tik 'ūm 'āxet'ax 'Ēnēy xip, tu hāmyāxatamuk xohix te 8 hā hāpkumep hok, tu mīmpe mō'yōn'ax yīmū' pip. ³⁴Ha Pet te:

—Ēnēy, Yeyox Kunnix te 'āhittupmāhā'. 'Āyok, nūy 'āk-nīhā xip, xa 'ōg kōmenok yūm. Kaxīy.

Ha' yok, tuk-nīhā' xip. ³⁵Ha Nit yōg tixmū'ūn xohix te' pēnāhā', xix Xanōn yōg xop te' pēnāhā', hu' kuxa mām ka'ok yūmūg xuxyā kopah, tu yāyhā Yeyox yōg tikmū'ūn.

³⁶Ha 'ūn 'ūm xip, Yop kopa' xip, tu' xuxet'ax Tamit, yā' xuxet'ax nōy Nok, nōm tikmū'ūn yīy'ax hā: “Mūnūy.” Kaxīy. Ha Nok kuxa yūm ka'ok Yeyox kopah. Nōm 'ūn max, tu hāpxopmā max, ha tikmū'ūn te' yūmmūg, ha hāpxop

hok popmāhā, 'ūhok xop pu' nīm. ³⁷Tu 'āmnīy 'ūm 'ihā' pakut, tu' xok, ha' pix, tu mīpku'īn yīmū' put mōg, tu' mōg, tu mō'tat pepi mīptut nōy yīmū' mōg'ax kopah, tu' xex. ³⁸Ha Pet te Yop tu' yīkā' xip, ha' kuxa mām ka'ok xop te tik 2 mō'pok, ha Pet xānāhā, tu ta' mōg, tu mōktu Pet ha mōxaha, tu:
—Mā! 'Ānūn mō'ka'ok! Kaxīy.

³⁹Ha' yok, tu yōkāmū' nūn, tu nūktu mōxaha mīptut tu', ha 'ūn hok mām xop te Pet yīmap hā' potaha'. Hōmā Nok te topixxax xap, 'ūhok mām xop pupi' xap, yā hōnhā Pet tu nōm xax mūg, nūy Pet tu Nok mūn max mūgā'. ⁴⁰Ha Pet te' xohix xat, hu:

—Hāptopa 'āmōxān. Kaxīy.

Ha' mōg, yīy Pet te' kopaxux hā' xip, tu Topa pu hām'āktux, tu hām'āktux kux, tu pepi' mōg, tu Nok yīnxax xat, hu:

—Tamit, 'āyok, nūy pepi xip. Kaxīy.

Ha' pa ko'a, tu' yūm. ⁴¹Ha Pet te' yīm hā' mūg, tu' yoa, tu 'ūn xop xānāhā, xi' kuxa mām ka'ok xop, tu:

—'Ūpēnā! Yā' hi! Kaxīy.

⁴²Ha Yop yōg tikmū'ūn xohix te' yūmmūg, hu' kuxa mām ka'ok yūmūg xuxyā Yeyox kopah, ⁴³ha 'āmnīy xohix hā Pet te Yop kopa' nox xip, Xīmām mūti ti', ha xokxax hā hām Xīmām, tu xokxax xut, tu' hīy, tu' xup, ha' nak.

Pet xix Kohnēn

10 ¹Ha tik puknōg 'ūm 'āxet'ax Kohnēn, tu kōmēn xexka Xeyanet kopa' pet, tu 'Itat yōg xonat xop hā kapitām. ²Tu Topa xak, tu' kuxa te' yēy Topa keppah, xik-tok te', xi' xetut te', xi' xape xop xohix te Topa xak, nōm te Kohnēn pet kopa' tihī'. Tu Yoneo hok pip xop pu hāpxop hok nīm, tu' xupkumīy 'ohnāg, tu 'āmnīy xohix hā Topa pu hām'āktux. ³Ha māyōn he 'ihā Kohnēn te pexkox yōg nū'kutnā'ax pēnāhā', yāykokuk hā' pēnāhā', tu' pēnā max, ha' nūn Kohnēn hah, tu hām'āktux, hu:
—Kohnēn. Kaxīy.

⁴Ha' nōy te' yēy, tu kuxānōg xexka', tu' pēnā ka'ok, tu:

—Pute 'ūm nūhū'? Kaxīy.

Ha' nōy te:

—Topa te 'ōg hām'āktux'ax 'āpak, tu 'ōg hāpxopmā max pēnāhā, tu 'āxaxok 'ohnāg. ⁵'Āpu, tik 'ūm mō'pok kōmēn Yop tu', pu Xīmām Pet xānā', ⁶ha Xīmām nōy pet tu' xip, nōm Xīmām nōy te xokxax hā' hām, tu' xut, tu' hīy, tu' xup, ha' nak, ha Xīmām pet te kōnāg xexka kux tu' yūm. Kaxīy.

⁷Tu' mōg, pexkox yōg nū'kutnā'ax mōg, ha Kohnēn te' yōg kāmānat 2 mō'pok, xix xonat xe'ep-xet mō'kutnāhā', ha xonat te Topa xak kamah.

⁸Ha Kohnēn te mō'pok xop pu hāmyūmmūgāhā', tu tu pexkox yōg nū'kutnā'ax te hām'āktux 'āktux, tu Yop tu mō'pok.

⁹Ha hāptup ha ta' mōg, tu mōktu mōxaha kōmēn Yop tu', 'ihā Pet te māyōn te yāy kote' yūm 'ihā pepi' mōg, tu mīptut xanep yīmū' yūm, nūy

Topa pu hām'āktux. ¹⁰ 'Ūp-tup tep-tex, ha' xit putup, pa' xit'ax puk 'ohnāg, yī' hip, tu yāy koxuk hā' pēnāhā', ha pexkox xōn, ¹¹ ha Pet te' pēnāhā', ha pexkox tu topixxax xexka yīxohoh, tu' kuxyā hā' hīy, ¹² tu xokxop kopa' xex, xix putuxnāg, xi' kep hā' mōg xop. ¹³ Ha yānmūn xupep'ax te:

—Pet, 'āyok, nūy kix, nūy mā'! Kaxīy.

¹⁴ Pa Pet te:

—'Ak mūn'ah. 'Āte' mā xet'ah xokxop mā hok xop. Kaxīy.

¹⁵ Ha' yānmūn xupep'ax te xe':

—Topa te nōm putup, yī' max. Kaxīy.

¹⁶ Ha' yīxohoh, tu' nūn tehōmip tikoxyuk, ha pexkox tu' mōg, tu yāy xaxogāhā'.

¹⁷ Pa Pet te' yēy, tu:

—Topa tep-tep 'ūgyūmmūgāp-tup? Kaxīy.

Tu hāmp'e'paxex, 'ihā Kohnēn yōg kāmānat nūn, tu nūktu mōxaha', tu Xīmām pet xak, tu yā' xipi', tu mīptut yōg mō'yīnnīn'ax tu' tihī', ¹⁸ tu' xānāhā', hu:

—'Ok xip Xīmām Pet? Kaxīy.

¹⁹ Ha Pet te hāpxopmā'ax pe'paxex, 'ihā Topa Koxuk te:

—'Ūpēnā'! Yā tik 3 te 'āxak. ²⁰ 'Āpu, nāhāy, nūy nōm xop mūtik mōg. 'Ākuxānōg hok, 'āte nōm tik nū'pok 'āhā. Kaxīy.

²¹ Ha Pet yīxohoh, tu:

—Yāk mūn Xīmām Pet. Tep ha 'ānūn? Kaxīy.

²² Ha' nōy te:

—'Āhak nūn. Kapitām Kohnēn tek mūg nū'pok, yā' māx, tu hāmyok mīy, tu Topa xak, tu' kuxa te' yēy Topa keppah, ha 'Iyaet yōg tikmū'ūn xohix te nōm putup pax, ha pexkox yōg nū'kutnā'ax te' xat, hāk mūg nū'pok, ha 'āxānāhā', pu Kohnēn pet ha mōg, 'ūyīy 'ognū hām'āktux'ax 'ūm 'āpax. Kaxīy.

²³ Ha Pet te tik 3 tu' kax, pu' xit, nūy mōhōn yāy pet kopah.

Hāptup ha ta' mōg Kohnēn yōg tik mūtik, ha' xape xop mōg kamah, ²⁴ tu mōktu hāptup nōy 'ihā' mōxaha Xeyanet tu', ha Kohnēn te' hip, tu' xape xop xohix mūtik hip, ²⁵ ha Pet nūn tu nūktu mō'nāhā', ha Kohnēn te' kopaxux hā' nāhā', tu nū'xup, nūy heyak, ²⁶ pa Pet te:

—Xihip 'āk-nīhā'. Yāk mūn tihik kamah. Kaxīy.

²⁷ Tu hām'āktux hā' nōy yānān, tu mō'nāhā', tu tikmū'ūn punethok pēnāhā', ²⁸ tu hām'āktux, hu:

—Yoneo yōg xat'ax xate' yūmmūg, ha' xat hok, hu: “Mōnā hok tik puknōg pet kopah,” kaxīy. Pa Topa tek mūn yūmmūgāhā', hu: “Hāmp'e'apaxeh hok, hu: —Topa te' puknōg xop putup nōg, kaxīy. 'Āmhok. Topa te nōm putup, puyīy yāyhā yāy yōg tikmū'ūn,” kaxīy. ²⁹ Xatek xānāhā', 'āhak nūn. Putep hā xatek xānāhā'? Kaxīy.

³⁰ Ha Kohnēn te:

—Hōmā, 'āmnīy te 4 'ihā, māyōn he 'ihā, 'āte Topa pu hām'āktux, tu tik 'ūm pēnāhā', ha' yōg topixxax te yānām putuk, ³¹ ha: “Kohnēn, Topa te 'ōg hām'āktux'ax 'āpak, tu 'ōg hāpxop popmā'ax pēnāhā'. ³² 'Āpu, Yop tu mō'pok, pu

Xīmām Pet xānā, ha kōnāg xexka kux tu' xip Xīmām nōy pet kopah, ha Xīmām te xoxxax hā' hām, tu' xut, tu' hīy, tu' xup, ha' nak," kaxīy. ³³Hāpxip 'ohnāg 'ihā 'āte 'āxānāhā, ha 'ānūn, hak mūg hittup. Hōnhāk mūg pip, ha Topa tek mūg pēnāhā, hak mū'āte 'ōgnū hām'āktux'ax 'āpak putup, Topa te nōm 'āxat, xa' xuktux. Kaxīy.

Pet te puknōg xop pu hāmyūmmūgāhā'

³⁴Ha Pet te hām'āktux, hu:

—Hōnhā 'āte hāmyūmmūg. Yā Topa te' xohip-tup, 'ok pe Yoneo yōg tikmū'ūn, 'ok pe' puknōg, ha Topa pu' nōy putuk. ³⁵Topa te hāmyok mīy'ax xop xohip-tup pax, ha tikmū'ūn 'ūm xohix te Topa xak, tu' kuxa te' yēy Topa keppah, puxix Topa nōm putup, ³⁶tu yāy pupi hām'āktux'ax nū'kutnāhā 'Iyaet yōg tikmū'ūn hah, tu Yeyox Kunnix nū'kutnāhā, ha Yeyox te' kuxa mām yūmmūgāhā, xix yāy kep hā' mūg'ax kama yūmmūgāhā, 'ūyiy yūmūg hittup. Yā Yeyox yūmūg xohix hāg xuxyā. ³⁷Yoām te hām'āpak max'ax 'āktux hāmāxap, tup-tox pix, tu Topa yōg hām'āktux'ax 'āktux hāpxexka Ganinet kopah, xix hāpxexka Yonex xohix kopah. ³⁸Hak-nāy tu Topa te Nāyane yōg Yeyox ha yāy Koxuk nū'kutnāhā, nūy nō ka'ogā, ha yāyhā ka'ok xe'ēgnāg, tu hāpkumep hāpxexka xohix tu', tu hāpxopmā max, tu tikmū'ūn xohix hittupmāhā, Hāmgāyāgnāg te nōm xop kummugāhā, yā Topa te Yeyox mūtik xip. ³⁹Hak mū'āte' pēnāhā Yoneo yōg hāpxexka tu', xix Yēnoyānēn kopah, pa Yoneo yōg tikmū'ūn te Yeyox putex mīpkupnix tu'. Kaxīy.

⁴⁰Tu xe:

—Pa 'āmnīy 3 nōg, 'ihā Topa te' hīnnāhā putpu', hak mū'āte' pēnāhā. ⁴¹Yāk mūg xit xi' xo'op Yeyox mūtik. 'Ap tikmū'ūn xohix te' pēnā'ah. ⁴²Ha Topa tek mūg xat, 'ū hām'āpak max'ax 'āktux, nūy tikmū'ūn xohix pu hām'āktux, nūy tikmū'ūn xohix yūmmūga', ha Topa te Yeyox putpu nū'kutnāp-tup, pu tikmū'ūn yōg hāpxopmā'ax kopit, xi' puknōg yōg, 'ūxakix xop, xi' hi xop yōg hāpxopmā'ax kopit putup. ⁴³Hōmā Topa pupi hām'āktux xop te Yeyox 'āktux, hu: "Topa te tikmū'ūn yōg hāpkummuk mīy'ax xaxogā'ax, pu tu' kux, nōm xop kuxa mām ka'ok Kunnix kopah, 'ūka'ok hah," kaxīy.

Topa Koxuk te Yoneo hā' puknōg xop ka'ogāhā'

⁴⁴'Ap Pet te hām'āktux kux'ah, 'ihā Topa Koxuk te' puknōg xop ha yīxohoh, nōm te hām'āpak ha' yīxohoh, ⁴⁵ha Yoneo yōg kuxa mam ka'ok xop te' yēy, tu: —Topa te kama' puknōg xop ha yāy Koxuk nū'kutnāhā! Kaxīy.

⁴⁶Ha' puknōg xop te yāy pu' puknōg yīy'ax hā hām'āktux, Topa te' ka'ogāhā, puyī' xuktux, nūy Topa 'āktux max nōmhā'. ⁴⁷Ha Pet te:

—'Ū 'ūm te' puknōg xop pup-tox pix'ax xat hok? 'Ak mūn'ah. Yā Topa te yāy Koxuk nū'kutnāhā' puknōg xop hah, 'ūgmūg putuk! Kaxīy.

⁴⁸Hu' xat, hu:

—Kōnāg hāp-tox pix, puyīy Yeyox yā yāy xuxyā 'āktux. Kaxīy.

Ha Kohnēn te' xak, pu tu 'āmnīy kutōgnāg hā' nox xhip yāy pet kopah, ha' nox xip.

Pet te hāpxopmā'ax 'āktux

11 ¹Ha hāpxexka Yonex kopa' pip Yeyox yōg mō'pok xop, xi' xape xop, tu' puknōg xop kuxa mām ka'ok'ax 'āpak, ²ha Pet nūn, tu nūktu xupep Yenoyanēn tu', ha' xape xop te' puknōg xop te yāyhā Yoneo hāmāxap putup, hu' mǎnōg, ³tu:

—Tep mīy xate'? Tep tu 'āxit hāmpuknōg xop mūtik, nōm te yāy xax yīmap tu' mep 'ohnāg? Kaxīy.

⁴Pa Pet te tik xop yūmmūgāhā', hu:

⁵—'Āte Topa pu hām'āktux Yop kopah, tu yāy koxuk hā' pēnāhā', ha pexkox tu topixxax xexka yīxohoh, tu' kuxyā hā' hīy, tu' nūn tu nūktu 'ūgha' nūn. ⁶'Āte' pēnā ka'ok, ha xokxop gāy xop kopa' xuk, xi' kep hā' mōg xop, xix putuxnāg, ⁷ha' yānmūn xupep'ax te: “Pet, 'āyok, nūy kix, nūy mā'!” kaxīy. ⁸Pa 'āte: “Ak mūn'ah. 'Āte' mā xet xokxop nōm mā hok xop,” kaxīy. ⁹Ha' yānān, hu: “Topa te nōm putup, yī' max,” kaxīy. ¹⁰Ha' xe yīxohoh te 3, ha pexkox tu' mōg putpu', tu yāy xaxogāhā'. ¹¹Ha Xeyanet yōg tik 3 nūn, tu nūktu mōxahā', tik puknōg te nōm mō'pok 'ā', ¹²'ihā Topa Koxuk te: “Mōy, 'āmōg, tu' yīkopit hok.” Kaxīy. Ha tak mūg mōg, nū' xape te 6 mūtik mōg, tu mōktu mōxaha tik puknōg pet tu'. ¹³Ha tik puknōg te hām'āktux, hu: “Hōmā 'āte pexkox yōg nū'kutnā'ax pēnāhā' mīptut kopah, ha' xat, hu: ‘Āpu, tik 'ūm Yop tu mō'pok, pu Xīmām Pet xānā'. ¹⁴Pet te xa Topa yōg hām'āpak'ax yūmmūgāp-tup, xix 'āxape, pu 'ākuxa mām ka'ok nōm hām'āktux'ax kopah, pu Topa 'ākuxa kummuk xit, nūy nō max tat 'ūyānān tu,' kaxīy.” ¹⁵Yīy 'āte hām'āktux, 'ihā Topa Koxuk te' puknōg xop tu' yīxohoh, 'ūgmūg putuk. Hōmā Topa Koxuk te yūmū'ā tu' yīxohoh, tu yūmū'ā tu' xip hām tu kamah. ¹⁶'Āte hāmpē'paxex. Yūmūg xuxyā te hām'āktux, hu: “Yoām tep-tox pix kōnāg hā, pa 'āte xa nū'kutnāp-tup Topa Koxuk, puyīy 'āka'ogā',” kaxīy. ¹⁷Hōmā yūmūg kuxa mām ka'ok yūmūg xuxyā Yeyox kopah, ha Topa te yūmū'ā nū'kutnāhā yāy Koxuk. Yā hōnhā' puknōg xop kuxa mām ka'ok yūmūg xuxyā kopa kamah, ha Topa te yāy Koxuk nū'kutnāhā kamah, yā' nōy putuk. 'Āte Topa mutik yāy tuk-mīy putup'ah. Kaxīy.

¹⁸Ha' mō'pok xop te' xupak, tu' mǎnōg kux, tu' yēy. Tu Topa 'āktux max, hu: —Yā Topa te' puknōg xop pu hūpmāhā', pu hāpkummuk mīy kux, nūy hi xe'ēgnāg! Kaxīy.

'Ātikit yōg xop kuxa mām ka'ok Yeyox kopah

¹⁹Tikmū'ūn te 'Extep putex Yenoyanēn tu', ha' gāy xop te' kuxa mām ka'ok xop kummugāhā', tu' xūygāhā', ha' xupmāhā hāptox tu', hāpxexka Penix tu', xix hāmīyīn yūm Xip tu', xix kōmēn 'Ātikit tu', tu hām'āpak max'ax 'āktux hā' mōg, tu Yoneo yōg tikmū'ūn pu hām'āktux, 'ap puknōg xop pu hām'āktux'ah. ²⁰Pāyā Xip yōg tihik, xix kōmēn Xinēn yōg tik mōg, tu ta' mōg, tu mōktu mōxaha 'Ātikit tu', tu hām'āktux hā' mōg, tu yūmūg xuxyā Yeyox yōg hām'āpak max'ax 'āktux Genex yōg puknōg xop pu' kamah, ²¹ha Topa

te' kuxa mām ka'ok xop mō'nīnām, tu' ka'ogāhā, ha' puknōg xop punethok kuxa mām ka'ok yūmūg xūxyā Yeyox kopah, tu hāpkummuk mīy kux.

²²Ha' kuxa mām ka'ok xop te' xupak Yenoyanēn kopah, tu mō Maname kutnāhā 'Ātikit tu'. ²³Ha ta' mōg, tu mōktu xupep 'Ātikit tu', tu Topa te nōm xop ha hāmmaxnā pēnāhā, ha' kuxa hittup xexka', tu hāmyūmmūgāhā, nūy ka'ogā, puyī' kuxa mām xe'e yūmūg xūxyā kopah, mō kuma' mōg. ²⁴Ūmax Maname', yā Topa Koxuk te' ka'ogāhā, ha' kuxa yūm ka'ok xe'e', ha' puknōg xop xohix nūktu Yeyox tu yāy kotīnnāhā.

²⁵Ha ta' mōg Maname', tu mōktu xupep Tax tu', nūy Xaot xax, ²⁶tu' xipihī, tu' nūnnāhā 'Ātikit tu', ha hāmyāxatamuk puxet hā Xaot xix Maname te' kuxa mām ka'ok xop mūtik nūn tu nū'nāhā, tu nōm xop xohix pu hāmyūmmūgāhā, ha nū mūtik yāy kotīnnāhā, ha 'Ātikit yōg tikmū'ūn te' xuxet'ax mīy kōnāmāhā, tu: “Kunnix yōg xop.” Kaxīy.

²⁷Ha Topa pupi hām'āktux xop te Yenoyanēn tu' pip, tu ta' nūn tu nūktu mōxaha 'Ātikit tu', ²⁸ha tik te Topa pupi hām'āktux 'āxet'ax 'Āg, tu' yok, tuk-nīhā' xip, tu hām'āktux, Topa Koxuk te' yūmmūgāhā, ha 'Āg te: —'Ūxit'ax nōg putup, yā hām'hōgnāg, ha putup te' kix putup tikmū'ūn xop xohix te hām xexka xohix kopa' pip. Kaxīy.

Ha hām'hōgnāg, 'īhā Kanao te Hōm yōg tikmū'ūn xat.

²⁹Ha 'Ātikit yōg kuxa mām ka'ok xop te:

—'Āpu, yūmūg tayūmak 'ūm mōgā, pu Yenoyanēn yōg xape xop pu' popmā'. Kaxīy.

³⁰Ha' mōgāhā, ha Maname xix Xaot mōg Yonex tu', nūy tayūmak mōgā tik pēnā max'ax xop pu'.

'Ūgāy xop te xe hāpkummugāhā'

12 ¹Yā 'Enot te Yoneo yōg tikmū'ūn xat, tu hāpkummugāhā, tu' kuxa mām ka'ok xop xūyghāhā, ²tu Yoām taknōy Tiak putex mīkax xexka hā. ³Ha Yoneo xop hittup, yīy 'Enot te' pēnāhā, tu xe' nōy putex putup, hu Pet mūg kamah, ha kanet ha mō'tat, 'īhā Yoneo yōg 'āmuk xexka 'āxet'ax Pām Tokatok Hok māhā.

⁴⁻⁶Ha 'Enot te Pet xix kanet kopah, ha xonat xop yāg te 4 te' pēnānā' pip, ha 'Enot te Pet putex putup hāptup 'īhā, 'āmuk xexka kux, 'īhāp-tex putup, yī' kuxa mām ka'ok xop te Topa pu hām'āktux, tu 'āmnīy tox hā Topa tu' xak, Pet pupi' xak, 'īhā Pet mō'ōn kanet kopah, ha pipkup māg xap 2 hā' hīy, ha xonat 2 te hāmyīnnīn'ax yīka' tihī, nūy pēnānā' ti'. ⁷Hāpxip 'ohnāg 'īhā pexkox yōg nū'kutnā'ax xip, ha kuyānām xexka', ha pexkox yōg mō'kutnā'ax te Pet nuhuk, tu: —'Ūpitnāy, nūy mōg mō'ka'ok! 'Āyok, nūy 'āk-nīhā xihip! Kaxīy.

Ha pipkup māg xap 2 te' yīy yāy ko'a'.

⁸Ha nū'kutnā'ax te:

—'Āxax mō'tat, tu 'āpata xax tat. Kaxīy.

Ha' tat, ha nū'kutnā'ax te:

—Kap mō'tat tu mōyāy nīy, tuk pe mōg. Kaxīy.

⁹Ha' pe' mōg, pa Pet te hāmp'e'paxex, tu yāy koxuk hā' pēnā'ax pe'paxex. ¹⁰Ha tik te xonat hā' yēn, tu' mōg, tu xonat nōy hā' yēn, ha pipkup mō'yīnnīn'ax yāy xōn, ha kōmēn kotit hā' mōg, ha nū'kutnā'ax te yāy xaxogāhā'. ¹¹Ha Pet te hāmyūmmūg, 'ap yōtkup'ah, tu:

—Topa te pexkox yōg nū'kutnā'ax nū'kutnāhā 'ūghah, pu 'Enot yōg kanet kopak xut, ha 'Enot tek xūyḡāp-tup hok! 'Ap Yoneo yōg tikmū'ūn tek xok'ax pēnāp-tup'ah. Kaxīy.

¹²Tu ta' mōg, tu hāmp'e'paxex, tu mōktu xupep Mānix pet tu', yā Yoām Mā'ak mūg tut, ha' kuxa mām ka'ok xop xohix te yāy tu nū'nāhā', tu Topa pu hām'āktux pax, tu Pet pupi hām'āktux. ¹³Ha Pet te hāptopa tu' xānāhā', hu:

—Hāpxōn! Kaxīy.

Ha kaxxop hex 'āxet'ax Hone nūn, ¹⁴tu Pet yīy'ax yūmmūg, tu' kuxa hittup xexka', hu' mōg mō'ka'ok 'ūxape xop tu', tu:

Ya' xip Pet! Kaxīy.

¹⁵Ha' kuxa mām ka'ok xop te:

—Āp-tox kummuk! 'Ap hamūn'ah! Kaxīy.

Pa Hone te:

—Hamūn! 'Āte' yīy'ax 'āpak! Kaxīy.

Tu xe' xuktux, ha' xape xop te:

—Ōhōm yā pexkox yōg nū'kutnā'ax, nōm te Pet pēnā max. Kaxīy.

¹⁶Pāyā Pet te:

—Hāpxōn, hāpxōn! Kaxīy.

Tu xe:

—Hāpxōn! Kaxīy.

Ha hāpxōn, tu' pēnāhā', tu' yēy. ¹⁷Ha Pet te' yīm nuhuk, tu:

—Āyīy hok, pu xonat xop nūn hok. Kaxīy.

Tu hām'āktux pu'uk, hu:

—Topa te hāpxopmā max, puk mūn xut. Mōg, Tiak pu hām'āktux, nūy kanet kopak xut 'āktux 'ūxape xop pu'. Kaxīy.

Tu' mōg, tu mōktu xupaha'.

¹⁸Ha hāptup ha ta xonat xop te Pet xak kanet kopah, pāyā 'ap xip'ah, ha xonat xop kuxānōg, tu:

—Pi'yā' xip Pet? Kaxīy.

¹⁹Ha 'Enot te' xat, pu tu Pet xax, ha' xak, pāyā 'a' pēnā'ah, yīy 'Enot gāy xexka', tu xonat xop mūg, tu' yīkopit, tu' kix kakixnāg, ha' xakix.

Ha 'Enot mōg, tu ta' mōg tu mōktu Xeyanet tu', tu 'āmnīy xohix hā' nox xip.

'Enot xok

²⁰Tu ta tu' gāy Tinok yōg tikmū'ūn tu', xix Xinōm yōg tikmū'ūn tu', hu 'ap hāpxop mōḡāp-tup'ah. Ha nōm tikmū'ūn kuxānōg, tu' gāy kux xak, pu 'Enot te hāpxop xe mōḡā'. Ha yāy tu nū'nāhā' 'Enot pet xexka kopah, tu 'Enot yōg kāmānat Manax yūmmūḡāhā', pu 'Enot pu nōm tikmū'ūn pupi

hām'āktux. ²¹Hāptup nōy 'ihā 'Enot te tik te' xat'ax yōg topixxax max mō'tat, tu' xat'ax yōg mīmpē' yūm'ax yīmū' yūm, nūy tu tikmū'ūn xat, tu hām'āktux tox, tu hām'āktux kux, ²²ha tikmū'ūn yīy ka'ok, tu:

—Topahnāg 'ūm yīy'ax putuk, 'ap tik yīy'ah. Kaxīy.

²³Ha hāpxip 'ohnāg 'ihā pexkox yōg nū'kutnā'ax te 'Enot kix, tu' pakutnāhā', ha puxō'ōy te' māhā', ha' xok, Topa 'āktux max 'ohnāg tu'.

²⁴Ha' kuxa mām ka'ok xop mōg hāptox tu', tu Yeyox yōg hām'āpak max'ax 'āktux, ha tikmū'ūn punethok kuxa mām ka'ok Yeyox Kunnix kopah.

²⁵Ha Maname xip Yenoyanēn tu', xix Xaot, tu' yōg hām'ax kux, tu' mōg, tu ta' mōg tu mōktu mōxaha 'Ātikit tu', tu Yoām Mā'ak mōgāhā'.

Maname xix Xaot te hāpkumep kōnāmāhā'

13 ¹Ātikit yōg kuxa mām ka'ok xop kopa' xip Topa pupi hām'āktux'ax xop, xix hāmyūmmūgā'ax xop. 'Ūxohix te: Maname', xix Xīmām Tapāyōg, xix Xinēn yōg Noxit, xix Xaot, xix Mānā'ēm. Hōmā 'Enot mūg tut te Mānā'ēm paha', ha 'Enot mūtik yāy tu tittap, tu' taknōy putuk, pāyā 'a' taknōy'ah. ²Hāptup 'ūm 'ihā nōm tik xop te Topa pu nūktettex, tu' kuxa te' yēy, tu' xit hok, nūy Topa pu hām'āktux, ha Topa Koxuk te:

—Āte Maname yāykutnāhā, xix Xaot yāykutnāhā', tu nōm xānāhā', pu tu hāpxopmā', nūy hām'āpak max'ax 'āktux hāptox tu'. Kaxīy.

³Ha' xohix te Topa pu hām'āktux, hu' xit hok, tu Maname putox yīmū' yīm xex, xix Xaot, tu hāptox tu mō'pok.

Tu Xip tu' tihī'

⁴Topa Koxuk te mō Maname kutnāhā', xix Xaot, ha' mōg tu mōktu mōxaha kōmēn Xeneo tu', tu mīpkox hā' mōg, nōm mīpkox te kōnāg yīmū' mōg, tu mōktu mōxaha hāmyīn yūm Xip tu', ⁵tu ta' mōg, tu mōktu mōxaha kōmēn Xanamīn tu', tu Topa yōg hām'āktux'ax 'āktux Yoneo yōg Topa pet kopah, ha Yoām Mā'ak te mō'nīynām. ⁶Tu ta' mōg hāmyīn yūm tu', tu mōktu mōxaha kōmēn Pap tu'.

Ha Yoneo yōg tik yā' xut mīhīm, 'ūxuxet'ax Mayeyox, tu Topa pupi hām'āktux'ax putuk, pāyā mō'āmā'. 'A' max'ah Mayeyox. ⁷Tu tik nōy mutik xip, 'āxet'ax Xet Paot, tu Xip yōg tikmū'ūn xat, tu hāmyūmmūg xexkah, tu Maname tu' xānāhā xix Xaot, nūy Topa yōg hām'āktux'ax 'āpax max. ⁸Ha Mayeyox 'āxet'ax nōy 'Enip, ha tikmū'ūn yīy'ax hā: “Ūxut mīhīm,” kaxīy. Tutep-tup nōg, tu Xet Paot xut putup, puyīy Topa yōg hām'āktux 'āpax hok. ⁹Ha Xaot 'āxet'ax nōy yā Paot kamah, ha Topa Koxuk te' ka'ogāhā', yīy mīm pēnā ka'ok, ¹⁰tu:

—Āmūn yā Hāmgyāgnāg yōg. 'Ākuxa kummuk, yā hāmmax hā 'āpuknōg. Xate koit pax. Topa te' yōg putat yok mīy, pāyā xate' kohe' mīy. Paxīp! 'Āhup! ¹¹Hōnhā Topa te 'ākix, ha hāpxip kutōgnāg 'ihā xate hāmpēnā hok putup, tu 'āmīy xohix hā māyōn 'ūm pēnāp-tup 'ohnāg. Kaxīy.

Ha hãpxip 'ohnãg 'ihã hãmpẽnãmnok, tu' pa hok, tu tikmũ'ũn xak, puyi' yĩm hã' mõgã', ¹²Ha Xet Paot te Topa yõg hãpxopmã'ax ka'ok xe'ëgnãg pẽnãhã', hu' kuxa yũm ka'ok Yeyox kopah, tu Topa yõg hãmyũmmũgã'ax 'ãpak, tu' yẽy.

Tu hãpxexka Pixit yõg kãmẽn 'Ãtikit tu' tihì'

¹³Ha kãmẽn Pap tu' tihì', ha ta' mõg Paot xi' xape xop, tu mĩpkox hã' mõg, tu mõktu mõxaha hãpxexka Pãnpit yõg kãmẽn Pehek tu', tu mĩpkox hã' mõg 'ũxeheh, pa Yoãm Mã'ak te' nĩm, tu putpu' mõg, tu mõktu' xupep Yenoyanẽn tu'. ¹⁴Ha ta' mõg Maname xix Paot, Pehek tu' pip, tu' mõg, tu mõktu mõxaha hãpxexka Pixit yõg kãmẽn 'Ãtikit tu', tu Yoneo yõg Topa pet hã' mõxakux, nit xap 'ihã', ha Yoneo xop yõg hãptup xe'e', ha' mãm, ¹⁵ha Yoneo yõg tik te Mõyyex yõg xat'ax mõ'kupix, xix Topa pupi hãm'ãktux xop yõg tappet mõ'kupix, tu mõ'kupix kux, ha Topa pet yõg tik te' nõy xat, te:

—'Ûgnõy xop, 'ãyĩy, nõy 'õgnũ hãm'ãktux hã tikmũ'ũn ka'ogã'. Kaxiy.

¹⁶Ha Paot tek-nĩhã' xip, tu' yĩm xix, pu' nõy tu: "Ïy hok!" kaxiy. Tu hãm'ãktux, hu:

—'Iyaet yõg tihik, xik nõy xop, nõm te Topa xak, nõm kuxa te' yẽy Topa keppah, 'ũg 'ũm 'ãpax: ¹⁷Hõmã hãmyãxatamuk punethok hã, 'Ïyaet yõg Topa te mõnãyxop hittap yĩmõgatux, tu 'Iyaet yõg tikmũ'ũn xexkanãhã hãpxexka 'Eyit kopah, tu' puknõg yõg hãpxexka tu' mõy, tu yãy yõg ka'ok'ax hã' mõy. ¹⁸Ha tikmũ'ũn max 'ohnãg, pãyã hãmyãxatamuk te 40 hã Topa te hãpkummuk mĩy'ax xop hã' tot, hãm panip xexka tu nõ'ãtot, tu mõ'nĩynãm, tu' nĩm 'ohnãg, ¹⁹tu' puknõg hep xop te 7 kix hãpxexka Kãnã'ãg kopah, tu' yõg hãm pop, tu tikmũ'ũn pu' hõm, pu tikmũ'ũn mõkputox xohix pi' ²⁰hãmyãxatamuk te 450 hã.

Ha hãmyãxatamuk te 450 nõg, ha Topa te tikmũ'ũn pa te hãmyũmmũg ka'ok xop yĩmõgatux, puyiy tikmũ'ũn xat, xix Topa pupi hãm'ãktux'ax Xãmõ'eo yãykutnãhã, puyi' xat. ²¹Pa tikmũ'ũn te tik te' xat xexka xak, ha Topa te Xao yãykutnãhã, yã Meyamĩy yõg Kix kutok pit, ha' xexkanãhã', tu tikmũ'ũn pu' hõm, ha hãmyãxatamuk te 40 hã Xao mũn te 'Iyaet yõg tikmũ'ũn xat. ²²Ha Xao xok, ha Topa te Namix yãykutnãhã', puyiy tikmũ'ũn xat, tu hãm'ãktux, hu: "Ãte Namix putup pax, tuk kuxa hittup Yexe kutok pit hã. Yã' max. 'Ãte' xat, ha' mĩy." kaxiy. ²³Ha Namix mõkputox yã Yeyox, ha Topa te 'Iyaet yõg tikmũ'ũn ha nũ'kutnãhã', pu tikmũ'ũn kuxa kummuk xit, nõy kuxa max mõ'tat 'üyãnãn tu'. ²⁴Yoãm nũn hãmãxap, tup-tox pix, tu 'Iyaet yõg tikmũ'ũn xohix pu hãm'ãktux, hu: "Ãpu, yãyhãhup, nõy hãpxop kummuk mĩy kux," kaxiy. ²⁵Pãyã Yoãm te hãpxopmã kux, tu: "Tep kunãy tu hãmpel'ãpaxex? 'Ak mũn yã Topa yõg hãmyãykutnã'ax'ah, pa' nõy tek pe' nũn putup, nõm 'ũm xexka xe'ëgnãg. 'Ãte yã kopaxux hãk yũm putup, nõy tu pataxax koal, pãyãk kutõgnãg, hu yãyhãhup." Kaxiy.

²⁶Yã Paot te xe:

—'Ûgnõy mũnõm xop, 'Amanãm mõkputox, xix nõm nõy xop te Topa xak, nõm kuxa te' yẽy Topa keppah: Topa te hãm'ãpak max'ax nũ'kutnãhã 'ãhah. ²⁷Pãyã

Yenoyanên kopa tihi tikmũ'ûn te hãmyũmmũg 'ohnãg, xi' yõg xexka xop, ha nit xap xohix 'îhã Topa pet ha' mõg, Yoneo xop yõg hãptup xe'e 'îhã' mõg, tu Topa yõg tappet mõ'kupix'ax 'ãpak, pãyã' yîpkox 'ohnãg, hu Yeyox putup nõg. Hõmã Topa pupi hãm'ãktux xop hittap te Yeyox xok'ax 'ãktux, ha hõnhã Yoneo yõg tikmũ'ûn gãy xop tep-tex, Topa yõg hãm'ãktux hittap hãp-tex. ²⁸Yã' gãy nãm Yeyox tu', tu Pinat tu' xak, pu Yeyox putex, pãyã Yeyox te hãpkummuk 'ûm mÿ 'ohnãg. ²⁹Ha hõmã, Yeyox mûg tut te nõm put 'ohnãg, 'îhã Topa pupi hãm'ãktux xop te Yeyox xũy'ax kax'ãmi', tu tappet tu' kax'ãmi', ha hõnhã Yoneo yõg tikmũ'ûn te Yeyox putex mîpkupnix tu', Topa yõg hãm'ãktux hittap hãp-tex, ha mîpkupnix tu' xut, tu nõ hãpkot. ³⁰Pa Topa te' putpu' hînnãhã', ³¹ha 'ãmnÿ xohix hã' mõg, ha' xape xop te' pãnãhã', nõm te hãmyãxatamuk 3 hã hãpkumep Yeyox mütik, tu Ganinet tu' pip hãmãxap, tu' nũn, tu nũktu Yenoyanên tu', tu Yeyox putpu hi yã' pãnãhã', nũy tikmũ'ûn nõy pu hãm'ãktux.

³²—Hak mũ'ãte hãm'ãpak max. 'ax xa nũnnãhã'. Hõmã Topa te yũmũg mõnãyxop pu hãm'ãktux xex, ³³tu hõnhã' mÿ Yeyox hînnã'ax hã, ha hõmã Topa te hãm'ãktux xex, ha Topa yõg hãm'ãktux'ax kax'ãmi 'ũktex yõg tappet 2 kopah, hu:

“ãmũn yã 'ũgkutok.

Hõnhã 'ãte 'ãmũn yãg kutok 'ãktux.” Kaxÿ.

³⁴—Tu Yeyox kutox 'ohnãg 'ãktux, tu putpu' hi 'ãktux, hu:

“Hõmã 'ãte Namix pu hãm'ãktux xex, nũy tu hãmmaxnã xe'ëgnãg.” Kaxÿ.

³⁵Tu xe hãm'ãktux, hu:

“Xatek hep kutox putup'ah, tu' tux hok puk hep kutox hok, 'ũgmũn yã 'õg kãmãnat max xe'ëgnãg hah.” Kaxÿ.

³⁶Tu xe:

—Ha Namix te Topa pu hãpxopmãhã', tu hãpxopmã kux, tu' xok, ha mõnãyxop mütik nõ hãpkot, hak-tox, ³⁷pãyã Topa te Yeyox hînnãhã putpu', 'ak-tox'ah. ³⁸Ûnõy mũnõm xop, 'ãte xa hãmyũmmũgãp-tup: Topa te 'õg hãpkummuk mÿ'ax xaxogãp-tup, tu Yeyox puxet hã' xaxogãp-tup, pu tu' kux. ³⁹Tikmũ'ûn kuxa yũm ka'ok Yeyox kopah, puxix Topa nõm hãpkummuk mÿ'ax xaxogã', pu tu' kux. Mõyyex yõg xat'ax hittap pu'uk, tu hãpkummuk mÿ'ax 'ûm xaxogã hok, pãyã Yeyox ka'ok. ⁴⁰Õg pa mõxip! 'Ãyîpkox pip, nũy Topa gãy'ax pãnã hok, ha Topa tappet te:

⁴¹“Nãy, xa hip, 'ãxop yîxix kummuk xop, 'ãxop kuxa mãm 'ohnãg xop. 'ãpu 'ãkuxa yëy, nũy yãy xaxogã', ha' kux.

Hõnhã 'ãte hãpxopmãp-tup,

ha tik 'ûm te xa hãm'ãktux'ax,

pãyã 'ãkuxa mãm 'ohnãg. 'Ûkux. Kaxÿ.”

⁴²Tu hãm'ãktux kux, ha tikmũ'ûn te Paot tu' xak, pu nit xap nõy 'îhã hãm'ãktux 'ũxeheh. Tu' mõg. ⁴³Ha Yoneo yõg tikmũ'ûn punethok yîpkox pip, xi' puknõg te Topa xak xop, nõm te Yoneo xop hã' mõxakux,

tu Paot pe' mōg, xix Maname', nūy hām'āktux'ax 'āpax, ha tikmū'ūn yūmmūgāhā', puyi' kuxa mām ka'ok xe'ēgnāg Yeyox kopah.

⁴⁴Ha nit xap nōy 'īhā kōmēn 'Ātikit yōg tikmū'ūn xohix te yāy tu nū'nāhā', nūy Topa te hām'āktux 'āpax, ⁴⁵ha Yoneo xop te' xohix pēnāhā', tu' yīpkumīy, tu Paot mānōg, hu:

—Paot te mō'āmā', yā' kummuk. 'Ūxupax hok. Kaxīy.

⁴⁶Pa Paot te hām'āktux ka'ok xix Maname', tu' yīpkutuk 'ohnāg, tu:

—Hōmā Topa tek xat, hu: “Āpu, yōgnū hām'āktux'ax 'āktux Yoneo xop pu hāmāxap,” kaxīy. Pāyā 'āyīpkox 'ohnāg, tu 'ākuxa hi xe'ēgnāg putup nōg, yīk mūg mōg hāmpuknōg xop hah, 'ūyiy hām'āpak max'ax 'āpax, nūy yīpkox pi', nūy kuxa mām ka'ok Yeyox kopah. ⁴⁷Ūgmūg xuxyā tek xat, hu: “Āte mō'āpok pu' puknōg xop pu hāmyūmmūgā', xa' hittupmā', nūy nōm xop pu Topa yōg hām'āpak max'ax 'āktux, xix hāpxexka xohix yōg xop pu hām'āktux, 'ūyiy tikmū'ūn kuxa kummuk xit, nūy kuxa max tat 'ūyānān tu',” kaxīy. 'Ūkux.

⁴⁸Ha' puknōg xop te hām'āpak, tu' kuxa hittup, tu Topa yōg hām'āktux 'āktux max. Hōmā Topa te nōm yīmōgatux, pu' kuxa tu mām ka'ok Yeyox kopah, nūy hi xe'ēgnāg mō'kuma' mōg.

⁴⁹Ha Topa yōg hām'āktux'ax 'āktux hāpxexka xohix tu', ⁵⁰pāyā Yoneo xop te Yoneo xexka xop xix 'ūn xexka xop pu hām'āktux, hu:

—Āpu, tik kummuk xat, pu mōg hāptox tu'. Kaxīy.

Ha 'ūn xop te Paot putup nōg, xix Maname', tu' xat, pu mōg hāptox tu'. ⁵¹Ūmōg, tu hāmnak ha pataxax mōy, tuk-to'ok, pu hāpkōnōn nūnnāy, nūy Yoneo xop yōg hāpkummuk mīy'ax 'āktux. Tu' mōg, tu mōktu mōxaha kōmēn 'Ikōn tu', ⁵²ha' kuxa mām ka'ok xop kuxa hittup xe'ēgnāg, yā Topa Koxuk te' ka'ogāhā'.

Tu 'Ikōn tu' tihī'

14 ¹Tu kōmēn 'Ikōn tu' tihī', tu Topa pet hā' mō'nāhā', tu hām'āktux max, yīy Yoneo yōg tikmū'ūn xohix xexka', xix Genex yōg puknōg xop xohix xexka kuxa mām ka'ok Yeyox kopah. ²Pa Yoneo yōg tik 'ūm kuxa mām 'ohnāg, tu' kuxa mām xop putup nōg, hu' kummuk 'āktux 'ūpuknōg xop pu', nūy gāyā'. ³Ha 'āmnīy punethok hā' tihī', tu yūmūg xuxyā 'āktux, tu' xuxyā te hāmmaxnā 'āktux, yā hāpxe'e 'āktux, ha Yeyox te mō'pok xop yōg hām'āktux putup, hu' ka'ogāhā', puyiy hāpxopmā ka'ok xe'ēgnāg, pu tikmū'ūn xohix pēnā'. ⁴Ha tikmū'ūn te hāmpē'panōm, ha' yāg te: “Yoneo xop mūn max,” kaxīy. Ha' yāg nōy te: “Hamūn'ah. Pāyā Yeyox yōg tik xop mūn max,” kaxīy.

⁵Ha' puknōg xop xix Yoneo xop xi' yōg xexka xop te mō'pok xop kummugāp-tup, tu mīkaxxap xexka hā' tux putup, nūy kix, ⁶ha' xupak, tu nū'paha', tu mōktu mōxaha hāpxexka Nikōn yōg kōmen Nixtat tu', xix kōmēn Nep tu', xix hām yīmap tu', ⁷tu Yeyox yōg hām'āpak max'ax 'āktux.

Tu kômên Nixtat xix kômên Nep tu' tihî'

⁸Ha Nixtat kopa' xip tik 'ûm te hâpkumep 'ohnâg, ha hâmyâxatamuk xohix hâ' mōg 'ohnâg, 'ûhi'ax tox hâ, yâ' yûm ka'ok, ⁹tu Paot yōg hâ'm'âktux'ax 'âpak, tu' kuxa yûm ka'ok 'ûhittupmâ'ax kopah, ha Paot te' pênâ ka'ok, tu' nôy kuxa yûm ka'ok pênâhâ', ¹⁰tu' yîy ka'ok, tu:

—'Âk-nihâ xihîp! Kaxîy.

Ha' yok, tuk-nihâ' xip mō'ka'ok, tu' mōg kônâmâhâ nômhâ, tu hâpkumep. ¹¹Ha tikmû'ûn te' pênâhâ', tu' yîy ka'ok, tu hâ'm'âktux Nikôn yîy'ax hâ, hu:

—Yâ topahnâg te mōxaha', tu tikmû'ûn mûtik yây putuk! Kaxîy.

¹²Tu Maname pu' mîy 'ûxuxet'ax nôy, hu: “Yop”, xix Paot pu', hu: “Mêkot”, hâ'm'âktux punethok hah. ¹³Ha topahnâg Yop yōg 'âmânex nûn, ha topahnâg pet te kômên kunâpa' yûm, ha mûnûytut pit nûnnâhâ', xix mînnut max, tu hâmp'e'paxex, hu: “Nôm tik 2 yâ topahnâg, ha 'âte mûnûytut pit kix putup, nûy nôm topahnâg 2 pu mō'hap, nûy haxyâ', nûy heyah Nixtat yōg tikmû'ûn mûtik,” kaxîy. ¹⁴Pa tik nôy te mō'pok xop pu' xuktux, ha' xupak, hu yây tu topixxax pot, nûy kuxa hittup 'ohnâg 'âktux, tu tikmû'ûn ha' mōg, tu' yîy ka'ok, tu:

¹⁵—'Âhup! Putep mûn mîy putup? 'Ak mûn yâ Topa'ah, yâk mûn tihik, 'âxop putuk, tu hâ'm'âpak max'ax ha xa' nûnnâhâ', xa 'ânîm hâpxop 'ûm 'âyîm hâ' mîy, nûy heyah, xa Topa xe'êgnâg xax, yâ' hi xe'êgnâg, nôm te hâmnôgnôy mîy, xix hahâm, xix kônâg xexka', xix hâpxop xohix kopa' pip. ¹⁶Hômâ tikmû'ûn xop xohix te hâpxopmâ xohix, 'ap Topa te' kuxyâ'ah, pa' tux hok pu mîy, nûy yây putat hâ' mōg, ¹⁷ha xa' nû'kutnâhâ tehex, xayîy hâpxop ta nûnnây 'âpet hah, nûy 'âxit, nûy 'âkuxa hittup. Kaxîy.

¹⁸Ha Paot te Nixtat yōg tik xat hok, pu mō'hap hok yây pu', xix Maname pu', nûy heyah. ¹⁹Ha 'Âtikit yōg Yoneo xop nûn, xix 'Ikôn yōg xop, tu Nixtat yōg tikmû'ûn pu hâ'm'âktux, tu' gâyhâ Yeyox yōg mō'pok xop hâ', ha tikmû'ûn te mîkaxxap xexka tux punethok, nûy Paot putex, ha hâ'm tu' nâhâ', tu' xok putûmnâg, ha tikmû'ûn te Paot hâ'm manit ha' mōg, tu kômên kotit hâ' xut, tuk-nâpa' mōg, tu hâmp'e'paxex, hu: “Nômhâ' xok xe'e!,” kaxîy. ²⁰Pa' kuxa mâm ka'ok xop te yây tu nû'nâhâ', tu Paot yîmap hâ' pip, ha Paot yûm, tu' yok, tuk-nihâ' xip, tu' xupep putpu kômên tu', tu hâptup 'ihâ Maname mûtik mōg, tu mōktu mōxaha Nep tu'.

Tu Xit xix 'Âtikit ha putpu' mōg

²¹Tu Yeyox yōg hâ'm'âpak max'ax 'âktux, ha Nep yōg tikmû'ûn punethok kuxa mâm ka'ok Yeyox kopah, ha hâ'm'âktux kux, ha putpu' mōg, tu mōktu mōxaha Nixtat tu', tu' mōg tu mōktu mōxaha 'Ikôn tu', tu' mōg, tu mōktu mōxaha 'Âtikit tu'. ²²Tu hâ'm'âktux xe'e', tu hâmyûmmûgâhâ', puyî' ka'ogâ', nûy kuxa mâmmâ ka'ok Yeyox kopah, ha hâ'm'âktux, hu:

—Nôm xop te Yeyox pu yîpkox pip, puxi' xûy'ax hâ' tot, 'ihâ pexkox ha' mōg. Kaxîy.

²³Ha Paot te tik pēnā max xop yīmōgatux, 'ūkuxa mām ka'ok xop xohix kopa' yīmōgatux, tu' xat, pu' nōy xop pēnā max, nūy tu xeh, ha Topa pu hām'āktux, hu' xit hok hā hām'āktux, tu' pēnā max xop pu:

—'Ākuxa mām ka'ok Topa kopah. Pūyā hōnhā Topa 'āmōgā', xix 'āpēnā', xix 'ānīm hok! Kaxīy.

²⁴Tu ta' mōg, Pixit kotit hā' mōg, tu mōktu mōxaha Pānpit tu'. ²⁵Tu' mōg, tu mōktu mōxaha Pehek tu', tu Topa yōg hām'āktux'ax 'āktux, tu' mōg, tu mōktu mōxaha 'Atat tu', tu hāpxopmāhā', tu yā' kux, ²⁶tu mīpkox hā' mōg, nōm te kōnāg yīmū' mōg, ha mōktu mōxaha hāpxexka Xit yōg kōmēn 'Ātikit tu putpu', nūy Topa yōg hāpxopmā'ax ka'ok xe'ēgnāg 'āktux, nūy kuxa mām ka'ok xop pu' xuktux. Hōmā 'Ātikit yōg kuxa mām ka'ok xop te Topa tu' xak, pu Paot pēnā max, xix Maname pēnā max, ha mō'pok, pu hām'āpak max'ax 'āktux kōmēn xohix tu', tu' mōg tap, tu hāpxopmāhā', tu ta putpu' nūn 'ūxeheh. ²⁷Ha 'Ātikit tu' mōxaha', tu' kuxa mām ka'ok xop xānāhā', ha' nūn tu nūktu nū'nāhā', ha tik te hām'āktux, tu Topa yōg hāpxopmā'ax xohix 'āktux, tu Topa te' puknōg xop pu yāy yōg putat yok mīy 'āktux, tu' puknōg kuxa mām ka'ok Yeyox kopa 'āktux. ²⁸Tu 'āmnīy xohix hā' nox ti kuxa mām ka'ok xop mūtik 'Ātikit kopah.

Tu Kōmēn Yenoyanēn xop mūtik yāykotīnnāhā'

15 ¹Hāpxip kutōgnāg 'īhā Yonex yōg tikmū'ūn nūn, tu nūktu mōxaha 'Ātikit tu', tu' nōy xop yūmmūgāhā', hu:

—'Āxop yā puknōg. 'Āpu, tik xop nāg xax mep 'ūyīmap, puyīy Topa 'āxop kuxa kummuk xit, nūy 'ākuxa max tat 'ūyānān tu'. Mōyyex yōg xat'ax hittap te 'āxat, yīy hōmā xix hōnhā, hāmyāxatamuk xohix punethok hā, Yoneo tik xop xohix te' mīy, yā kakxop pit 'īhā' mīy. Kaxīy.

²Pa Paot xix Maname te:

—Kaxīy hok! 'Āmhok! Topa te' puknōg xop xat 'ohnāg, pu yāy xax xak. Kaxīy.

Tu hām'āktux hā' nōy yānān nām punethok, ha' kuxa mām ka'ok xop te Paot xix Maname yīmōgatux, tu mō'pok, xix 'Ātikit yōg nōy xop mō'pok, pu' mōg Yenoyanēn tu', nūy Yeyox yōg tik xop yīkopit, xix tik pēnā max xop yīkopit. ³Tu ta' mōg, Penix kotit hā' mōg, xix Xāmānit kotit hā' mōg, tu' puknōg xop te Topa ha' mōg 'āktux, ha' kuxa mām xop xohix hittap xexka'. ⁴Ha mōktu mōxaha Yeyoyanēn tu', ha' kuxa mām ka'ok xop hittap xexka kamah, xix Yeyox yōg mō'pok xop, xix tik pēnā max xop, ha Paot te Topa yōg hāpxopmā'ax 'āktux, Topa te hāpxopmā Paot hā, xix Maname hā, yī' xuktux. ⁵Pa Paniye yōg kuxa mām ka'ok xop tek-nīhā' pip, tu:

—Topa te' xat, pu tik xop nāg xax yīmap mep. 'Āpu, hāmpuknōg yōg tik xop xax mep kutōgnāg, nōm xop kuxa mām ka'ok Yeyox kopah, puyīy Mōyyex yōg xat'ax hittap xohix pu' yīpkox pi'. Kaxīy.

⁶Ha mō'pok xop, xix tik pēnā max xop nūn, tu nūktu nū'nāhā', nūy hāmpē tu pānōm. ⁷Tu hām'āktux hā' nōy yānān nām, ha Pet tek-nīhā' xip, tu:

—'Ūkxape xop: Hōmā Topa tek yāyknāhā 'āxop kopah, 'āxop te' yūmmūg, ha mōgknāhā, 'ū hām'āpak max'ax 'āktux hāmpuknōg xop pu', ha' puknōg xop te hām'āpak, tu' yīpkox pip, tu' kuxa mām ka'ok Yeyox kopah. ⁸Topa te tikmū'ūn xop kuxa yūmmūg, tu Topa Koxuk nū'kutnāhā' puknōg xop hah, 'ūgmūg putuk, ⁹ha' puknōg xop te Yoneo yōg tikmū'ūn mūtik yāy putuk Topa pu', tu' kuxa mām ka'ok Yeyox kopah, ha Topa te' yōg hāpkummuk mīy'ax xaxogāhā', pu tu' kux. ¹⁰Tep tu 'ākuxa mām 'ohnāg Topa yōg hāpxopmā'ax kopah? Mōyyex yōg xat'ax xohix tox xexka', yūmūg'āte yāy yūmmūgā hok, 'ap mīy yūmmūg'ah, xix mōnāyxop te' mīy hok kamah. Tep tu 'āxop te' puknōg xop xat, 'ihāg mū'āte Mōyyex yōg xat'ax xohix mīy hok? 'Ap max'ah nūhu'. ¹¹Pāyā yūmūg xuxyā Yeyox te' hok hā hāmmaxnāhā', tu yūmūg kuxa kummuk xit, xi' puknōg xop kuxa kummuk xit kamah, nūy yānān tu' kuxa max tat, yā yāy putuk. Yūmūg xuxyā Yeyox te' hok hā' yānān, nōm xop kuxa mām ka'ok nōm kopah. Kaxīy.

¹²Ha tik xop yīy 'ohnāg, yīy Maname yōg hām'āktux'ax 'āpak, xix Paot yōg, ha Topa te hāpxopmā xe'ēgnāg, puyī' puknōg xop pēnā', ha tik mō'pok'ax te' xuktux, ¹³tu hām'āktux kux, ha Tiak te:

—'Ūkxape xop, 'ūg'āpax: ¹⁴Xīnām te xa hām'āktux, hu: “Topa te' puknōg xop mō'yāy xe'ēgnāg, tu 'ā' hāmyūmmūgāhā hāmāxap, tu nōm xop yīmōgatux hāmpuknōg xop kopah, ha yāyhā Topa yōg tikmū'ūn,” kaxīy. ¹⁵Hōmā tik hittap te Topa pupi hām'āktux kamah, hu:

¹⁶⁻¹⁸“Hōmā, hāmyāxatamuk xohix 'ihā, Topa te hām'āktux, hu:

'Hōmā 'āte mōnāyxop Namix xexkanāhā',
 ha' yōg tikmū'ūn tek xak,
 ha hōnhāk nūn putup,
 tu Namix mōkputox puxet xexkanāp-tup, puyī' hep xohix xop 'ūk xax,
 ha 'āte nōm puknōg xop mō'yāy xe'ēgnāg,
 tu' nōy yāy, nūy yāy 'āxet'ax mīy yōgnū tikmū'ūn,' ” kaxīy. 'Ūkux.

¹⁹Ha Tiak te xe hām'āktux, hu:

—'Āte 'āpekpaxex. Yā' max hāmpuknōg xop kuxa mām ka'ok xop te Yoneo yōg xat'ax mīy hok, xix mōnāyxop yōg hāpxopmā'ax tat hok kamah, nūy kuxa mām puxehnāg Yeyox kopah. ²⁰'Āpu, yūmū'āte tappet kax'āmi' kuxa mām ka'ok xop pu', nūy tu' xat hok, pu' mā hok topa komut xop xit'ax, xix xok xop 'ūm māy mūg tup-tex mā hok, xix xokxop hep 'āta mā hok, xi' nōy hā' xupxet hok. ²¹Yā nit xap xohix 'ihā Yoneo xop te Mōyyex yōg xat'ax mō'kupix Topa pet kopah, tu Mōyyex te hām'āktux 'āktux kōmēn xohix kopah. Yā' puxi'. 'Ūkux. Kaxīy.

Tu tappet tu kax'āmi'

²²Ha mō'pok xop, xix tik pēnā max xop, xi' kuxa mām ka'ok xop xohix te Tiak yōg hām'āktux'ax 'āpak, tup-tox puxet, hu tik 2 yīmōgatux, pu Paot xix Maname mūtik mōg, tu 'Ātikit tu mō'pok, ha tik 2 'āxet'ax Yot Maxamax, xix Xinax, ha' xape xop tep-tup pax, tu nōm pe'paxex max. ²³Ha kax'āmi' kuxa mām ka'ok xop pu', tu tik hā mō tappet kutnāhā', ha tappet tu kax'āmi', hu:

“Yeyox yōg mō'pok xop xix tik pēnā max xop te 'āneo, 'ūkxape xop pu 'āneo, 'Ātikit yōg kuxa mām ka'ok xop, xix Xit yōg kuxa mām ka'ok xop, xix Xinix yōg kuxa mām ka'ok xop pu 'āneo.

²⁴Ūgmū'āte' nōy xop yōg hām'āktux'ax 'āpak, nōm te nūnte' tihi', tu 'āhā' mōg, tu 'āxat, hu: 'Āpu, tik xop xohix yāy xax mep kutōgnāg, pu Topa 'ākummuk mīy'ax xaxogā 'ūyānān tu,' kaxīy. Ha 'ākuxa hittup 'ohnāg. 'Ak mū'āte nōm Yoneo tik xop mō'pok'ah, 'ak mūn te 'āxat'ah. ²⁵Hu hōnhāk mū'āte xohix te tik 2 yīmōgatux, pu xa mō'pok, ha Paot, xix Maname mūtik mōg. 'Āxohix te Paot putup pax, xix Maname', tu nōm pe'paxex max. ²⁶Yā' hi Yeyox tu', yā yāy xuxyā', yīy xe yāy yōg'ah. Yeyox te' xat, pu mōg, ha' mōg, 'ok pe' hi', 'ok pe' xok. ²⁷Hak mū'āte Xinax mō'pok, xix Yot, ha xa' xohix hāmyūmmūgāp-tup. ²⁸Ha Topa Koxuk te 'āxat hāmāxap, hak-nāy tuk mū'āte, hu: ²⁹Ūmā hok topa komut xop xit'ax, xix xokxop 'ūm māy mūg tup-tex mā hok, xix xokxop hep 'āta mā hok, tu 'ānōy hā xupxet hok. Puxi', yā' max. Ha' kux.” Kaxīy.

³⁰Ha ta' mōg tik xop, tu mōktu mōxaha 'Ātikit tu', ha' kuxa mām ka'ok xop te yāy tu nū'nāhā', nūy mō'pok yōg tappet mō'kupix, ³¹tu mō'kupix kux, ha' kuxa hittup xexka'. ³²Ha Yot xix Xinax yā Topa pupi hām'āktux xe'e', tu' xape xop ka'ogāhā'. ³³Āmnīy kutōgnāg 'īhā' tihi', tu putpu' mōg, tu mōktu mōxaha Yenoyanēn tu'. ³⁴Pa Xinax mōg'ah, tu' nox xip 'Ātikit tu'.

³⁵Ha Paot xip 'Ātikit tu', xix Maname', tu' nox tihi', tu hāmyūmmūgāhā', nūy Topa yōg hām'āktux'ax 'āktux, 'ūnōy xop mūtik.

Paot xix Maname te yāy xatat

³⁶Ha 'āmnīy punethok nōg, ha Paot te Maname pu hām'āktux, hu: —'Āpu, yūmū mōg putpu', nūy xape xop xohix pēnā', nūy kōmēn xohix kopa' pēnā', nūy Topa yōg hām'āktux'ax xe 'āktux. Kaxīy.

³⁷Ha Maname te Yoām Mā'ak mōgāp-tup, ³⁸pa Paot tep-tup nōg. Hōmā Yoām Mā'ak te' nīm Pānit tu', tu hāpxopmā 'ohnāg. ³⁹Ha Paot te hām'āktux hā' nōy yānān Maname mūtik, tu' gāy, ha Maname gāy, tu yāy xatat, ha Maname te Yoām Mā'ak mōgāhā', tu' mōg, tu mīpkox hā' mōg, nōm te kōnāg xexka yīmū' mōg, tu mōktu mōxaha hāmyīn yūm 'āxet'ax Xip tu'. ⁴⁰Pa Paot te Xinax yāykutnāhā pu mōg, ha' nōy xop te:

—Pūyā Topa 'āmūtik mōg. Kaxīy.

⁴¹Ha' mōg, tu Xit kotit hā' mōg, xix Xinit kotit hā' mōg, tu' kuxa mām xop ka'ogāhā'.

Tīmōn te Paot mūtik mōg, xix Xinax

16 ¹Tu' mōg, tu mōktu mōxaha kōmēn Nep tu', xix kōmēn Nixtat tu', ha tik 'ūm xip, 'ūxuxet'ax Tīmōn, tu' kuxa yūm ka'ok Yeyox kopah, tu' mūg tut Yoneo hex, pāyā' tak Genex yōg, tu Yoneo xop hā' puknōg. ²Ha Nixtat tu' pip xape xop te Tīmōn putup pax, xix 'Ikōn yōg xop te', ³ha Paot te' mōgāp-tup yāy mūtik, hu' nōy yāy xax yīmap xak kutōgnāg, nūy Yoneo

xop gāyā hok, yā' xohix te Tīmōn mūg tak yā' puknōg yūmmūg. ⁴Ha ta' mōg kōmēn tu', tu Yeyox yōg mō'pok xop, xix Yenoyanēn yōg tik pēnā max xop pupi hāmyūmmūgāhā', tu' xape xop pu hāmyūmmūgāhā', ⁵Ha' xape xop kuxa mām ka'ok Yeyox kopah, 'ihā' xohix nōy nā' mōg.

Tik xop te kōmēn Tonot ha' mōg

⁶Ha ta' mōg, tu mōktu hāpxexka Pinik kotit hā' mōg, xix hāpxexka Ganax kotit hā' mōg, ha Topa Koxuk te hām'āktux xat hok, hu:

—'Ax yōg kōmēn kopa hām'āktux hok! Kaxīy.

⁷Ha ta' mōg, tu mōktu mōxaha Mīy tu', tu' mōg putup Mitīn tu', pa Yeyox Koxuk te' xat hok, pu mōg hok. ⁸'Ap mōg'ah, tu Mīy hā' yēn hā' mōg, tu mōktu Tonot tu' mōxaha'. ⁹Ha 'āmnīy hā Paot te yāy koxuk hā hāpxexka Māxenōn yōg tik pēnāhā', hak-nīhā' xip, tu Paot tu' xak, hu:

—Mā'! Māxenōn tu 'ānū', nūy mōy 'ūgmūg nīynām. Kaxīy.

¹⁰Hāpxip 'ohnāg 'ihā Paot koxuk te' pēnā kux, hak mūg mōg putup Māxenōn tu', tu hāmpē'paxex, hu: “Topa tek mūg xānāhā', 'ū Yeyox yōg hām'āpak max'ax 'āktux Māxenōn yōg tikmū'ūn pu'” kaxīy. (Hak mūn Nok te kax'āmi')

Tu kōmēn Pinio tu' tihi'

¹¹Tuk mūg pip Tonot kopah, tuk mūg mōg mīpkox hā, kōnāg xexka yīmū' mōg, tu mōktu hāmyīn yūm 'āxet'ax Xāmōtanax tu' mōxaha'. Hāptup 'ihāg mūg mōg, tu mōktu mōxaha kōmēn Nēyap tu'. ¹²Tuk mūg mōg, tu mōktu mōxaha hāpxexka Māxenōn yōg kōmēn te māxap Pinio tu', ha' yōg gohet yā hāpxexka Hōm yōg, ha 'āmnīy punethok hak mūg tihi Pinio kopah. ¹³Tu nit xap 'ihāk mūg mōg kōmēn kunāpa', tu Topa yōg hām'āktux'ax pet xak, nūy Topa pu hām'āktux, 'ihā kōnāgkox tu' mōxaha', hu kōnāg kux tuk mūg mām, ha 'ūn pip, hak mū'āte 'ūn mūtik hām'āktux. ¹⁴Ha kōmēn Tittit yōg 'ūn xip, tu topixxax max hāmenex, 'ūxuxet'ax Nit, tu Topa xak, tu' kuxa te' yēy Topa keppah, tu Yeyox hām'āpak max'ax 'āpak, ha Topa te' kuxa tupmāhā', yīy Paot yōg hām'āktux'ax 'āpak, tu' yīpkox xip, ¹⁵hap-tox pix, xi' xape xop 'ūpet kopa tihi' xop putox pix, ha' xak, hu: —'Ūgkuxa yūm ka'ok Yeyox kopah, yīy 'ūkpet ha mōg, nūy nox pi'. Kaxīy. Hak mūg mōg Nit pet hah.

Tu kanet kopa' tihi kōmēn Pinio tu'

¹⁶'Āmnīy kutōgnāg nōg, 'ihāk mūg mōg Topa pet hah, ha' mīm hex te putat hā' nūn, tu yāmīy pupi hām'āktux, tu hāpxopmā'ax pēnā hok 'āktux, tu hām'āktux hā tayūmak xexka pop, tu tik xop 'ūm pu' popmāhā', tu nōm tik xop pu' hok hā' hām. ¹⁷Tu Paot pe' mōg, xik mūg pe' mōg, tu' yīy ka'ok, hu:

—Nū tik xop te Topa xe'ēgnāg hā kāmānat, hu xa hāmyūmmūgāp-tup, nūy Topa yōg putat hā 'āmōgā'. Kaxīy.

¹⁸Tu xe hām'āktux hā kaxīy, 'āmnīy xohix hā' xuktux, ha hām'āktux kux 'ohnāg, yīy Paot gāy, tu' yōkānām, tu yāmīy kummuk mānōg, hu:

—Hômã Yeyox te yãmîy kummuk mõi tikmũ'ün kopah, tu' mõi pexkox tu', tuk mũ'ã yãy 'ãxet'ax hõm, pu yãmîy kummuk mõi, hu 'ãte 'ãxat, hu: 'Ãpep, nũy mĩm hex 'ãpe' nĩm. Kaxĩy.

Ha' nĩm, tu' mõi xupaha'. ¹⁹Pa tik xop nõy te mĩm yõi tayũmak xak, hu' gãy xexkah, tu Paot mũg, xix Xinax, tu' xexka xop keppa' mõiãhã, ha' xexka xop te kõmẽn yõi hãmnuknõi tu' pip, ²⁰ha tik xop gãy, tu' kupex, hu:

—Nũ tik yã Yõneo yõi xop, tu kõmẽn Pinio yõi tikmũ'ün gãyãhã, tu hãpxopmã kummuk yũmmũgãhã, ²¹ha Hõm yõi gohet te nõm hãpxopmã'ax putup nõg, tu' xat hok, 'ũ miy hok, hak mũ'ãte Hõm yõi tikmũ'ün. Kaxĩy.

²²Ha tikmũ'ün te yãy tu nũ'nãhã, tup-tox puxet, nũy Paot kix, xix Xinax kix, ha kõmẽn yõi xexka xop te tik yõi topixxax koxip, tu' mõi, tu' xat, pu kix mĩm mũnãg hã. ²³Tu' kix kakixnãg, tu kanet ha' mõiãhã, tu kanet yõi xonat xat, hu:

—Pẽnã ka'ok, pu tu xupa hok! Kaxĩy.

²⁴Ha hãm'ãpak, tu kanet hã mõi'tat, tu' kopa tigãhã, tu' xex, tu tik kup hĩy mĩm ka'ax tu', ha' mõi 'ohnãg, tu' pip.

²⁵Ha 'ãmniy kote 'Ihã Paot xix Xinax te Topa pu hãm'ãktux, tuk-tex, nũy Topa 'ãktux max, ha kanet kopa' pip tikmũ'ün te' xupak. ²⁶Hãpxip kutõgnãg 'Ihã hãm yãy nuhuk nãm, ha miptut yõi hãpkopa mĩkaxxap nuhut, ha mõi'yinnĩn'ax te yãy xõn, ha tikmũ'ün te kanet kopa' pip, ha' hĩy'ax koa', nõm te kanet kopa' xup, ha' mõiãha'. ²⁷Ha kanet yõi xonat te yãy koxak, tu kanet mõi'yinnã'ax pẽnãhã, pa yãy xõn, ha xonat te hãmpe'paxex, hu: “Yã' xohix nũ'paha!” Kaxĩy. Hu yãy putex putup mĩkax xexka hã, ²⁸pa Paot yĩy ka'ok, tu: —Yãy xuhmĩy hok! Yãg mũg xohi' pip! Kaxĩy.

²⁹Ha' nõy te:

—Kuyãnãm paxnũ'. Kaxĩy.

Tu mõi'nãhã, tu kuxãnõi, tu yãy puxu'uxnãm, tu' kopaxux hã' nãhã Paot keppah, xix Xinax keppah, ³⁰tu' yok, tuk-nĩhã' xip, tu hãpkopa' mõi, tu:

—'Ügnõi, 'ãte putep mĩy'ax, puyĩy Topa 'ũgkuxa kummuk xit, nũy 'ãtu' gãy hok? Kaxĩy.

³¹Ha Paot xix Xinax te:

—'Ãkuxa yũm ka'ok 'ũgmũg xuxyã Yeyox kopah, puxix Topa 'ãkuxa kummuk xit, nũy yãnãn tu 'ãkuxa max tat, 'ãmũn, xix 'ãxape te 'ãpet kopa' pip. Kaxĩy.

³²Ha tik xop te Topa yõi hãm'ãktux'ax 'ãktux kanet yõi xonat pu', xix' xape xop pu'. ³³'Ãmniy kote 'Ihã' xonat te' nõy yõi kayax pix, ha Paot xix Xinax te xonat putox pix, xi' xape xop, nõm xop kuxa mãm ka'ok Yeyox kopah. ³⁴Ha xonat te yãy pet ha' mõiãhã, tu hãpxop pop nũn, ha' mãhã, ha xonat kuxa yũm ka'ok Topa kopah, xi' xape xop kamah, hu' kuxa hittup.

³⁵Hãptup ha ta Hõm yõi xexka xop te' xat, hu:

—Kanet kopa' mõi tik 2, pu mõi, tu nũmãn. Kaxĩy.

³⁶Ha xonat te Paot pu hãm'ãktux, hu:

—Tik xexka xop te 'ãmõi putup, ha 'ãnũpap-tup, hu mõi, xa 'ãkuxa mãm. Kaxĩy.

³⁷Pa Paot te:

—'Ămhok! Kaxīy hok! Hōmă tik tek mūg kix kakixnăg, ha kōmēn Pinio yōg tikmū'ūn te' pēnăhă'. Hak mūg yīkopit 'ohnăg, tuk mū yōg hăpxopmă'ax kopit, 'okpak mūg hăpxexka Hōm yōg tihik, ha kanet kopak mūg tigăhă', yă hōnhă nūmăn yăy xaptop tu!' 'Ămhok! 'Ak mūg mōg putup'ah. 'Ăpu, tik xănă', pu nū', pu nūy 'ūgmūg mōy kanet kopah, nūy hăptopak mūg mōgă'. Kaxīy.

³⁸Ha xonat xop te Hōm yōg xexka xop pu hăm'ăktux, ha' xexka xop kuxănōg, Paot xix Xinax yă hăpxexka Hōm yōg tik hah. ³⁹Ha' nūn, tu tik 2 pu hăm'ăktux, hu:

—'Ăgăy hok 'ătu'. 'Ăte nūktu yăyhăhup hok'ah. Kaxīy.

Tu kanet kopa' mōy, tu ta' mōg, tu kōmēn kunăpa' mōgăhă', tu:

—'Ămōg. Kaxīy.

⁴⁰Ha' mōg, tu Nit pet ha' mōg, tu' xape xop mō'nīynăm, tu' mōg.

Tu kōmēn Texanōn tu' tihī'

17 ¹Tu ta' mōg, kōmēn 'Ăppip kotit hă' mōg, xix kōmēn 'Aponōn kotit hă' mōg, tu mōktu mōxaha kōmēn Texanōn tu', ha Yoneo yōg Topa pet yūm, ²ha nit xap yă Yoneo yōg hăptup xe'e!, yīy nit xap xohix 'ĭhă Paot te Yoneo yōg Topa pet ha' mōg, hu hōnhă' mōg, tu nit xap ³'ĭhă hăm'ăktux hă' nōy kutnăhă'. Kaxīy.

⁴Ha tik 'ūm te:

—Hamūn! Kaxīy.

Hu Paot xix Xinax mūtik yăy kotĭnnăhă', ha Genex yōg puknōg xop te Topa xak, xix 'ūn xexka xop, tu nōm tik mūtik yăy kotĭnnăhă'.

⁵Pa Yoneo xop te' yĭpkumīy, tu tik kummuk yĭmōgatux, nōm hăm hok xop, tu hăpkute'ex kummuk pax, 'ap max'ah, tu kōmēn xohix kopa hăpkummugăhă', tu kōmēn xohix găyăhă', tu Paot xak xix Xinax, hu Yaxăm pet hă' mōxakux. ⁶Păyă 'ap ti'ah, yīy Yaxăm mūg, tu' xut yăy pet kopah, tu' xape xop mōy kamah, tu kōmēn yōg xexka xop keppa' mōgăhă', tu:

—Nū tik te hăm xexka xohix tu hăpkummugăhă', tu nūktu nūn kamah, ⁷tu Yaxăm pet kopa' tihī', ha' xohix te hăpxexka Hōm yōg Xex putup pax, pa tik xop kummuk te hăpkummuk yūmmūgăhă', hu: "Hōm yōg Xex tek mūg xat 'ohnăg. Yă Yeyox tek mūg xat xe'ėgnăg! Kaxīy."

⁸Ha Texanōn yōg tikmū'ūn te hăm'ăpak, xix kōmēn yōg xexka xop, hu' găy, ⁹tu tayūmak xak Yaxăm tu hămăxap, xi' nōy xop tu', puyīy Paot xix Xinax mōy, puyīy kōmēn Texanōn nĭm. Ha pago, tu nū'paha'.

Tu kōmēn Menet tu' tihī'

¹⁰Ha 'ămnīy hă' kuxa măm ka'ok xop te Paot xix Xinax mōgăhă', tu' mōg tu mōktu mōxaha kōmēn Menet tu', tu Yoneo yōg Topa pet hă' mōxakux. ¹¹Ha Menet yōg Yoneo xop te hămyok mīy, pa Texanōn yōg xop te hăpkohe' mīy. Yă Menet yōg tikmū'ūn te Topa yōg tappet mō'kupix năm, puyīy Paot yōg hăm'ăktux kopit, nūy hămyūmmūg, nūy hăpxe'e yūmmūg. ¹²Hū Menet yōg tikmū'ūn

punethok kuxa mãm ka'ok Yeyox kopah, xix Genex yög 'ün xexka xop, xix tik xop. ¹³Ha Paot te hãm'apak max'ax 'ãktux, ha Texanõn yög Yoneo xop te hãm'apak, hu' gãy, tu' nũn, tu nũktu tikmũ'ün gãyãhã. ¹⁴Ha' xape xop te Paot xut, tu:

—Mõg, mõg, pu 'ãp-tex hok! Kaxĩy.

Ha' mõg, kõnãg xexka ha' mõg, pãyã Xinax nox xip, xix Tĩmõn, tu Menet kopa' tihi'. ¹⁵Ha nõm xape xop te Paot mөгãhã kãmẽn xexka 'Atẽn tu', tu putpu' mõg Menet tu', tu Paot pupi hãm'ãktux, nũy Xinax xãnã', xix Tĩmõn, pu kãmẽn 'Atẽn tu' mõg mõ'ka'ok.

Tu kãmẽn 'Atẽn tu' xip

¹⁶Ha Paot te 'Atẽn tu tik 2 hip, tu kãmẽn xexka pẽnãhã', tu topahnãg komut pẽnãhã', ha nõm komut yĩm hã' mĩy, nũy heyah, ha kãmẽn nũ'xip nõm hãpxop hã, yĩy Paot kuxa hittup 'ohnãg. ¹⁷Tu' mõg Yoneo yög Topa pet hah, nũy Yoneo xop mũtik hãm'ãktux hã' nõy yãnãn nãm, xix nõm xop te Topa xak xop mũtik hãm'ãktux hã' nõy yãnãn. Tu nãpet ha' mõg kamah, ha 'ãmniy xohix hã hãm'ãktux hã' nõy yãnãn 'Atẽn yög tikmũ'ün mũtik. ¹⁸Tu hãm'ãktux, tu hãm'yũmmũg'ax xop 'ãxet'ax 'Epikoneo xop mũtik hãm'ãktux, xix 'Extox xop mũtik hãm'ãktux hã' nõy yãnãn, ha' yãg te' yĩkopit, hu:

—Kãy te hãm'ãktux punethok. Putep mũn 'ãktux putup? Kaxĩy.

Ha' yãg nõy te' yãnãn, hu:

—Tute topahnãg puknøg 'ãktux. Kaxĩy.

Ha Paot te Yeyox 'ãktux, tu Yeyox putpu' hi 'ãktux. ¹⁹Ha tik xop te hãm'yũmmũg te Paot yĩm mũg, tu 'Axenop yög hãm'yũmmũg xop ha' mөгãhã', pu hãm'ãktux'ax 'ãpax, tu' yĩkopit, hu: koneo xop mũtik hãm'ãktux, xix 'Extox xop mũtik hãm'ãktux hã' nõy yãnãn, ha' yãg te' yĩkopit, hu:

—Kãy te hãm'ãktux punethok. Putep mũn 'ãktux putup? Kaxĩy.

Ha' yãg nõy te'

—'Ok hãm'yũmmũg'ax tup nũhũ xate hãm'yũmmũgãhã'? ²⁰'Äpu, 'ãyĩy, tu hãm'yũmmũg'ax puknøg 'ãktux, nũy 'ũgmũ yũmmũgã'. Kaxĩy. ²¹Yã 'Atẽn yög tikmũ'ün hãm hok, xix puknøg xop te kãmẽn kopa' tihi' hãm 'ohnãg, pa hãm'apak pax, nũy tu xe' xuktux, tu 'ãmniy xohix hã hãm'apak tup 'apak, xi' xe' xuktux. ²²Ha Paot te hãm'ãktux, ha 'Anenop xop te Paot xakot, ha Paot te:

—'Atẽn yög tikmũ'ün: 'Äxop te 'ög topahnãg komut xop xohix xak. ²³'Äte hãpkumep, tu topahnãg komut punethok pẽnãhã', nõm mĩy nũy heyah, ha 'äte topahnãg yög mĩmpe pẽnãhã', ha tikmũ'ün te topahnãg pu hãpxop 'ũm hõm, tu mĩmpe yĩmũ' xix, ha tik 'ũm te mĩmpe yĩmũ' kax'ãmĩ', hu: "Nũhũ topa puknøg pu'," kaxĩy. 'Äte xa nõm puknøg 'ãktux putup.

²⁴—Topa xe'ëgnãg te hãm xexka mĩy, xix hãpxop xohix mĩy, hu pexkox xix hahãm xat. 'A' pet mĩy xak'ah tikmũ'ün yĩm hã. Yã mĩptut kopa ti 'ohnãg. 'Üxexka xe'ëgnãg Topah. ²⁵Tu hãpxop 'ũm xak 'ohnãg, yã hãpxop xohix mĩy, nũy tikmũ'ün pu' xit xut popmãhã', xi' hi'ax, xix hãpxop xohix yã' hok popmãhã.

²⁶Tu tik puxet mĩy hãmãxap, tu nõm hã' mĩy tikmũ'ün xohix, xi' hep xohix, pu

yōg hām tu 'āti', ha Topa te tikmũ'ün pu hām 'üm hā' xakux'ax xat, xix hām 'üm hā' xakix'ax xat, tu' pip'ax 'üm xat, pu mōg hāpexka pu kopa 'āti'. ²⁷Puyīy tikmũ'ün Topa xax, nūy xipi!, pāyā tikmũ'ün yīka hā Topa xip. ²⁸Hōmā 'ōgnū tik te hāmyümmüg te kax'āmi!, hu: “Topa hā yümü'āte! xit xut, xix yümüg mōg, xix yümüg tihi!” kaxīy. Ha' nōy te: “Yümü'ā Topa hā kutok xe'e!” kaxīy. ²⁹Hamün, yümü'ā Topa hā kutok, hu hāmpē'āpaxex hok, hu: “Topa te pipkup yānām putuk,” kaxīy. Xix hāmpē'āpaxex hok, hu: “Topa te mīkaxxap putuk,” kaxīy. 'Āmhok. Tik 'üm te Topa xe'e mīy 'ohnāg. ³⁰Hōmā tikmũ'ün te hāmyümmüg'ah, ha Topa te nōā'tot, pa nōmhā Topa te' xat, xa yāyhāhup, tu hāpkummuk mīy kux, pu Topa 'āxop yōg hāpkummuk mīy'ax xaxogā!, pu tu kux. ³¹Yā Topa pa te hāmyümmüg, tu hāptup puxet yāykutnāhā!, 'ihā' tute hep xop xohix yōg hāpxopmā'ax kopit putup, tu tik te hāmyok mīy hā' kopit putup, tu Yeyox yāykutnāhā, pu tu kopit, ha' putpu nōm hīnnāhā!, nūy tikmũ'ün xohix pu hāmyümmügā!. Kaxīy.

³²Ha tikmũ'ün te' xupak, ha' yāg te:

—Putep te hām'āktux? 'Ūxok, tu putpu' hi?!” Kaxīy.

Tu' yīxix kummuk. Ha' yāg nōy te:

—Yā' max. Hāptup 'üm nōy 'ihā xe xa 'āpak putup. Kaxīy.

³³Ha Paot mōg, ³⁴pāyā tik 'üm kuxa mām ka'ok, 'ūxohix te: 'Axenop yōg Nioniy, xix 'ün Nām, xi' nōy xop kuxa mām ka'ok.

Tu kōmēn Konīn tu' tihi'

18 ¹Ha Paot te 'Atēn tu' xip, tu ta' mōg, tu mōktu xupep kōmēn Konīn tu'. ²Ha Pō'ōn yōg Yoneo xip, 'āxet'ax 'Ak, xi' xetut Pinixit, tu hāpexka 'Itat tu' tihi!, tu hāpxip kutōgnāg nūn. Hōmā hāpexka Hōm yōg tik te tikmũ'ün xat'ax Kanao Xex te Yoneo xop nūmāhā!, ha hōnhā Paot mōg 'Ak hah, xi' xetut hah. ³Ha Paot xix 'Ak te yīmāgkox xexka mīy hā' hām, tu topixxax ka'ok hā' mīy, tu' nōmēnex, tu tayūmak pop, ha Paot te 'Ak mūtik tihi!. ⁴Ha nit xap xohix 'ihā Paot mōg Yoneo yōg Topa pet hah, tu hām'āktux hā' nōy yānān nām Yoneo xop mūtik, xix Genex yōg xop mūtik hām'āktux, nūy hāmyümmügā!.

⁵Ha Xinox xix Tīmōn te Māxenōn tu' tihi!, tu' nūn, tu nūktu mōxaha Konīn tu', 'ihā Paot te hām'āktux Yoneo xop pu', hu:

—Yeyox yā Kunnix, yā Topa te' yāykutnāhā!. Kaxīy.

⁶Pa tikmũ'ün tep-tup nōg, tu' yīpkox 'ohnāg, tu' mānōg, tu Yeyox 'āktux kummuk, yīy Paot te yāy yōg topixxax kuto'ok, tu:

—Topa te 'ōg hāpxopmā'ax kopit putup, nūy hāpkummuk mīy'ax hā' yānān. Kaxīy.

Tu xe hām'āktux, hu:

—Xate Topa yōg putat yok max putup nōg. 'Ak yāy kuxop'ah, huk mōg Yoneo xop hā' puknōg xop hah. Kaxīy.

⁷Tu' mōg Tix Yox pet hah, ha Topa xak, tu' kuxa te' yēy Topa keppah, yā yāy pet te Yoneo yōg Topa pet yīka' yūm. ⁸Ha Kinix te Topa pet yōg xop xat,

tu' kuxa yĩm ka'ok Yeyox kopah, xi' xape xop kamah, ha Konĩn yõg tikmũ'ũn punethok te Paot yõg hãm'ãktux'ax 'ãpak, tu' kuxa mãm ka'ok, hap-tox pix.

⁹Ha 'ãmnĩy koxtap 'ĩhã Yeyox te Paot pu hãm'ãktux, ha Paot te yãy koxuk hã' xupak, yĩy:

—'Ãkuxãnõg hok, xix yãy xaptop hok. ¹⁰Yã 'ãmũtik 'ũktihi', tu 'ãpẽnãnãg xip, pu tik 'ũm 'ãmũy hok. Yã yõgnũ tikmũ'ũn punethok pip nũ kõmẽn tu'. Kaxiy.

¹¹Ha' xip hãm'yãxatamuk puxet xi' xahi', tu Topa yõg hãm'ãktux'ax yũmmũgãhã Konĩn yõg tikmũ'ũn pu'.

¹²Ha Gat te hãpxexka Genex yõg tikmũ'ũn xat, ha Yoneo xop te yãy tu nũ'nãhã, nũy Paot kupeh, tu' mũg, tu' mõgãhã kõmẽn yõg xexka xop keppah, nõm xop pa te hãm'yũmmũg keppah, puyi' yĩkopit. ¹³Ha' kupeh, hu:

—Kãy te Topa xak'ax yũmmũgãhã tikmũ'ũn pu', pãyã tik te yũmũg xat te' xat hok, kãy te hãm'yũmmũgã kummuk hah. Kaxiy.

¹⁴Ha Paot te' yĩkox xix, 'ũyiy putup tu', pãyã Gat te hãm'ãktux Yoneo xop pu', hu:

—Nãy. 'Ok pe kãy tep-tex, 'ok pe nõ xupxet, kopxi' kopit, ¹⁵pãyã 'ãxop yiy'ax 'ãte yũmmũg'ah, xix 'õg xat'ax puknõg 'ãte kama yũmmũg'ah, xi' xuxet'ax 'ũm 'ãte' yũmmũg'ah. 'Ak kopit putup'ah 'ãte'. Kaxiy.

¹⁶Tu papuk hãpxupmãhã', ha' mõg, tu' gãy. ¹⁷Ha' xohix te Topa pet xop xat'ax Xox mũg, tu' kix Gat keppah, pãyã Gat te' pẽnã hok, tu nũpe mõ'kut.

Tu kõmẽn 'Ãtikit tu putpu' mõg

¹⁸Ha 'ãmnĩy xohix nõg, 'ĩhã Paot te mĩpkox hã' mõg, nõm te kõnãg yĩmũ' mõg, ha mõktu xupep hãpxexka Xit tu', ha Pinixit xix 'Ak te nũmũtik mõg, tu mõktu mõxaha kõmẽn Xẽnkenex tu', ha Paot te' xe mep, tu' xut xok nãm, Topa pu hãm'ãktux xex tu'. ¹⁹Tu' mõg, tu mõktu mõxaha kõmẽn 'Ep tu', tu Pinixit xix 'Ak nĩm, tu' mõg Yoneo yõg Topa pet hah, tu hãm'ãktux hã' nõy yãnãn Yoneo xop mũtik. ²⁰Tu' mõg putup, pa Yoneo xop te:

—Nãy! 'Ãmõg hok! Kaxiy.

²¹Pãyã' mõg putup, hu:

—Topa tek putup, kopxix putpu 'ãhãk nũ'. Kaxiy.

Tu mĩpkox hã' mõg. ²²tu mõktu xupep kõmẽn Xeyanet tu', ha' mõg kuxa mãm ka'ok xop hah, tu' mõg, tu mõktu mõxaha 'Ãtikit tu', ²³tu 'ãmnĩy punethok hã' tihi', tu' mõg, tu hãpxexka Ganax kotit hã' mõg, xix Pinik kotit hã' mõg, tu' kuxa mãm ka'ok xop ka'ogãhã'.

'Apot te kõmẽn 'Ep tu' xip

²⁴Ha kõmẽn xexka 'Anexãnit yõg Yoneo pit nũn kõmẽn 'Ep tu', 'ũxuxet'ax 'Apot, tute Topa yõg hãm'ãktux'ax 'ãktux max, tu Topa yõg tappet hittap yũmmũg xe'e'. ²⁵Tu Topa yõg putat yũmmũg, tu' hittup, tu Yeyox 'ãktux, tu Topa yõg hãm'yũmmũg'ax yũmmũgãhã', pa Yoãm puxet yõg putox pix'ax

yūmmūg, tup-tox pix'ax nōy yūmmūg'ah, 'ūp-tox pix nūy Yeyox yā yāy xuxyā 'āktux yūmmūg'ah. ²⁶Tu hām'āktux, tu' yīpkutuk 'ohnāg Yoneo yōg Topa pet kopah, ha Pinixit xix 'Ak te' xupak, tu' yāy pet ha' mōgāhā', nūy Topa yōg putat yūmmūgā xe'e!. ²⁷Ha 'Apot te hāpxexka Genex tu' mōg putup, ha 'Ep yōg kuxa mām ka'ok xop te mō'nīyānām, tu tappet kaxāmi Genex yōg kuxa mām ka'ok xop pu', puyī' nū' nūnānām yāy nōy putuk. Ha' mōg, tu mōktu xupep Genex tu', tu nōm xop mō'nīyānām punethok 'ūyānān tu', tu hāmyūmmūgāhā', tu' ka'ok, tu' nōy xop ka'ogāhā', ha Topa te hāmmaxnāhā'. ²⁸Ha Yoneo xop mūtik hām'āktux hā' nōy yānān nām, tu Topa yōg tappet hā Yeyox yā Kunnix 'āktux, tu Topa te nōm yāy kutnāhā' 'āktux, ha Yoneo xop te' yēy, tu' yīy 'ohnāg.

Paot te 'Ep tu' xip

19 ¹'Apot te Konīn tu' xip, 'Ihā Paot yīnāpa' nūn kōmēn xohix yīktix yīmū' pip tu', tu nūktu xupep 'Ep tu', tu' kuxa mām xop pipihi', ²tu' yīkopit, hu:

—'Ok Topa Koxuk te 'ākuxa ka'ogāhā', 'Ihā 'ākuxa mām ka'ok tap Yeyox kopah? Kaxīy.

Ha' nōy te:

—Topa Koxuk 'ūm? 'Ak mū'āte' yūmmūg'ah. Kaxīy.

³Ha Paot te:

—'Āp-tox pix'ax te xīy? Kaxīy.

Ha' nōy te:

—Yoām yōg putox pi'ax. Kaxīy.

⁴Ha Paot te:

—Yoām tep-tox pix, xa yāyhāhup, nūy hāpkummuk mīy kux, xa kuxa mām ka'ok Yeyox kopah, nōm te Yoām pe' nūn. Kaxīy.

⁵Ha' xupak, hap-tox pix, 'Ihā Yeyox yā yāy xuxyā 'āktux. ⁶Ha Paot tep-tox yīmū' yīm xex, ha Topa Koxuk te nōm xop ha yīxohoh, ha' yīy'ax puknōg xohix hā hām'āktux, tu Topa yōg hām'āktux'ax 'āktux. ⁷Ha tik xohix ya'omi' mōg te 12.

⁸Ha Paot mōg Yoneo yōg Topa pet hah, tu māyōn 'ānuk 3 hā hām'āktux hā' nōy yānān tikmū'ūn mūtik, nūy Topa te yāy yōg tikmū'ūn xat 'āktux. ⁹Pa tikmū'ūn yīpkox pip 'ohnāg, tu' kuxa mām 'ohnāg Yeyox kopah, tu Topa yōg putat 'āktux kummuk tikmū'ūn nōy pu', yīy Paot mōg, tu' kuxa mām ka'ok xop mōgāhā', tu 'āmnīy xohix hā Tinān yōg tappet mīy'ax pet kopa hāmyūmmūgāhā'. ¹⁰Hāmyāxatamuk 2 hā hāmyūmmūgāhā', ha hāpxexka 'Ax yōg tikmū'ūn xohix te Topa yōg hām'āktux'ax 'āpak, Yoneo xop te' xupak, xi' puknōg xop.

Xep kutok put te 7

¹¹Ha Topa te hāpxopmā ka'ok xe'ēgnāg, tu Paot ka'ogāhā, pu hāpxopmā. ¹²Ha nōm tikmū'ūn te Paot yōg topixxax yāg pop, tu' pakut xop pu' popmāhā', ha hāmpakut'ax te' pakut xop tu' xupepmāhā', ha' hittup, xix yāmīy kummuk xop tu' xupepmāhā kamah. ¹³⁻¹⁴Ha Yoneo

yõg taknõy xop te 7 pip, tu Yoneo yõg 'ãmãnex xop xat'ax Xep kutok, tu hãpkumep pax, nũy yãmĩy kummuk xupepmã', tu Yeyox 'ãxet'ax yũmmũg, 'ĩhã hãmp'e'paxex, hu: "Yeyox 'ãxet'ax yã' ka'ok. 'Apu, yãmĩy kummuk tikmũ'ũn kopa' xut Yeyox 'ãxet'ax 'ãktux hã'," kaxĩy. Hu yãmĩy tu' xat, hu:

—'Àte 'ãxat, Yeyox 'ãxet'ax hã, yã Paot te nõm 'ãktux. Pu 'ãpep xa mõg. Kaxĩy.

¹⁵Pãyã yãmĩy kummuk te:

—Yeyox 'ãte' yũmmũg, xix Paot yũmmũg, pa 'ũ 'ũm 'ãxop? 'Àte 'ãyũmmũg'ah. Yeyox te 'ãxop pu yãy 'ãxet'ax hõm 'ohnãg. Kaxĩy.

¹⁶Ha tik nõm yãmĩy kummuk kopa' xip te' yok mõ'ka'ok, tu nõm taknõy xop te 7 kix kakixnãg, yĩy kayax taha', tu' xax top hã mĩptut tu nũ'paha'.

¹⁷Ha 'Ep yõg tikmũ'ũn xohix te' yũmmũg, Yoneo xop xix Genex yõg xop te' yũmmũg, tu' kuxãnõg, tu Yeyox 'ãxet'ax ka'ok 'ãktux, tu' kuxa te' yẽy. ¹⁸Ha tikmũ'ũn punethok kuxa mãm ka'ok Yeyox kopah, tu' nũn, ha nõm te hõmã mĩhĩm, tu hõnhã yãyhãhup, tu yãy yõg hãpkummuk mĩy'ax 'ãktux, nũy tu mĩy kux. ¹⁹Tu' mĩm xop yõg tappet xax xohix popnũn, tu kuxap kopa mõ'pok, ha' mõ'xut, ha tikmũ'ũn xohix te' pẽnãhã', ha tappet xax xohix yõg tayũmak te 50.000. ²⁰Yã kaxĩy hã tikmũ'ũn te Topa yõg hãm'ãktux'ax 'apak, tu xe hãm'ãktux hãptox tu', ha tikmũ'ũn punethok kuxa mãm ka'ok, tu' yĩpkox pip.

Nemẽn te 'Ep yõg tikmũ'ũn gãyãhã'

²¹Ha hãpxip kutõgnãg 'ĩhã Paot mõg putup Yenoyanẽn tu', Mãxenõn kotit hã' mõg putup, xix hãpxexka 'Akax kotit hã' mõg putup, tu hãm'ãktux, hu:

—Yenoyanẽn tuk mõg, nũy mõy tu 'ãpep, tuk-nãy tu 'ãte Hõm pẽnãp-tup kamah. Kaxĩy.

²²Tu Timõn xix 'Enax mõ'pok hãpxexka Mãxenõn tu', tu hãpxip kutõgnãg 'ĩhã Hõm yõg hãpxexka 'Ax tu' tihi'.

²³Ha 'Ep yõg tikmũ'ũn te Topa yõg putat tu' gãy, ²⁴ha tik 'ũm 'ãxet'ax Nemẽn, tu topahnãg hex Niãm komut mĩy, xi' pet komut mĩy, pu heyeh, tu pipkup yãnãm ponnok hã' mĩy, tu tayũmak xexka pop. ²⁵Tu tik te topahnãg komut mĩy xop xãnãhã', ha yãy tu nũ'nãhã', ha Nemẽn te:

—Tik xop: Yũmũg hãm, nũy tayũmak xexka pop, 'ãxop te' yũmmũg.

²⁶Pa Paot te hãm'ãktux, ha tikmũ'ũn xohix te hãm'apak, ha hãm'ãktux, hu: "Tik te' yĩm hã' mĩy nõm topahnãg komut. 'Ap Topa xe'e'ah, yã hãpxop mõ'ãmã'ax, yĩy hãpxop te mõ'ãmã'ax nĩm," kaxĩy. Ha tikmũ'ũn punethok yĩpkox pip, hu topahnãg komut xop hãmenex putup'ah. ²⁷Hak kuxãnõg, pu tikmũ'ũn topahnãg 'a pop putup hok, xix Niãn pet 'a' putup hok, xix topahnãg hex Niãn mũn putup hok, 'ĩhã hãpxexka 'Ax xohix te nõm pu heyeh, xix hãpxexka nõy xohix te'. Yĩy yũmũ'ãte tayũmak xak. Kaxĩy.

²⁸Ha' xupak, tu' gãy xexkah, tu' yĩy ka'ok, hu:

—'Ep yõg Niãn xexka xe'ẽgnãg! Kaxĩy.

²⁹Ha tikmũ'ũn xohix te hãm'ãktux punethok kõmẽn xohix kopah, hu hãm'apak 'ohnãg, tu yãy tu nũ'nãhã mĩptut xexka kopah, tixmũ'ũn yõg yãy

tu nũ'nã'ax pet kopah, ha Măxenõn yõg tik 2 tihì! Yă Paot mũtik hăpkumep, ha tikmũ'ũn găy, tu nõm tik 2 mõgãhã tikmũ'ũn yõg yăy tu nũ'nã'ax pet hah, ³⁰ha Paot mõg putup, nũy tikmũ'ũn pu hãm'ăktux, pa' kuxa mãm ka'ok xop te' tux hok, pu mõg hok. ³¹Ha 'Ax yõg xexka xop te Paot hã' xape, tu' xak, hu:

Tikmũ'ũn yõg yăy tu nũ'nã'ax pet ha 'ãmõg hok pu găyxop 'ăpenã hok! Kaxiý.

³²Ha tikmũ'ũn yiy ka'ok, tu hãm'ăktux punethok, hu hãm'ăpak 'ohnăg, tu tep tu yăy tu nũ'nãhã' yũmmũg 'ohnăg. ³³Ha Yoneo xop te Topa pet xop xat'ax 'Anexãn xut, tu' kopa' mõgãhã', pu hãm'ăktux tikmũ'ũn pu', ha 'Anexãn yim xix, hãm'ăktux putup tu', pu 'Ep yõg tikmũ'ũn găy hok Yoneo xop tu'. ³⁴Pa tikmũ'ũn te 'Anexãn yă Yoneo yũmmũg, tu' yiy ka'ok, tu xe' yiy xexka', tu xe' yiy, tu yãnmũn xupep'ax puxet putuk, tu 'ot 2 hã te:

—'Ep yõg Niãn yã' xexka xe'ėgnăg. Kaxiý.

³⁵Ha kãmẽn yõg kaxãmi'ax te:

—'Ăhup, 'ăhup! Kaxiý.

Tu xe' xuktux, hu:

—'Ep yõg tikmũ'ũn: 'Ũ 'ũm te kãmẽn 'Ep yũmmũg hok? Yã' xohix te' yũmmũg, ha 'Ep te topahnăg hex Niãn pet xexka xix, tu topa xap xix, nõm te pexkox tu' nãhã', yã' xohix te' yũmmũg, ³⁶yã' yũmmũg tap, yiy 'ăhup, nũy hăpkummuk miý hok. ³⁷Xate tik 2 nũnnãhã', ha 'ap kummuk'ah, tu topa hex Niãn 'ăktux kummuk 'ohnăg, tu topa hex Niãn yõg hăpxop 'ũm hã' xupxet 'ohnăg. ³⁸Nemẽn te hãm'ăktux 'ũm putup, xix yăy xop te', puxix tik pa te hãmyũmmũg tu' xax, puyi' kopit, yiy mõg, nũy tik 'ũm kupeh. ³⁹Pe hăpxopmã'ax nõy kopit putup, puxix tikmũ'ũn xohix kopit. ⁴⁰'Ăte koit'ah, pa 'ăte gohet yõg hãmp'e'paxex yipkutuk, pax pu: "Ep yõg tikmũ'ũn yăykix kakixnăg," kaxiý, puxix xonat xop nũ'pok 'Ep tu, puyik yikopit, tep tu 'ăgãy nãm. Păyã 'ap yũmmũg'ah 'ăte!. Kaxiý.

⁴¹Tu hãm'ăktux, tu:

—Mõg. Kaxiý.

Ha' mõg.

Paot te Măxenõn tu' xip, xix Genex tu' xip

20 ¹Ha Paot te' kuxa mãm ka'ok xop xãnãhã', tu hãm'ăktux hã' kã'ogãhã', tu: —'Ũgmõg. Kaxiý.

Tu ta' mõg hăpxexka Măxenõn tu'. ²Tu hãm xohix kotit hã hăpkumep, tu hãm'ăktux hã' kuxa mãm ka'ok xop ka'ogãhã', tu' mõg tu mõktu hăpxexka Genex tu' xupep. ³Tu' xip mãyõn 'ãnuk 3 hã, ha' mõg, ha Yoneo xop tep-tex putup, ha mĩpkox te kõnăg yimũ' mõg hã' mõ'nãhã', nũy hăpxexka Xit kotit hã' mõg, tu Măxenõn tu putpu' nũn putup. ⁴Ha Paot mũtik nũn kãmẽn Menet yõg Pihoktok Xopat, xix kãmẽn Texanõn yõg 'Ănixtah, xi' yõg Xegõn, xix kãmẽn Nep yõg Gax, xi' yõg Tĩmõn, xix hăpxexka 'Ax yõg Tikik, xi' yõg Tonop, ⁵tu Paot keppa' mõg, hak mũn Nok te kax'ãmi!, hak mũ'ăte Paot hip kãmẽn Tonot tu'. ⁶Ha Yoneo xop yõg 'ãmuk xexka 'ăxet'ax "pãm tokatok hok" kux, hak mũg pip Pinio tu', tu

mĩpkox hãk mũg mōg, tu kōnãg yĩmũ' mōg, ha 'ãmniy te 5 nōg, 'ihãk mũg mōg tu mōktu mōxaha Tonot tu', ha' nōy xop mütik yãy tu nũ'nãhã', tu' pip 'ãmniy te 7 hã.

Paot te Tonot tu' xip

⁷Tu yenomĩy 'ihãk mũg yãy tu nũ'nãhã', tu pãm koxip, nũy mã', nũy Yeyox yã yũmũg pupi' xok pekpaxeh, ha Paot mōg putup hãptup 'ihã', hu hãm'ãktux tox, tu 'ãmniy kote 'ihã hãm'ãktux, tu' kux 'ohnãg. ⁸Ha kuyãnãm tat'ax punethok te mĩptut nōy yĩmũ' mōg'ax kopa' pip, hak mũg yãy tu nũ'nãhã', ⁹ha tik xiptap 'Ettik xip, tu mĩptut tox yãy yĩmũ' mōg'ax 3 kopa' xip, tu yanãn kox yĩmũ' yũm, ha kũmĩm tep-tex, ha mō'yõn, Paot yōg hãm'ãktux tox hah, ha hãm tu' nãhã', tu' xok. ¹⁰Ha Paot te mĩptut yĩmũ tu' yĩxohoh, tu 'Ettik mũg, tu' nōy xop pu hãm'ãktux, hu: —Kuxãnōg hok! Yã' koxuk te' kopa' xip, yã' hi! Kaxiy.

¹¹Tu xe pepi' mōg, tu pãm koxip, tu' mãhã', nũy Yeyox pe'paxeh, tu hãm'ãktux yũmũg xape xop mütik, ha xokakkak xataha', 'ihã hãm'ãktux kux, tu' mōg. ¹²Ha 'Ettik hi', yiy tikmũ'ũn kuxa hittup xexka', tu' yãy pet ha' mōg.

Tu Mĩnet ha' mōg

¹³Hak mũn Nok te xe kaxãmi', tuk mũg mōg mĩpkox hã, tu' mōg, tu mōxaha hãmyĩn yũm 'Axox tu', tu Paot hip, 'ihã Paot te hãm tu yã' mōg. ¹⁴Tu' xupep, 'ũgmũ'ãte ta tu yãy tu nũ'nãhã', hak mũg mōg, tu mōktu mōxaha kōmẽn Mĩtinẽn tu'. ¹⁵Tuk mũg mōg mĩpkox hã, tu Kiox hã' yẽn, tu hãptup nōy kōmẽn Xãmōy tu' mōxaha', tuk mũg mōg, tu mōktu mōxaha kōmẽn Mĩnet tu'. ¹⁶Ha Paot mōg putup nōg kōmẽn 'Ep tu', nũy mōg mō'ka'ok, nũy kōmẽn Yenoyanẽn tu 'ãmõxãn, nũy Yoneo yōg 'ãmuk xexka Pêtekot mĩy.

Paot te hãm'ãktux

¹⁷Tu kōmẽn Mĩnet tu' xip, tu 'Ep yōg tik pẽnã max xop xãnãhã', ¹⁸ha' nũn, ha Paot te:

—Hõmãg nũn 'Ax tu hãmãxap, ha xatek yũmmũg, tu yõgnũ hãpxopmã'ax yũmmũg kamah, 'ihã hãmyaxatamuk xohix hãk xip 'ãxop mütik. ¹⁹Tu hãpxopmãhã Topa tu', tuk kutõgnãg, tuk kuxa hittup 'ohnãg, yã Yoneo xop tek kummugãhã'. ²⁰Ha xa hãm'ãktux xe'e, tu Topa yōg hãm'ãktux'ax xohix 'ãktux, tu' xaxok 'ohnãg, tu xa hãmyũmmũgãhã', nũy 'ãka'ogã', nũy mō'ãnĩynãm, ha tikmũ'ũn tek xupak, 'ihã 'ãte kōmẽn kotit hã xa hãmyũmmũgãhã', xix mĩptut xohix kopa hãmyũmmũgãhã kamah. ²¹Tu xa hãm'ãktux xe'e', tu Yoneo yōg tikmũ'ũn pu hãm'ãktux, xix Genex yōg tikmũ'ũn pu hãm'ãktux, tu Topa pu yãyhãhup 'ãktux, tu 'õg hãpkummuk mĩy kux 'ãktux, tu 'ãkuxa mãm ka'ok Yeyox kopa 'ãktux. ²²Yã hõnhã 'ũg'ãpax: 'Ügmōg Yenoyanẽn tu', ha Topa Koxuk tek xat, ha nõm puk yĩpkox xip, tu 'a' hãmyũmmũg'ah, 'ok pek hip-tup, 'ok pek xok putup, ²³pãyã Topa Koxuk te 'ã hãm'ãktux kōmẽn xohix tu', hu: “Kanet kopa 'ãxix putup, xix 'ãxũy putup,” kaxiy. ²⁴Pa 'ak kuxãnõg'ah, 'a yãy mũn tuk hi'ah, pãyã Topa tuk hi'. 'Ok pek hi', yã' mãx, pek xok, yã' max, 'ũyiy yãy yōg

hāpxopmā'ax kux. Yeyox tek yāykutnāhā!, 'ūyīy Yeyox yōg hām'āpak max'ax 'āktux, ha'āte hāpxōpmāhā!, yā Topa te' hep xop xohix pu hāmmaxnāhā!.

25—Hōmā 'āte Topa te yāy yōg tikmū'ūn xat 'āktux, tu nūktu 'āxop pu hām'āktux, tu hōnhā hāmyūmmūg: Yā 'āxop tek 'ūm pēnāp-tup'ah 'ūxeheh. 26-27'Ūg'āpax: 'Āte xa hāpxe'e 'āktux, 'āte 'āxop pu hām'āktux, tu Topa yōg hām'āktux'ax xohix 'āktux, tu Topa yōg hām'āktux 'ūm xaxok 'ohnāg. Tik 'ūm yīpkox hok, puxix yāy yōg hāpkummuk mīy'ax tat. 28Pēnā ka'ok! Topa Koxuk te 'āxat, pu' kuxa mām ka'ok xop pēnā max, nūy ka'ogā!; Yā Topak-tok xok nōm pupi!, tu yāy hep 'āta nū'nāhā!, nūy nōm xop kuxa tupmā!. 29'Ūgmōg, ha nōm 'ākopa' pip putup, kokex gāy nām putuk, tu' nūn putup, nūy kuxa mām ka'ok xop kix 'āxop kopah. Kokex gāy te kahnēn kix, hā kaxīy nōm gāy xop te' kuxa mām ka'ok xop kix putup. 30Ha tik kummuk te 'āxop kopa' pip putup, tu hām'āktux hā mō'āmāp-tup, ha' kuxa mām ka'ok xop mōgāp-tup, pu Topa yōg putat xax. 31'Ōg pa mōxip! Pēnā max! 'Ūxaxok hok! Hāmyāxatamuk tikoyuk hā 'āte xa hāmyūmmūgāhā!, 'ok pe 'āmnīy tox hā, 'ok pe hāptup tox hā, 'āte' xohix yūmmūgāhā!, tuk potaha!, 'āp-tup pax tu!.

32—Yā hōnhā 'āte: 'Āxop yā Yeyox yōg tikmū'ūn. Pūyā Topa 'āpēnā max, xix nū mūtik ti!, xix xa hāmyūmmūgā!, xix 'āxex, xix xa hāmmaxnā!, xix xa pexkox yōg hāpxop popmā' yāy yōg tikmū'ūn mūtik. 33'Āk xupkumīy'ah, tuk nōy yōg hāpxop putup 'ohnāg, tuk nōy yōg tayūmak yīpkumīy 'ohnāg, tuk nōy yōg topixxax yīpkumīy 'ohnāg. 34'Āmhok. 'Ūghām punethok, nūy tayūmak pop, nūy hāpxop 'ūm pop, nūy mā!, tu' nōy xop pu' popmāhā!, 35nūy xa hāmyūmmūgā 'ūghām'ax hā, xayīy nōm hāpxop 'ūm pip hok xop pu' hōm, xi' pakut xop pu' hōm, nūy Yeyox yōg hām'āktux'ax xutigā!, hu: “Tikmū'ūn te hāpxop 'ūm pa', puxi' kuxa hittup kutōgnāg, pa tikmū'ūn te hāpxop 'ūm hōm, puxi' kuxa hittup xexka!” kaxīy. 'Ūkux.

36Tu hām'āktux kux, tu' kopaxux hā' xip, tu Topa pu hām'āktux 'ūnōy xop mūtik. 37Ha' potaha!, tu yāy kep hā' mūg. 38Yā' kuxa te Paot xak, hām'āktux'ax hah. Yā' xuktux, hu: “'A xe xatek 'ūm pēnāp-tup'ah,” kaxīy. Ha' mōgāhā mīpkox hah.

Paot te Yenoyanēn ha' mōg

21 1Hak mūg mōg mīpkox hā, tu kōnāg xexka xak, mīpkox te kōnāg yīmū' mōg hā' xak, tuk mūg mōg tu mōktu hāmyīn yūm Kox tu' mōxaha!, tu hāptup nōy ha tak mōg tu mōktu mōxaha hāmyīn yūm Honex tu!, tu xek mūg mōg, tu mōktu kōmēn Pa'at tuk mūg mōxaha!. 2Ha mīpkox nōy mōg Penix tu!, hak mū'āte' xipihī!, tu nōm mīpkox hāk mūg mōg, 3tu hāmyīn yūm Xip pēnāhā!, tu 'īpxax ha' mōg, tu mōktu mōxaha hāpxexka Xit tu!, tu kōnāg hā' mōg, tu mōktu mōxaha kōmēn Tinok tu!, pu mīpkox hāpxop pop'ax xupepmāhā kōmēn Tinok tu!, 4ha' kuxa mām ka'ok xop pipihī!, tu 'āmnīy xohix te 7 hā' nox pip kuxa mām ka'ok xop mūtik, ha Topa Koxuk te Paot xūy'ax yūmmūgāhā! kuxa mām ka'ok xop pu!, yīy: “Yenoyanēn tu 'āmōg hok!” kaxīy. 5Pa xemān nōg, 'īhāk mūg mōg, ha' nōy xop tek mūg mōgāhā

kömēn kunāpa!, xi' xetut xop te!, xix kakxop te!, hak mūg kopaxux hā' pip, tu Topa pu hām'āktux hāpkux tu!, ⁶tu yāy kep mūg, xix yāy hax, tu 'āneo, nūy mōg, hak mūg mōg mīpkox hā, pa' nōy xop te putpu' mōg yāy pet hah.

⁷Ūgmūg pip kōmēn Tinok tu!, tu mōktu mōxaha kōmēn Tonēmāy tu!, tu' kuxa mām xop yōg xape xop pēnāhā!, tu' nox pip 'āmnīy tox hā. ⁸Hāptup 'ihāk mūg mōg, tu mōktu mōxaha kōmēn Xeyanet tu!, tu Pinip pet tu' nox pip. Pinip te hām'āpak max 'āktux pax. Hōmā 'ūkuxa mām ka'ok xop te tik te ⁷yīmōgatux, pu hāpxop xit'ax popmā!, nūy hok xop pu' popmā!, tu Pinip yāykutnāhā kamah. ⁹Ha Pinip kutok hex te ⁴, 'ap yāyta'ah, 'ūxohix yā Topa pupi hām'āktux. ¹⁰Hak mūg nox pip Pinip pet kopah, 'ihā tik te Topa pupi hām'āktux nūn, 'ūxuxet'ax 'Ag, tu Yonex tu' xip, ¹¹tu' nūn, tu nūktu xupep Xeyanet tu!, tu Paot yōg nāy hiy'ax paha!, tu nō yāy yīm kīy, xi' kup kīy, tu:

—Topa Koxuk te hām'āktux, hu: “Hā kaxīy Yenoyanēn yōg Yoneo gāy xop te Paot kīy putup, nūy puknōg xop ha mōgā!” kaxīy.

¹²Ha' xupak, ha tikmū'ūn xik mū'āte Paot tu' xak, hu:

—Yenoyanēn tu 'āmōg hok! Kaxīy.

¹³Ha Paot te:

—Āxop tep-tep mūn mīy? Tep tu 'āpotaha!, tuk kuxa xūygāhā? 'Ak kuxānōg'ah. 'Ok pe kanet kopak xip, 'ok pek xok Yenoyanēn tu!, 'āte Yeyox tu hāpxopmāhā!, nūy Yeyox 'āxet'ax 'āktux max. Kaxīy.

¹⁴Tu hām'āktux kux, hak mū'āte! hup, tu:

—Pūyā Topa yāy putup'ax mīy. Kaxīy.

¹⁵Tuk mūg mōg, tu yāy yōg hāpxop pop, tu' xuk, nūy Yenoyanēn tu' mōg. ¹⁶Ha kōmēn Xeyanet yōg kuxa mām ka'ok xop 'ūm 'ūgmūg mūtik mōg, tuk mūg mōgāhā hāmyīn yūm Xip yōg Mēnān hah, ha' kuxa yūm ka'ok tap, hāmyāxatamuk xohix hā' yūm, ha' pet kopak nox pip.

Paot te Tiak pēnāhā'

¹⁷Tuk mūg mōg, tu mōktu mōxaha kōmēn Yenoyanēn tu!, ha' nōy xop tek mūg pēnāhā!, tu' kuxa hittup. ¹⁸Hāptup 'ihāk mūg mōg Tiak pet hah, ha Paot tek mūg mūtik mōg, ha tik pēnāmax xop xohi' pip. ¹⁹Ha Paot te 'āneo, tu Topa te hāpxopmā max xohix 'āktux, tu Paot ka'ogāhā pu hāpxopmā'ax hāmpuknōg xop kopa 'āktux. ²⁰Ha' xupak, tu' kuxa hittup xexka!, tu Topa 'āktux max, tu Paot pu hām'āktux, hu:

—Ūgnōy: Yoneo xop punethok kuxa mām ka'ok Yeyox kopah, ha xate' yūmmūg, ha Mōyyex yōg xat'ax xohix pu' yīpkox pip kamah, nūy māynāg mīy.

²¹Ha tikmū'ūn te 'āmūn 'āktux, tu 'ākupex, hu: “Paot te Yoneo xop yūmmūgā kummuk, tu nōm xop te hāmpuknōg kopa' pip pu hāmyūmmūgāhā!, hu: “Āpu, Mōyyex yōg xat'ax nīm, tuk-tok pit nāg xax yīmap mep hok, tu mōnāyxop yōg hāpxopmā'ax hittap tat hok kamah,” kaxīy. Pāyā tikmū'ūn te koit. ²²Putep mūn mīy? 'Ānūn, ha' xohix te hāmyūmmūg putup. ²³Nāy, 'ūg'āpax, nūy mīy: Nūnte' pip tik te ⁴, nōm tik te Topa pu hām'āktux xex. ²⁴'Āmōg, tu nōm tik mōgāhā!, tu tik xemep'ax hā' pago, pu Yoneo yōg tikmū'ūn xohix pēnā!, nūy 'āyīpkox xip

Möyyex yōg xat'ax pu' yūmmūg. ²⁵Yāk mū'āte' puknōg xop pu tappet kax'āmi', tu' xat, pu topa komut xop xit'ax mā hok, xix xokxop hep 'āta mā hok, xix xokxop 'ūm māy mūg tup-tex mā hok, xi' nōy hā' xupxpet hok. Kaxīy.

²⁶Yīy Paot mōg, tu tik te 4 mōgāhā', tu hāptup nōy 'ihā yāy pix tik te 4 mūtik, tu Möyyex yōg xat'ax pu' yīpkox xip, tu' mīy, tu tik te Topa pet xexka xop xat'ax pu' xuktux, tu 'āmnīy 'ūm pix'ax kux putup yūmmūgāhā', ha 'āmnīy te 7 mō'nāp-tup, 'ihā yāy pix kux putup. Ha Paot te xokxop 'ūm putex putup, nūy Topa pu mō'hap, nūy tu' hāxyā'.

Yoneo gāy xop te Paot mūg

²⁷Ha xemān puxet hā' nōg putup, ha Paot te Yoneo yōg Topa pet xexka kopa' xip, 'ihā 'Ax yōg Yoneo xop te' pēnāhā', tu Yoneo yōg tikmū'ūn gāyāhā', tu hām'āktux hā nūktu' xohix gāyāhā', tu Paot mūg, ²⁸tu:

—'Iyaet yōg tihik, mā! Nū tik te hāmyūmmūgā kummuk hāpxexka xohix tu', pu Möyyex yōg xat'ax xaxogā', tu Topa pet xexka 'āktux kummuk, tu Genex yōg puknōg xop nūnnāhā', pu Topa xip'ax yāyhāp-tup-tūynāg. Kaxīy.

²⁹Hōmā Yoneo yōg tikmū'ūn te Paot pēnāhā kōmēn kopah, ha 'Ep yōg tik puknōg 'āxet'ax Tonop mōgāhā', ha hāmpel'paxex, hu: “Paot te' mōgāhā Topa pet xexka kopa kamah,” kaxīy. Pāyā' mōgā'ah. ³⁰Ha nōm tikmū'ūn xohix gāy, tu yāy tu nū'nāhā mō'ka'ok, tu Paot mūg, tu Topa pet xexka kopa' xut, tu yāykumīy hāptopah, ha hāpxip 'ohnāg Topa pet xexka mō'yinnīn. ³¹Ha tikmū'ūn te Paot putex putup, ha tik 'ūm te xonat yōg Kononeo pu hām'āktux, hu:

—Yenoyanēn yōg tikmū'ūn xohix gāy nām! Kaxīy.

³²Ha xonat xop yōg Kononeo te xonat xop xat, xix kapitām xop, ha' nūn mō'ak'ok, ha Yoneo yōg tikmū'ūn te' pēnāhā', hu Paot kix kux. ³³Ha Kononeo te Paot mūg, tu' xut gāy xop kopah, tu pipkup māg xap hā' hīy, tu' yīkopit, hu:

—'Ū 'ūm nūhū'? Kaxīy.

Tu xe:

—Putep mūn mīy? Kaxīy.

³⁴Ha nōm tikmū'ūn gāy te hām'āktux hā' yānān, yīy Kononeo te hām'āpak 'ohnāg, hu' xat, hu:

—Kāy mōgā xonat pet ka'ok hah. Kaxīy.

³⁵Ha' mōgāhā mīptut mīpku'īn tu', pa nōm tikmū'ūn tep-tex putūmnāg, yīy xonat xop te Paot pupi tu pepi' xup, tu mīptut hā mōxakux. ³⁶Ha Yoneo yōg tikmū'ūn xohix te' pe' mōg, tu' yīy ka'ok, tu:

—'Ūp-tex! 'Ūp-tex! Kaxīy.

Paot te yāy pupi hām'āktux

³⁷Ha xonat pet ha' mōgāhā', 'ihā Paot te:

—'Ok xatek tux hok 'ū hām'āktux? Kaxīy.

³⁸Ha Kononeo te:

—Xate Genex yīy'ax yūmmüg. 'Ok 'āmün yā 'Eyit yōg tihik, nōm te tik te 4.000 mōgāhā hām panip tu', nūy gohet mütik yāykix? Kaxīy.

³⁹Ha Paot te:

—'Ak mūn'ah. Yāk mūn Tax yōg Yoneo, tu hāpxexka Xinit tuk nāhā', ha Tax mūn kōmēn xexka hok'ah. 'Ok xatek tux hok, 'āte hām'āktux tikmū'ūn pu'? Kaxīy.

⁴⁰Ha Kononeo te:

—'Āpu, 'āyīy. Kaxīy.

Ha Paot te mīpku'īn yīmū' xip, 'ihā' yīm xix, pu tikmū'ūn yīy hok, ha Paot te hām'āktux tikmū'ūn pu', Yoneo xop yāy yīy'ax hā hām'āktux, hu:

22 ¹—'Ūnōy mūnōm xop, xi' tak mūnom xop, 'üg'āpax 'āte hām'āktux. Kaxīy.

²Ha Yoneo yōg tikmū'ūn te yāy yīy'ax 'āpak, tu:

—Nāy, hup, nūy 'īy hok. Kaxīy.

Tu' yīy 'ohnāg, ha Paot te:

³—'Ūgmūn Yoneo, tu kōmēn Tax yōg tihik, tu hāpxexka Xinit tuk nāhā', pa kōmēn Yenoyanēn kopak tittap, ha hāmyūmmügā'ax Gāmāniet te 'ā hāmyūmmügāhā', tu mōnāyxop hittap yōg hāpxopmā'ax xohix 'ā hāmyūmmügāhā', ha 'āte Topa xak 'āxop xohix putuk, tu' xat'ax mīy māynāg. ⁴Hōmāg gāy, tu' kuxa mām ka'ok xop kix putup, Yeyox yōg putat putup nōg tu'. 'Ate' mūg, tu kanet kopa' xex nōm xop, 'ok pe tihik, 'ok pe 'ūhūn. ⁵Ha tik te 'āmānex xop xat'ax te' yūmmüg, xix tik te hāmyūmmüg xop te' yūmmüg. 'A 'āte mō'āmā'ah, pāyā hāpxe'e 'āktux. Nōm xop te 'a' popmāhā tappet, tu kōmēn Namān yōg Yoneo xop pu kax'āmi', 'ūyīy kuxa mām ka'ok xop mūy, tu' kīy, nūy kix. Kaxīy.

⁶Tu xe hām'āktux, hu:

—Tu tak mōg, tu kōmēn Namān tu hāmhūmnāg tuk xip, māyōn yāy kote' yūm 'ihāk xip, ha hāpxip 'ohnāg 'ihā kuyānām xexka te pexkox tu' xakot. ⁷Hak nāhā hām tu', tu yānmūn xupep'ax 'āpak, ha: “Xaot, Xaot, teptu xatek xūygāhā?” Kaxīy.

⁸—Ha 'āte: “'Ū 'ūm 'āmūn?” kaxīy.

—Ha tute: “'Ūgmūn Nāyane yōg Yeyox. Xatek xūygāhā,” kaxīy.

⁹—Ha tikmū'ūn te 'ūgmütik mōg te kuyānām pēnāhā', pāyā 'a' yīy'ax 'ūm 'āpak'ah. ¹⁰Ha 'āte' yīkopit, hu: Yāyā', putep xatek putup 'ū mīy xa'?” kaxīy.

—Ha: “'Āyok, nūy mōg, tu mōktu xupep Namān tu', ha tik 'ūm te xa hām'āktux putup, tu Topa yōg xat'ax xa hāmyūmmügāp-tup,” kaxīy.

¹¹—Yā 'āte hāmpēnā hok nōm kuyānām xexka hah, yīy tikmū'ūn tek mōgāhā', yīm hā Namān tu'. ¹²Ha tik te Topa xak, 'ūxuxet'ax 'Ānānīn, ha Namān yōg Yoneo xop xohix te nōm 'āktux max. ¹³Hak ha' nūn, tuk yīkāgnāg xip, tu hām'āktux, hu: “'Ūgnōy Xaot, Topa te 'āpa maxnāhā', xa xe hāmpēnā,” kaxīy.

—Hak pa max, ha 'āte 'Ānānīn pēnāhā', ¹⁴ha: “Hōmā hāmyāxatamuk xohix 'ihā mōnāyxop yōg Topa te xa yāykutnāhā', xa Topa yōg putup'ax mīy, nūy

tik te hāmyok mīy 'āxet'ax Yeyox pēnā', nūy nōm yīy'ax 'āpax, ha hōnhā xate' xupak, xi' pēnāhā', xix hāmyūmmūg, ¹⁵tu Yeyox yōg hām'āpak māk'ax 'āktux putup tikmū'ūn xohix pu', tu hāpxopmā'ax xohix pēnā'ax 'āktux putup. ¹⁶Putep hip xate'? 'Āpu, 'āte 'āp-tox pix putup, pu Topa 'ākuxa maxnā', nūy 'ōg hāpkummuk mīy'ax xaxogā', 'ihā Yeyox yā 'āxuxyā 'āktux," kaxīy.

¹⁷Tu xe hām'āktux, hu:

—Tuk nūn putpu', tu nūktu xupep kōmēn Yenoyanēn tu', tu Topa pu hām'āktux Topa pet xexka kopah, tu yāy koxuk hā Yeyox pēnāhā', ¹⁸ha hām'āktux, hu: “Mōg, Yenoyanēn kunāpa 'āmōg, yā tikmū'ūn tek mūn 'āktux'ax putup nōg,” kaxīy.

¹⁹—Ha 'āte: “Yāyā', tikmū'ūn te 'āte hāpkummugāhā yūmmūg, ha 'āte' kuxa mām ka'ok xop mūg Topa pet kopah, ha' yūmmūg kamah, yā 'āte kanet ha' mō'tat, tu' kix nōm xop kuxa mām ka'ok 'ākopah, ha tikmū'ūn xohix te' yūmmūg. ²⁰Tikmū'ūn te 'ōg nū'kutnā'ax 'Extep putex, 'ihāk xīp, tu pekpaex max, tup-tup, tu tikmū'ūn yōg topixxax pēnāhā' nōm te 'Extep putex,” kaxīy.

²¹—Ha Yeyox te: “'Āmōg, 'āte 'āmōgāp-tup hāptox tu', hāmpuknōg xop hah,” kaxīy. Tu ta tu' kux. Kaxīy.

²²⁻²³Ha tikmū'ūn te Paot yōg hām'āktux'ax 'āpak, tu' yīy 'ohnāg, pa Paot te' puknōg xop 'āktux, yīy ta tikmū'ūn gāy, tup-tup nōg, tu' yīy ka'ok tu:

—'Ūp-tex! 'Ūp-tex! Kaxīy.

—Tik kummuk putex! Kaxīy.

—Pūyā tu xok! Kaxīy.

Tu topixxax tox mahap, tu hāpkōnōn mō'pok pepi', 'ūgāy tu'. ²⁴Ha xonat xop yōg Kononeo te' pēnāhā', hu Paot xut mō'ka'ok, tu' xat, pu xonat pet xexka ka'ok ha' mōgā', ha xe' xat, pu' kix xokxax hā, ha:

—'Ūxūy hā hām'āktux putup, tu 'ōg hāpxopmā'ax kummuk 'āktux putup. Kaxīy.

²⁵Ha xokxax xit hā' hīy, nūy nō' kix 'ihā' Paot te Kapitām yīkopit, hu:

—'Ok Hōm yōg gohet te' xat, pu Hōm yōg tik 'ūm kix, 'ihā hāpkummuk mīy 'ohnāg? Kaxīy.

²⁶Ha xonat xop yōg Kapitām te' xupak, tu Kononeo pu hām'āktux, hu:

—Nāy, paxip. Putep mūn mīy putup? Kāy yā Hōm yōg tihik! Kaxīy.

²⁷Ha nōm Kononeo nūn, tu Paot yīpkopit, hu:

—'Āyīy. 'Ok 'āmūn yā Hōm yōg tihik? Kaxīy.

Ha:

—Ya hamūn. Kaxīy.

²⁸Ha Kononeo te:

—'Āte tayūmak xexka hā pago, nūy yāyhā Hōm yōg tihik. Kaxīy.

Pa Paot te:

—Yā Hōm yōg 'ūgnāhā', xik mūg tak, xik mūg tut. Yāk mūn Hōm yōg tik xe'e'. Kaxīy.

²⁹Ha xonat xop nōm te' kix putup nū'paha', 'ūkuxānōg tu', ha Kononeo kuxānōg kamah, Paot kīy huh, 'ihā Hōm yōg gohet te' xat hok puyīy Hōm yōg tik kix hok.

Paot te' xexka xop keppa' xip

³⁰Häptup 'ihã Kononeo te Paot xut, tu Yoneo xop yög tik xop pa te hämyümmüg ha' mögähã, xix 'ãmānex xexka xop keppah, pu' yīkopit, nūy Paot yög häpkummuk mīy'ax yümmüg. Ha Paot te Yoneo xexka xop keppa' xip.

23 ¹Tu tik xop pa te hämyümmüg pēnã ka'ok, tu:
—'Ünōy münōm xop, Topa tek kuxa yümmüg, ha hämyok mīy 'ūghi'ax tox hã. Kaxīy.

²Ha tik te 'ãmānex xop xat'ax 'Ānānīn, tu' xat, pu Paot yīkox kix, ³ha Paot te:
—Pūyã Topa 'ākix! 'Āpa max, pāyã 'ākuxa kummuk! Xate' nōy mögähã mō'āmã'ax hã. 'Āyūm, nūy häpxopmã'ax kopit, nūy Möyyex yög xat'ax hã! kopit, pa Möyyex te' kix'ax xat hok. Kaxīy.

⁴Ha tik nōy te:

—Teptu xate 'ãmānex xop xat'ax mǎnōg? Kaxīy.

⁵Ha Paot te:

—'Ūgnōy, 'äte' yümmüg'ah. 'Ok tik te 'ãmānex xop xat'ax nō'ōm? Topa yög tappet tek xat, hu: “Tik te 'äxop xat'ax 'üm 'äktux kummuk hok,” kaxīy.

⁶⁻⁸Tu' xexka xop pēnãhã, ha' yäg Paniye xop, ha' yäg Xanoxeo xop. Paniye xop xohix kuxa mām ka'ok putpu' hi'ax kopah, hu: “Tikmū'ün xohix xakix, tu' putpu' hip-tup,” tu xe: “Yã! pip koxuk, xix pexkox yög nū'pok xop,” kaxīy. Pa Xanoxeo xop xohix kuxa mām 'ohnãg, tu: “'Āmhok. 'A' koxuk 'üm xip'ah. Yã! xakix xe'e!, tu putpu' hip-tup 'ohnãg,” kaxīy. Yīy Paot yīy ka'ok, tu:

—'Ünōy münōm xop: 'Ūgmün Paniye yög, huk kuxa yüm ka'ok putpu' hīnnã'ax kopah. Xatek yīkopit, 'ok pe' xakix xop putpu' hip-tup, 'ok pe' hip-tup hok. Kaxīy.

Ha Paniye xop te hām'äktux hã' nōy yǎnãn Xanoxeo xop mütik, tu' gǎy nãm. ⁹Tu' yīy ka'ok, tu yǎykix putup Paot hã, ha tik te hämyümmüg yok, yã kama Paniye yög, tu:

—Yã! max Paot! 'Ok pe koxuk 'üm, 'ok pe pexkox yög nū'kutnã'ax 'üm te kǎy pu hām'äktux, kopxix Topa mütik yümüg kumīy putup hok. Kaxīy.

¹⁰Ha' gǎy xexkah, yīy xonat yög Kononeo te Paot hã' yīpkutuk, tu' xat, pu' xut, tu xonat pet ka'ok ha' mögähã.

¹¹'Āmnīy koxtap 'ihã Yeyox xip Paot yīka, tu:

—'Ākuxǎnōg hok! 'Āmün tek mün pupi hām'äktux, tu 'ügün 'äktux putup kōmēn Yenoyanēn tu', xix häpxexka Hōm tu kamah. Kaxīy.

Ha' xaptop hã Paot putex putup

¹²Häptup 'ihã Yoneo xop te yǎy tu nū'nãhã, tu hām'äktux xex, tu Topa 'äxet'ax 'äktux hã hām'äktux xex, tu:

—Paot putex hok, kopxik xit hok! Kaxīy.

¹³Yã tik te 40 tep-tex putup, ¹⁴tu' mög 'ãmānex xexka xop hah, xix tik xop te hämyümmüg hah, tu:

—'Ũgmũ'áte hãm'áktux xex Topa pu', hu: "Paot putex hok, kopxik xit hok," kaxĩy. ¹⁵'Ămög, Höm yög xonat xop yög Kononeo hah, nũy tu' xax, pu Paot nũnnãy, 'ũyĩkopit nũy, pãyã mō'ãmã'. 'Ũgmũ'átep-tex putup putat hã, 'ũxaptop huh 'ũp-tex putup. Kaxĩy.

¹⁶Pa Paot 'ũptix te' xupak, tu' mōg tu mōktu xupep xonat pet ka'ok xexka tu', tu Paot pu' xuktux, ¹⁷ha Paot te xonat yög Kapitãm xãnãhã', hu: —Nũ tik tuktup mōgã 'ãxop yög Kononeo hah, puyĩy hãm'ãpak'ax 'ãpax. Kaxĩy.

¹⁸Ha' mōgãhã' nôm Kononeo hah, tu:

—Paot te kanet kopa' xup, tuk xãnãhã' pu tik tuktup mōgã 'ãhah. Kaxĩy.

¹⁹Ha Kononeo te tik tuktup yĩm hã' müg, tu' xut, tu' yĩkopit, hu:

—Xate putep 'áktux putup? Kaxĩy.

²⁰Ha tik tuktup te:

—Yoneo xop te yãy tu nũ'nãhã', nũy 'ãmũn tu' xax, xa hãptup 'ĩhã Paot mōgã', pu xe' yĩkopit. Pãyã mō'ãmã'. 'A' yĩkopit putup'ah, pãyãp-tex putup. ²¹Yã tik te 40 te hãm'áktux xex Topa pu', tu' xit hok xi' xo'op hok, nũy Paot putex. Yã hõnhãp-tex putup. Kaxĩy.

²²Ha Kononeo te tik tuktup pu hãm'áktux, hu:

—Hãm'áktux hok, 'a' xaptop hok'ah. Kaxĩy.

Ha Paot mōgãhã Gohenanok Penik hah

²³Tu Kapitãm 2 xãnãhã', tu' xat, hu:

—'Ămniy koxtap 'ĩhã mōg kômẽn Xeyanet tu', yã hõnhã kãmãnok te 200 pop, xix xonat xop te 200 pop kamah, pu kãmãnok yĩmũ' mãm, ha xonat nõy te 200, te yã' pata hã' mōg, tu pox tox tat pop. ²⁴Ha Paot pu kãmãnok nũnnãy, tu Gohenanok Penik ha' mōgã'. Kaxĩy.

²⁵Tu Gohenanok Penik pu tappet kax'ãmi', hu:

²⁶"'Ũgmũn Kononeo Kanao Nix, 'áte Gohenanok xe'e Penik pu kax'ãmi', nũy hãm'yũmmügã', tu 'ãneo.

²⁷Yoneo xop te nũ tik müg, nũy putex, hak xut Yoneo gãy xop kopah. Yã hãpxexka Höm yög tik 'ãxa. ²⁸Tu' mōgãhã Yoneo yög pa te hãm'yũmmüg xop hah, nũy Paot yög hãpkummuk mĩy'ax yũmmüg. ²⁹Ha Yoneo xop te yãy yög xat'ax hã' yĩkopit, tu' kupex, tu Paot yög hãm'yũmmüg'ax puknög 'áktux, pãyã kãy te tik 'ũm putex 'ohnãg, tu yã' xupxet 'ohnãg, 'a' kummuk'ah, 'ap putex putup'ah 'áte', yã kanet kopa' xix 'ap putup'ah 'áte kamah. ³⁰Ha Yoneo xop tep-tex putup 'ũxaptop huh, yĩy hãpxip 'ohnãg 'áte xa mōgãp-tup, pu Yoneo xop kupeh, ha xate' kopit. Tu ta tu' kux." Kaxĩy.

³¹Ha ta 'ãmniy koxtap 'ĩhã xonat xop te kãmãnok yĩmũ' mãm xop mōg, ha xonat xop te pox tox tat mōg, tu' pata hã' mōg, tu putpu' mōg Yenoyanẽn tu', ³²ha kãmãnok yũmũ' mãm xop te Paot mütik mōg. Tu' mōg, ³³tu mōktu mōxaha kômẽn Xeyanet tu', tu Gohenanok Penik pu tappet hõm, tu Paot mōgãhã Penik keppah. ³⁴Ha tappet mō'kupix hãmãxap, tuk-nãy tu' yĩkopit, hu:

—Pi'yā 'ōgnū hahām? Kaxīy.

Ha Paot te:

—Yā Xinit. Kaxīy.

³⁵Ha Penik te:

—Nāy, 'āte 'ōg hām'āktux'ax 'āpak putup, 'ihā kupex'ax xop nū'. Kaxīy.

Tu' xat, pu Paot xix 'ūxat'ax 'Enot yōg kopit'ax pet kopah, ha' mōgāhā', tu' xix.

Yoneo xop te Paot kupex

24 ¹Āmnīy te 5 nōg, 'ihā tik te 'āmānex xop xat'ax 'Ānānīn nūn, tu nūktu xupep kōmēn Xeyanet tu', xix Yoneo xexka xop nūn, xix tik gāy xop yōg hām'āktux'ax Tet nūn, nūy Paot kupeh. ²Ha' xānāhā', ha Tet te nōm Gohenanok pu hāmyūmmūgāhā' hu:

—Gohenanok Penik: Tikmū'ūn xohix te 'āp-tup pax, 'ōg hāpxopmā'ax max hah, ha Yoneo yōg tikmū'ūn kuxa xohix mām, tu' hittup, xate hāmyūmmūg hah, ³yīy tikmū'ūn xohix te 'āmūn 'āktux max. Yā' puxi'. ⁴Āte hām'āktux kutōgnāg putup. 'Ūg'āpax, koxix hāpxip kutōgnāg hām'āktux kux. ⁵Paot te hām'āktux kummuk, tu' yīy hā nūktu tikmū'ūn xohix gāyāhā', tu hāpxexka xohix tu' mōg, yā Nāyane yōg xop xohix xat. ⁶Hōmā tute Yoneo yōg Topa pet xexka yāyhāp-tūynāg putup, tu tik puknōg mōgāhā' Topa pet xexka kopah, pak mū'āte' mūg, nūy hāpxopmā'ax kummuk kopit 'ūgmū yōg xat'ax hā. ⁷Pa 'āxop yōg Kononeo gāy, tu Paot xut, tu' mōgāhā', tu' xat, pu nū nōm xop kāy kupeh, nūy Paot kupeh 'ākeppah. ⁸'Āpu, 'ūyīkopit, nūy hāpxopmā'ax kummuk yūmmūg. Kaxīy.

⁹Ha Yoneo xop te:

—Ya hamūn! 'Ap koit'ah! Kaxīy. Pāyā' koit.

Paot te yāy 'āktux Penik keppah

¹⁰Ha Gohenanok Penik te tu' yīm xix, nūy Paot pu':

—'Āyīy, kaxīy.

Ha Paot te:

—Gohenanok Penik, hāmyāxatamuk xohix hā xatek mū yōg tikmū'ūn yōg hāpxopmā'ax kopit max, yāk hittup, nūy xa hām'āktux. ¹¹Āmnīy xohix te ¹²'ihā 'āte Yenoyanēn tu' xupep nūy nūk xup Topa pu', 'ūxohix te' yūmmūg. ¹²Āte hām'āktux hā' nōy yānān 'ohnāg tikmū'ūn mūtik, tuk yīy hā gāyā 'ohnāg Topa pet xexka kopah, 'a kōmēn kopa hāk 'ūm gāyā'ah. ¹³Yoneo xexka xop te koit. ¹⁴Pa Yeyox yōg putat hāk xip, tu Topa xak, tu nōm pu nūk xup, tuk yīpkox xip Mōyyex yōg xat'ax xohix pu', xix Topa pupi hām'āktux xop xohix pu'. ¹⁵Tuk kuxa yūm ka'ok: yā tikmū'ūn te hāmyok mīy te putpu' hip-tup, xix tikmū'ūn te hāpkohe mīy te putpu' hip-tup kamah, ha nōm Yoneo xop te yāy putpu' hi'ax hip kamah, tu hāmmax hip. ¹⁶Yāk hāmyok mīy, ha Topa tek yūmmūg, xix tikmū'ūn. Kaxīy.

¹⁷Tu xe hām'āktux, hu:

—Ha hāmyāxatamuk xohix nōg, 'ihāk nūn, tu nūktu xupep yōgnū hāpxexka tu', nūy hāpxop hok popmā Topa pu', xix yōgnū tikmū'ūn pu',

18 'ihã 'Ak yõg Yoneo xop nûn, tuk pẽnãhã Topa pet xexka kopah, ha 'ãte yã pix, Topa yõg xat'ax tek xat hah, hak yiy 'ohnãg, yãk puxehnãg xip.
 19 Pi'yã' pip 'Ax yõg Yoneo xop hõnhã? 'Ap nûn'ah, nüy 'ügkupeh. 20 Hõmã Yoneo xexka xop tek yikopit. 'Äpu, nõm xexka xop 'üyãnãn tu' yikopit, 'ok pe 'ãte hãp xe'le 'ãktux, 'ok pe 'ãte koit. 21 Pãyã hõmã nõm xop te yõgnũ hãm'ãktux'ax putup nõg, 'ihã 'ãte hãm'ãktux, hu: "Hõnhã xatek yikopit, 'ok pe xakix xop putpu' hip-tup, 'ok pe putpu' hip-tup hok," kaxiy. Tu ta tu' kux.

22 Ha Penik te hãmyümmüg, tu Topa yõg putat yümmüg max, pãyã 'ap Paot yikopit putup'ah, hu:

—Nãy, 'ühip, pu xonat xop yõg Kononeo Nix nũ! 'Ünün, yiy ta 'ãte 'ãkopit. Kaxiy.

23 Tu' xat, ha Paot xix mĩptut kopah, pu xonat pẽnã', pãyã hãpkumep mĩptut xexka kopah, tu hãpxopmãp-tup, puxi' mĩy, ha' tux hok kamah pu' xape xop pẽnã', nüy hãpxop 'üm popmã Paot pu'.

Paot te yã pupi hãm'ãktux Penik keppah, xix Nonoxit keppah

24 'Ämnỹ kutõgnãg 'ihã' nõg, ha Penik nûn, xi' xetut Nonoxit nûn kamah, nõm Yoneo hex, ha Paot xãnãhã', ha Paot te tikmũ'ün kuxa yüm ka'ok Yeyox Kunnix kopa 'ãktux, ha' xupak. 25 Ha Paot te:

—Topa te' xak, pu tikmũ'ün xohix hãmyok mĩy, ha' yõg hãpxopmã'ax xohix kopit putup, 'ok pe' max, 'ok pe' kummuk. Kaxiy.

Ha Penik kuxãnõg, tu Topa te' kopit'ax yĩpkutuk, hu:

—Mõg, mõg! Kaxiy.

Tu xe:

—Hãptup nõy koxix 'ãxãnã'. Kaxiy.

26 Pãyã tayũmak 'üm hip, pu Paot tu tayũmak 'üm xax, yiy xãnã punethok, hãm'ãktux hã' nõy yãnãn nãm huh, pa yã Paot te tu' hõm 'ohnãg.

27 Ha hãmyãxatamuk 2 nõg, ha Penik mõg kuma' mõg, ha Pox Pex nûn 'üyãnãn tu', ha Penik te Paot xix mĩptut kopah, nüy Yoneo xop kuxa hittupmã'.

Paot te Hõm yõg tik te' xohix xat'ax tu' xak, puyi' xut pu mõg

25 1 Ha Pex nûn tu nõktu kãmãn Xeyanet tu' xupep, ha 'ãmnyỹ 3 nõg, 'ihã' mõg tu mõktu Yenoyanãn tu' xupep. 2 Ha 'ãmãnex xexka xop te hãmyümmügãhã', xix Yoneo xexka xop te hãmyümmügãhã', tu Paot 'ãktux, tu' kupex, tu' xak, 3 pu Paot nũnnãy Yenoyanãn tu', 'üxaptop putex putup ha putat kopah. 4 Pa Pex te:

—'Ämhok. Yã' xip Xeyanet tu', hak mõg putup putpu Xeyanet tu'. 5 Nãy, pax xa Paot kupex, hu ta mõg 'ügmũtik, nüy kupeh. Kaxiy.

6 Ha 'ãmnyỹ te 10 nõg, 'ihã Pex te Xeyanet tu putpu' nûn, tu hãptup nõy 'ihã' xat pu Paot nũnnãy. 7 Ha' nûn, ha Yenoyanãn yõg Yoneo xop te' kupex nãm, tu yikopit, pãyã hãm'ãktux hã koit, ha Pex te' gãy xop yõg hãm'ãktux 'apak, tu:

—'İntu'. 'Äte hãmyümmüg'ah, 'ok pe Paot te hãpkummuk mĩy, 'ok pe' mĩy hok? Kaxiy.

⁸Ha Paot te:

—'Āte hāpkummuk 'ūm mīy 'ohnāg, 'ok pe Yoneo yōg Topa pet xexka tu', 'ok pe Hōm yōg gohet puknōg tu'. Kaxīy.

⁹Pa Pex te Yoneo xop kuxa hittupmāp-tup, hu:

—'Ok mōg putup Yenoyanēn tu', 'āte 'āyīkopit? Kaxīy.

¹⁰Pa Paot te:

—'Ak mōg putup'ah. 'Āte Xex putup, pu yōgnū hāpxopmā'ax kopit. Yā' max. 'Āte hāpkummuk 'ūm mīy 'ohnāg, ha xate' yūmmūg. ¹¹Pax pu Yoneo xop koit hok, kopxix xupap-tup hok. Yā 'āte' xok'ax yīpkutuk 'ohnāg. Pax pu Yoneo xop koit, ha 'āte hāpkummuk 'ūm mīy hok, 'āpu' xat puk putex hok. 'Āte Hōm yōg tik te' xohix xat'ax putup, yā 'āte Xex putup, puk yīkopit. Kaxīy.

¹²Ha Pex te' xexka xop mūtik hām'āktux hā' nōy yānān, ha hām'āktux kux, tu Paot pu hām'āktux, hu:

—Xate Xex mūn putup, hu Xex ha 'āmōg. Kaxīy.

Paot te 'Aginip keppa' xip

¹³Hāpxip kutōgnāg 'īhā' 'Aginip nūn, tu tikmū'ūn xat, tu' nūn tu nūktu kōmēn Xeyanet tu' xupep, xix Menenīn, tu Pex ha' nūn, nūy 'āneo. ¹⁴Tu' tihī', 'āmnīy xohix hā' tihī', ha Pex te Paot 'āktux 'Aginip tu', tu hām'āktux, hu:

—Tik 'ūm xip, ha Penik te mīptut kopa' xix, tu' xut pu mōg 'ohnāg. ¹⁵Hōmā 'ūkxip Yenoyanēn tu', ha Yoneo yōg 'āmānex xexka xop te' kupex, tup-tex putup, ¹⁶pa 'āte: "Hōm yōg gohet te' xat hok pu tik 'ūm 'ūhok tup-tex hok. 'Āmhok. Hōm yōg gohet te' xat, pu' kupeh xop kāy ha' nūn, nūy kupeh, pu kāy yā yāy 'āktux, nūy kupex xop yōg hām'āktux hā' yānān," kaxīy. ¹⁷Ha' nūn yāy tu nū'nāhā', ha 'āte' hīp putup'ah, tu hāptup nōy hā' xat, pu Paot nūnnāy, 'ūyī' yīkopit. ¹⁸Ha' kupex xop te' kupex, pa kāy te hāpkummuk mīy 'ohnāg, tup-tex 'ohnāg, tu' xupxet 'ohnāg, ¹⁹pāyā Yeyox 'āktux, nōm xok, ha Yoneo xop te hām'āktux hā' nōy yānān nām Paot mūtik, ha Paot te: "Yeyox hi putpu'. 'Ūgkuxa yūm ka'ok Yeyox putpu' hi'ax kopah," kaxīy. ²⁰'Āte hāmpē'paxex, hu: "Pute 'ūm nūhū'? Kaxīy. Tuk yīkopit, pāyā' yīkopit yūmmūg'ah, hu Paot pu': "Ok mōg putup Yenoyanēn tu', 'āte 'āyīkopit?" kaxīy. ²¹Pa Paot te: "'Āmhok. 'Ak mōg putup'ah. 'Āte Xex putup, puk yīkopit," kaxīy. 'Āte' xat, pu nūnte' xix, pu Xex ha mō'kutnā'. Kaxīy.

²²Ha 'Aginip te:

—'Āte kāy yōg hām'āktux 'āpak putup. Kaxīy.

Ha Pex te:

—Hāptup 'īhā hām'āpak putup. Kaxīy.

²³Hāptup 'īhā 'Aginip nūn, tu tik te' xat'ax yōg topixxap max mō'tat, tu Pex yōg mīptut hām'āta kox xexka hā' mō'nāhā', tu kōmēn yōg xexka xop xix xonat yōg Kononeo xop mūtik mōxakux, ha Pex te' xat, pu Paot nūnnāy, ha' nūn. ²⁴Ha Pex te:

—'Āxexka 'Aginip, xix 'āxexka xop xohix: 'Āxop te kāy pēnāhā', yā Yoneo yōg tikmū'ūn xohix te' xak, nūy tup-tex. ²⁵Ha 'āte' yīkopit, ha hāpkummuk

xexka 'üm mÿy 'ohnäg, pup-tex, ha yÿmÿg xat'ax xexka Xex mÿn putup, pu' yÿkopit, yÿy Xex ha 'äte mö'kutnâp-tup. ²⁶Tu tappet tu kax'âmi putup Xex pu kamah. Pute 'üm 'äte kax'âmi'? 'Ap yÿmmÿg'ah 'äte!. Hu 'äte Paot xat, pu hãm'äktux, xayÿy yÿkopit. Tu' yÿkopit kux, kopxix kax'âmi', ²⁷nÿy tappet hã Paot yÿg hãpkummuk mÿy'ax Xex pu hãmÿÿmmÿgã'. Kaxÿy.

Paot te yãy pupi hãm'äktux 'Aginip keppah

26 ¹Ha 'Aginip te Paot pu hãm'äktux, hu:
—'Äpu, 'äyÿy. Kaxÿy.

Ha Paot te' yÿm pepi' xix, tu hãm'äktux, hu:

²⁻³—'Äxexka 'Aginip, xate Yoneo xop xat, tu Möyyex yÿg xat'ax yÿmmÿg, yÿk kuxa hittup, tu kupex xop pu hãm'äktux hã' yãnãn putup. 'Üghip, nÿy 'üg'äpax.

⁴—Yoneo xop xohix tek yÿmmÿg, yã yÿgnÿ hãm tuk xip hãmãxap, tuk nÿn Yenoyanãn tu', 'ihãk mÿn kaxxop tuktu, xi' xiptap. ⁵Yoneo xop tek yÿmmÿg, hak mÿn Paniye xop yÿg, nÿm xop te Topa xak xe'ëgnäg. ⁶Yã hÿnhã xatek yÿkopit Topa te hãm'äktux xex hã, ha Topa te mÿnãyxop pu hãm'äktux xex, hu: “Tikmÿ'ün xohix te putpu' hip-tup,” kaxÿy. ⁷Hömã Topa te hãm'äktux xex, ha Yoneo yÿg tikmÿ'ün xohix te' xak, tu 'ãmniy xohix hã Topa pu nÿk tetex, pa Yoneo xop tek kupex, 'ihãk kux yÿm ka'ok putpu' hi'ax kopah, xix hãmmax hip. ⁸Teptu hãmpe'äpanôm? 'Ok Topa te hãpxopmä'ax ka'ok mÿy hok? Yã' mÿy. 'Ok Topa te putpu 'ähinn'äp-tup hok? Yãp-tup. Kaxÿy.

⁹⁻¹⁰Tu xe hãm'äktux, hu:

—Höma 'äte hãmpe'paxex, hu: “Yeyox mÿn kummuk,” kaxÿy. Tu Yeyox 'äktux kummuk, tu' kuxa mãm ka'ok xop xex kanet kopah, ha Yoneo yÿg 'ãmãnex xop tek xat, tu 'ã' hÿm yãy 'äxet'ax, 'üyÿy tu xeh, tu' kix, tuk hittup. ¹¹Tu' kix kakixnäg Yoneo yÿg Topa pet kopah, tu Yeyox 'äktux kummuk yÿgãhã', tu' gãynãm, tu' pek mög hãptox tu', nÿy mÿy, nÿy xÿygã'.

Paot te yãy kuxa yÿm 'äktux

¹²—Yã 'ãmãnex xexka xop te 'ã' hÿm yãy 'äxet'ax, tu kax'âmi tappet tu', ha 'äte nÿm tappet mögãhã', tuk mög'ax Namãn tu', ¹³tu putat hãk mög, mãyön te yãy kote' yÿm 'ihã', 'äte kuyãnãm ka'ok pãnãhã', ha pexkox tu' xakot, ha mãyön yãnãm kutögnäg, pa Topa yÿg yãnãm xexka', hak nÿy xop te' pãnãhã kamah. ¹⁴Hak mÿg xohix hãm tu' xakux, ha 'äte yãnmÿn xupep'ax 'äpak, ha Yoneo xop yãy yÿy'ax hã hãm'äktux, hu: “Xaot, Xaot: Teptuk xÿygãhã'? Yã tu nÿ yãy mÿn xÿygãhã',” kaxÿy.

¹⁵—Ha 'äte: “'Ü 'üm 'ãmÿn?” kaxÿy.

—Ha:

“'Ügmÿn yã Yeyox, ha xatek xÿygãhã' kuxa mãm ka'ok xop hã. ¹⁶Pa 'äyok, tuk-nihã xip. 'Ähak nÿn, nÿy xã yãy'kutnã', xak mÿn pu hãpxopmä', xak mÿg pãnãhã hãmãxap, ha xa' mÿg putup 'üxeheh, xak mÿn 'äktux tikmÿ'ün pu'. ¹⁷Yã 'äte mö'äktunãp-tup Yoneo yÿg tikmÿ'ün hah, xix hãmpuknög xop hah,

tu 'āpēnānā' xip, nūy 'āxut nōm gāy xop kopah. ¹⁸'Āte nōm tikmū'ūn kuxa hittupmāp-tup, 'ōg hām'āktux'ax hā' hittupmāp-tup, pu hāpkoxtap 'ūkuxa nīm, ha Topa yōg yānām xe'e te' kuxa hittupmāp-tup, pu yōgnū putat hā' mōg, ha xate hām'āktux hā, 'āte nōm tikmū'ūn mōy putup Hāmḡāyāgnāg tu', puyīy Topa' kummuk mīy'ax xaxogā', pu tu kux, puyīy yāyhā Topa yōg tikmū'ūn, nōm xop kuxa mām ka'ok 'ūgmūn kopah." 'Ūkux. Kaxīy.

¹⁹Tu xe:

—'Ok yūmmūg, 'āxexka 'Aginip? 'Ūgmūg xuxyā tek xat pexkox tu', hak yīpkox xip. ²⁰Tu hām'āktux Namān tu hāmāxap, tuk-nāy tu Yenoyanēn tu hām'āktux, xix hāpexka Yonex tu', xi' puknōg xop punethok pu', tu yāyhāhup yūmmūgāhā', pu hāpkummuk mīy kux, nūy Topa ha mōg, puyīy hāmyok mīy, pu' xohix te yāyhāhup pēnā'. ²¹Pāyā Yoneo xop tek putup nōg, tuk mūg, 'īhā Topa pet xexka kopak xip, hak putex putup. ²²Pa Topa tek ka'ogāhā', yīy 'āte hām'āktux kux 'ohnāg, tu' xohix pu hāmyūmmūgāhā', tu Topa tappet hittap puxehnāg hā hāmyūmmūgāhā'. Hōmā Mōyyex te hām'āktux, xix Topa pupi hām'āktux xop te hām'āktux kamah, yīy 'āte tikmū'ūn xohix pu hām'āktux hāmāxap, ²³nūy Yoneo yōg tikmū'ūn kuxa kummuk xit, xi' puknōg xop kuxa kummuk xit, yā hōnhā' hep xop xohix kuxa max yānān'ax. Tu ta tu' kux. Kaxīy.

²⁴Tu hām'āktux kux, ha Pex yīy ka'ok, tu:

—Paot, 'āp-tox kummuk! Xate tappet punethok mō'kupix, ha tappet te 'āp-tox kummugāhā'! Kaxīy.

²⁵Pa Paot te:

—'Ap 'ūkputox kummuk'ah. Yā hāp xe'e 'āktux. Kaxīy.

²⁶Tu 'Aginip pu hām'āktux, hu:

—'Āte yāyhāhup 'ohnāg, ha tikmū'ūn xohix te' yūmmūg. 'Aginip, xate hāmyūmmūg kamah. Topa te' xaptop hā' mīy 'ohnāg. ²⁷Hōmā Topa pupi hām'āktux xop te Topa te hām'āktux 'āktux. 'Aginip, 'ok 'ākuxa yūm ka'ok Topa pup hām'āktux xop kopah? Yā' yūm. 'A' yūmmūg. Kaxīy.

²⁸Ha 'Aginip te:

—Nāy, 'ok 'āpe'āpaxex, hu: "Hāpxip kutōgnāg 'īhā 'Aginip te yāhāp-tup Kunnix yōg"? 'Āmhok! 'A yāyhāp-tup'ah 'āte'. Kaxīy.

²⁹Ha Paot te:

—Yā' max 'āmūn yāyhā Kunnix yōg. 'Ok pe hāpxip kutōgnāg 'īhā', 'ok pe hāpxip tap 'īhā', 'ātep-tup 'āxohix yāyhā Kunnix yōg, 'ūkputuk, pa kupuk māg xap hā' hīy'ax 'a' putup'ah. Kaxīy.

³⁰Ha 'Aginip tek-nīhā' xip, xix Pex, xix Menenīn, xi' xexka xop xohix te nū mūtik mām xop, ³¹tu' mōg, tu hām'āktux hā' nōy yānān, hu:

—Nūhū tik max, ha' max'ah tik xix kanet kopah, tup-tex mūn kummuk. Yā tik te hāpxopmā max. Kaxīy.

³²Ha 'Aginip te Pex pu hām'āktux, hu:

—Kāy xupa'ax, pāyā Xex mūn ha' mōg putup, pu hāpxopmā'ax tu' kopit. Pūyā' mōg! Kaxīy.

Paot te kômên Hôm ha' mōg

27 ¹Ha Paot mōgāp-tup hāpxexka 'Itat tu' (hak mūn Nok te xe kax'āmi', tuk mōg Paot mūtik), mīpkox hāk mūg mōg, nōm mīpkox te kōnāg yīmū' mōg, ha xonat xop te 100 yōg kapitām te Paot pēnānā' xip, tu' kāy nōy xop pēnāhā kamah, yā Kapitām Yot te xonat xop 'Īpet yōg. ²Hak mūg mōg kômên 'Anamātīn yōg mīpkox hā, tu hāpkux te hāpkūyāgnāg hāk mūg mōg, ha hāpxexka Māxenōn yōg 'Anixtah te kômên Texanōn, tu' xip, tu' nūn, tuk mūg mūtik mōg. ³Ha hāptup 'Īhā kômên Xinōm tu' mōxaha', ha Yot max Paot tu', tu hām tu' mōg tux hok, pu mōg, nūy xape xop pēnā', pu nōm Paot mō'nīynām, nūy nō hāpxop tu' popmā', ha 'āmnīy hā' xape pet tu' nox xip, tu mō'yōn. ⁴Tu hāptup 'Īhāk mūg mōg mīpkox hā, tu hāmyīn yūm Xip tu' yīpxe'e hāk mūg mōg, 'āmuuh ka'ok tu' keppa mō'kouk hah. ⁵Hak mūg mōg kōnāg xexka xak tu', ha hāpxexka Xinix yīkāgnāg, xix hāpxexka Pēnpit, tuk mūg mōg, tu mōktu mōxaha hāpxexka Nix yōg kômên Mīha tu'. ⁶Ha xonat yōg Kapitām te kômên 'Anexānit yōg mīpkox xipihi', ha' nūn, tu hāpxexka 'Itat ha' mōg putup, hak mūg mōg nōm mīpkox hā.

⁷Tuk mūg mōgnāg, pak mūg mōg pu'ūgnāg, 'āmuuh ka'ok hah, ha 'āmnīy punethok 'Īhā mōxaha hāmyok tu, kômên Xinit keppah, pa 'āmuuh gāy, ha mīpkox mōg 'ohnāg, hak mūg mōg yīpxax hah, hāmyīn yūm Kenet tu', ha kômên Xanmōn yīkāgnāg. ⁸Ha mīpkox te hām tu' xupep, tu hāpkux yīkāgnāg hā' xip, tu' mōgnāg mōg, tu mōktu mōxaha hāmyīkox Kōnāg Xexka Yīkox Max tu', ha kômên Nayet te hāmhūmnāg.

⁹Tuk mūg pip 'āmnīy xohix hā, ha hāmyāxatumuk ka'ax, yā Yoneo xop te 'āmuk xexka 'āxet'ax “yāy kuxa māxnā'ax” mīy tap, ha hōnhā 'āmuuh gāy 'āxi mō'kouk, ha tex gāy, hu kōnāg xexka gāyāhā', ha Paot te tik te mīpkox mōgāhā pu hām'āktux, hu:

¹⁰—Tihik, hōnhā mīpkox hāk mōg max'ah, 'āmuuh ka'ok hah, Tu' gāy, hak mūg kix putup kōnāg gāy hā, ha kōnāg te mīpkox kopa' pip hāpxop koxyōy putup, xix mīpkox, xix tikmū'ūn kix putup kamah. Kaxīy.

¹¹Pāyā Kapitām Yot te hāmpē'paxex, hu:

—Paot te mīpkox mōg'ax yūmmūg kutōgnāg, pa mīpkox xuxyā te' yūmmūg xexka', xix mīpkox yōg tik mōgā'ax. Kaxīy.

Hu' yīpkox pip 'ohnāg Paot pu'. Ha mīpkox xuxyā xi' mōgā'ax mōg putup. ¹²Hāmyīkox Kōnāg Xexka Yīkox Max mūn max'ah, pu māyōn 'ānuk mēy 3 hāk nox pi', nūy 'āmuuh gāy kux'ax hip, nūy hām'āxi hāk pip, hu kômên Penix tu' mōg putup, nūy hāmyīn yūm Kenet yōg hāmyīkox tuk nox pi'. Penix te mō'kouk yok ha' yūm, hu' max, pu māyōn 'ānuk nūn 3 hāk pip.

'Amuuh gāy te mō'kouk

¹³Ha 'āmuuh te mō'kouk ha' xuxi', ha hāmpē'panōm, hu: “Yā hōnhā' max 'āmuuh,” kaxīy. Ha pipkup putux te mīpkox hām tu' xup kōnāg kopah, ha' xut, tu' mōg, tu Kenet yōg hāpkux hāmhūmnāg hā' mōg. ¹⁴Hāpxip kutōgnāg

'ihã 'ãmuuh gãy te hãm tu' xupep, 'ãmuuh 'ãxet'ax Nõnet, tu' gãy xe'ëgnãg, ¹⁵ha tik te mĩpkox 'ũm mōgã hok, yã 'ãmuuh te nuhuknãm, yĩy mĩpkox yãy tu' mōgãhã'. ¹⁶Ha hãmýn yũm Kanap tuk mũg mōg, pu 'ãmuuh hãnãhã', ha' mōg, 'ihã 'ãmuuh te xuxik-tõgnãg, mĩpkox kutõgnãg te kõnãg kopa' xip, ha' xut, kõnãg hã nõm nũnnãhã', tu mĩpkox xexka kopa pepi' xex, tu' hĩy. ¹⁷Ha' hĩy kux, hak mũg mĩpkox xexka hĩy ka'ok poxit xexka ka'ok hã, nõm kup tu' hĩy ka'ok, pu 'ãmuuh koxyõy hok, hak mũg kuxãnõg, Nip yõg hãpkux kummuk yĩpkutuk tu', tu mĩpkox yõg topixxax xexka keppa nũnnãhã', 'ãmuuh te nõm mō'kouk, tu' mōgãhã', pu Nip tu mōg hok. ¹⁸Ha 'ãmuuh gãy te mĩpkox mō'yõn, tu mahamnãm kõnãg yĩmũ', ha mĩpkox te hãpxop punethok tat, tup-tux, hak mũg kuxãnõg, tuk mũ'ãte nõm hãpxop mō'pok kõnãg tu', pu mĩpkox te tutnap. ¹⁹Tu 'ãmnĩy 3 hãk mũ'ãte yãy yõg yĩm hã mĩpkox yõg hãpxop xupepmãhã'.

²⁰'ãmnĩy xohix hãk mũ'ãte mãyõn pãnã 'ohnãg xix mãyõnnãg, ha ta 'ãmuuh ka'ok, hak mũ'ãte hãmpekpaxex xakix putup.

²¹'ãmnĩy punethok hãk mũg xit 'ohnãg, yĩy Paot yok, tuk-nĩhã' xip nõm tik xop kopah, tu:

—'ãxop, teptu 'ãyĩpkox 'ohnãg 'ũgmũn pu'? Teptu Kenet tu' nox 'ãpip hok? 'ãte 'ãyumũgãp-tup, pãyã xatep-tup nõg, yã hõnhã hãpxop punethok xaxogãhã' kõnãg xexka kopah. ²²Pa 'ãkuxãnõg hok! 'Ap tik 'ũm xok putup'ah, pa mĩpkox mũn yãy koxyõy putup. ²³'ãte Topa pu hãpxopmãhã', yĩy 'ãmnĩy koxtap hã pexkox yõg nũ'kutnã'ax tek ha' nũn, tuk yĩka' xip, ²⁴tu 'ã hãm'ãktux, hu: "Paot, 'ãkuxãnõg hok. Xate Xex keppa xip putup, ha Topa te mĩpkox kopa tikmũ'ũn pãnãnã' xip, xayĩy 'ãxakix hok, yã' hip-tup," kaxĩy. ²⁵Yĩy 'ãkuxa hittup, Topa te hãm'ãktux xex hah, 'ihãk kuxa yũm ka'ok Topa kopah. ²⁶Pa mĩpkox te hãmýn yũm yõg hãpkux ha' mōg putup. Kaxĩy.

²⁷Ha 'ãmnĩy te 14 nõg, 'ihãk mũ'ãte kõnãg xexka Mẽnitehãn tuk mōxaha', ha 'ãmuuh ka'ok te mĩpkox yãy mōgãhã', ha 'ãmnĩy kote 'ihã mĩpkox yõg tik xop te hãmpe'paxex, hu:

—Hãm 'ũm xip tu hãmhũmnãg. Kaxĩy.

²⁸Tu kõnãg yõg mêt mō'kupix, ha kõnãg xet yõg mêt xohix te 36, ha xe' mōg, tu kõnãg yõg mêt xe mō'kupix, ha mêt te 27. ²⁹Ha hãpkux yõg mĩkaxxap xexka yĩpkutuk, tu mĩpkox te mĩkax tu yãy koxyõy yĩpkutuk, yĩy mĩpkox yõg pipkup putux te 4 kõnãg kopa mō'pok, nõm poxit hĩy'ax mĩpkox nã'kup tu nõ'hãp, pu mĩpkox tu mōg hok. Ha Topa tu' xak, pu hãptup mōnãy. ³⁰Pa mĩpkox yõg tik xop te nũ'pap-tup, tu mĩpkox kutõgnãg te kõnãg yĩmũ mōg hã' mōxakux, tu tu' xaptop hã' mōgãp-tup, tu hãm'ãktux, nũy mō'ãmã', hu:

—'ũgmũg mōg, nũy pipkup nõy mō'yõn kõnãg xexka kopah, pu mĩpkox tu mōg kux. Kaxĩy.

Pãyã' koit. ³¹Ha Paot te xonat yõg Kapitãm pu hãm'ãktux, xix xonat xop pu', hu:

—'ũxat, pu' xohix mĩpkox kopa' pi', ka 'ãxop xakix. Kaxĩy.

³²Ha Kapitãm te' xat, pu mĩpkox kopa' pi', ha xonat xop te mĩpkox kutõgnãg xit xak, ha yãy xe'e tu' mōg, ha kõnãg gãy te' xupepmãhã'.

³³Ha häptup 'ihã Paot te:

—'Äpu, 'äxit. 'Ämnÿy te 14 hä 'äxop xit 'ohnäg, 'äkuxänög tu'. ³⁴Yÿy xa häm'äktux, xa 'äxit, nüy yäy ka'ogã'. Topa te häm'äktux xex, 'ap 'äxaxok putup'ah, 'ap xakix putup'ah, xix 'ap xüy putup'ah. Kaxÿy.

³⁵Tu häm'äktux kux, tu päp paha!, tu Topa 'äktux max, tu' koxip, tu' mähã!, ha' xohix te' pënëhã!. ³⁶Tu' kuxa hittup, tu' xit. ³⁷Yã nöm xop te mÿpkox kopa' pip xop xohix te 276. ³⁸Tu' xit, tu' hi ka'ok, tu päp xap xuxnäg te xetox pop, tu kônäg xexka tu mō'pok, pu mÿpkox tu tutnep.

Tikmũ'ün xohix te hämnaq tu' möxaha'

³⁹Tu häptup ha ta häm pënëhã!, häm 'üm 'ap yümmüg'ah, pa häpkux pënëhã!, ha' max, ha häpkux tu mÿpkox mögãp-tup. ⁴⁰Ha pipkup te nÿpkox putux yähã!, ha' mög 'ohnäg, ha kônäg xexka kopa mō'pok, tu mÿmpe nöm mÿpkox mögã'ax ko'a!, ha topixxax xexka hÿy 'ämuuh te nöm tömähã!, tu häpkux ha' mög. ⁴¹Pa mÿpkox xupup te 'ämot yÿmũ' pip, tu' mög 'ohnäg, ha mÿpkox ta kup te kônäg yÿmũ' xup, tu yäy mahap, ha kônäg xexka gäy te' koxyöy.

⁴²Ha xonat xop te tikmũ'ün nöm kanet kopa' pip xop kix putup, pu tu nü'pa hok, ⁴³päyã xonat yög Kapitãm te Paot putup pax, tup-tex putup'ah, hu' xat hok, pu nöm xop kix hok, tu xe' xat, pu kônäg tu tuk-nÿhãm mög. ⁴⁴Ha nöm mög yümmüg hok xop te mÿmpe hä' mög, ha' xohix te nü'paha!, tu häpkux tu' möxaha'.

Paot te Mäot tu' xip

28 ¹Hak müg nü'paha!, tu häm 'üm yümmüg, ha hämyÿn yüm 'äxet'ax Mäot. ²Ha Mäot yög tikmũ'ün tek müg kuxa ka!, tu kuxap xexka mÿy, häm 'äxi hah, ha tex tihix, ha' xap tep-tex. ³Ha Paot te kuh pop, tu kuxap yÿmũ' mō'pok, ha käyã gäy kuh tu' xupep, pukpex tu' xupep hah, tu Paot yÿm putop, tu ta tu' xup. ⁴Ha Mäot yög tikmũ'ün te' pënëhã!, tu' nöy pu häm'äktux, hu:

—'Öhöm tik kummuk putuk. 'Äte nöm tik te' nöy putex pekpaxex. Kônäg xexka gäy tu' xupaha!, pa Topa tep-tup nög, tu käyã pup-tömähã!. Kaxÿy.

Ha kaxÿy nöm tikmũ'ün te Paot pe'paxex kummuk.

⁵Päyã Paot te' yÿm puhmÿy, tu nõ käyã mö'yön kuxap kopah, tu' pakut 'ohnäg, tu' xüy 'ohnäg. ⁶Ha tikmũ'ün te Paot yÿm möm hip, tu' xok tu' nã' pënëp-tup, tu xe' hip, päyã Paot hittup pax, tu' pakut 'ohnäg, yÿy tikmũ'ün te' yëy, hu:

—Hamün yã topahnäg 'üm! Kaxÿy.

⁷Ha Mäot yög xexka Pup, tup-texop xexkah, yã' yög häm punethok pip, tu yäy pet ha tuk müg xänähã!, 'ü non pix, ha 'ämnÿy 3 häk müg pip. ⁸Ha Pup müg tak pakut, ha' xax pukpex, tu' xakuk xi' ta hep, ha Paot mög, tup-tox yÿmũ' yÿm xex, tu Topa pu häm'äktux hä' hittupmähã!, hä xax xuxi!. ⁹Ha Mäot yög tikmũ'ün pakut xop te' xupak, tu' nün, ha' hittupmähã!. ¹⁰Ha' kuxa hittup xexka!, tuk müg häpxop hok pöp'mähã!, ha mÿpkox kopak müg mög, ha nöm xop te häpxop punethok 'üg'mũ'ã' nÿm.

Tu Mäot nīm, nūy Hōm ha' mōg

¹¹Ha mīpkox nōy te hāmyīn yūm Mäot tu' xip, hām 'äxi' yōg mēy 3 hā' xip, tu kōmēn xexka 'Anexānit tu' nūn, ha mīpkox 'äxet'ax “topak-tonnix”, kaxīy. Ha mēy 3 nōg, hak mūg mōg mīpkox hā. ¹²Tu ta kōmēn Xinakox tuk-mūg mōg, tuk pip 'ämnīy 3 hā. ¹³Tu hām hūmnāg tu' mōg, tu 'Itat yōg kōmēn Hey pēnāhā', ha häptup nōy 'ihā 'āmuuh max te mō'kouk, tuk mūg mōgā mō'ka'ok, tu mōktu 'ämnīy 2 hā kōmēn Potep tuk mūg mōxaha'. ¹⁴Tuk mūg kuxa mām ka'ok xop xape pipihi', hak mū'äte' pet tu' pip 'ämnīy te 7 hā, tuk mūg mōg, tu mōktu mōxaha kōmēn xexka Hōm tu'. ¹⁵Hak xape xop te' xupak, tu' nūn, tu nūktu 'Ap yōg hām näkox tu' mōxaha', xix Mēn tikoyuk tu' mōxaha', ha Paot ka'ogāhā', ha Paot te Topa 'äktux max, tu yāy kuxa hittup xexkah.

Tu Hōm tu' xip

¹⁶Tu Hōm kopak mūg mōxaha', ha Paot te xonat puxehnāg mütik tihi mīptut kopah, pu pēnānā' xip. Ha Paot te mīptut xuxyā pu tayūmak hōm nūy mīptut kopa 'āti'.

¹⁷Ha 'ämnīy 3 nōg, 'ihā Paot te Hōm yōg Yoneo xop xānāhā', ha yāy tu nū'nāhā', ha Paot te:

—Ünōy mūnom xop, Yoneo xop tek mūg, päyā 'äte häpxopmä 'üm kummuk 'ohnāg tikmū'ün tu', xix mōnāyxop yōg häpxopmä'ax 'äte kummugā 'ohnāg, ha kanet kopak xix, tu' puknōg xop hak mōgāhā'. ¹⁸Hak yīkopit, tuk xupagāp-tup, 'äte häpkummuk 'üm mīy 'ohnāg hah, 'üyīk xok. ¹⁹Pa Yoneo xop tek putup nōg, yāk putex putup, yīy 'äte tu' xak, pu Xex 'ügyīkopit, yāg gāy 'ohnāg Yoneo yōg tikmū'ün tu'. ²⁰Tu 'äpēnāp-tup, nūy xa hām'äktux, hak hīy kupuk māg xap ha Yeyox hā, yā 'Iyaet yōg tikmū'ün xohix te nōm hip, hāmmax hip tu'. Kaxīy.

²¹Ha' nōy te:

—'Ak mū'äte tappet 'üm mō'kupix'ah, ha Yonex yōg xop te nū tappet kutnā 'ohnāg, ha Hōm yōg nōy xop te 'äkummuk 'äktux 'ohnāg. ²²Hak mū'äte 'ōg hām'äktux'ax 'äpak putup, nūy hāmyümmūg. Teptu Yoneo xop xohix te Yeyox xop putup nōg? Kaxīy.

²³Ha Yoneo xop te häptup 'üm nūn, Yoneo xop punthok nūn, nūy hām'āpax, tu yāy tu nū'nāhā Paot pet tu', ha Paot te Topa te yāy yōg tikmū'ün xat yūmmūgāhā', tu häptup tox hā hām'äktux, tu 'ämnīy 'ihā hām'äktux kux, tu Yeyox 'äktux, tu Mōyyex yōg xat'ax hā hāmyümmūgāhā', xix Topa pupi hām'äktux xop hā hāmyümmūgāhā kamah, nūy Yeyox yā Topa yōg hāmyāy kutnā'ax 'äktux. ²⁴Ha' yāg kuxa mām ka'ok, pa' yāg kuxa mām 'ohnāg, ²⁵tu yāy pu hām'äktux, tu hām'äktux hā' nōy yānān, tu hām'äktux 'ihā' mōg, Ha Paot te:

—Hōmā Topa Koxuk te hāmyümmūg, yīy 'Iyait te Topa pupi hām'äktux, tu mōnāyxop pu hām'äktux, hu:

²⁶“'Ämōg, tikmū'ün hah, tu hām'äktux, hu:

'Äxop te hām'āpak, päyā hām 'üm 'āpak 'ohnāg,

tu hãmpenãhã', pãyã hãm 'ũm pẽnã 'ohnãg.

²⁷Yã tikmũ'ũn putox ka'ok,

tu mõi'yãy yĩpkox yĩnnĩn, nũy hãm'ãpak hok,

xi' pa kĩy kamah, nũy hãmpẽnã hok,

ka hãmyũmmũg, xix yãyhãhup,

ka Topa yõg putat hã' mõg 'ũxeheh, 'ãte nõm hittupmã'ax,

pãyãp-tup nõg. Yã Topa te' xuktux tap." Kaxĩy.

²⁸Ha Paot xe hãm'ãktux, hu:

—'Ãte xa hãpxe'e 'ãktux: Topa te hãm'ãpak max'ax nũ'kutnãp-tup

hãmpuknõg xop hah, ha' yĩpkox pip, puyĩy Topa 'ũkuxa kummuk xit, nũy kuxa max tat 'ũyãnan tu'. Kaxĩy.

²⁹Ha Yoneo xop mõg, tu hãm'ãktux hã' nõy yãnãn nãm hã' mõg.

³⁰Hãmyãxatamuk 2 hã Paot te' yõg mĩptut kopa' xip, ha' xape xop nũn, nũy Paot pẽnã', ha' kuxa hittup, tu Topa te yãy yõg tikmũ'ũn xat 'ãktux pax. ³¹Tu Topa te Yeyox yãyikutnãhã 'ãktux tikmũ'ũn pu', ha' puknõg xop te' tux hok, pu mĩy, 'ĩhã' xohix te' yũmmũg.

Ha Nok te Yeyox yõg mõi'pok xop yõg hãpxopmã'ax 'ãktux kux.